

سَبَقَهَا إِلَيْهِ

مجموعة قصصية

فَهْلَةُ عَبْدِ السَّلَامِ



2016

اسم العمل	سبقها إليه
النوع	مجموعة قصصية
الكاتب	نهلة عبد السلام

تصميم الغلاف

إخراج داخلي

الطباعة

الناشر

المدير العام

تليفون

البريد الإلكتروني

فيس بوك

رقم الإيداع

الترقيم الدولي

محمد علي إبراهيم
اتيليه تاتش – المحروسة
الدار للنشر والتوزيع
محمد صلاح مراد
01125800467

eddar_press@yahoo.com

www.facebook.com/eldarpublish

الدار
للنشر والتوزيع

2016

إهداء

وتبقى بنات حواء مانحات للسعادة مهما أستقبلن من
ألم.. لكن ولمن يهمن.

مقدمة

إلتقيا.. إفترقا.. فى أول المشوار.. منتصفه.. اخره.. وما بين
البداية والنهاية سطور أبداً لم تكن لنتشابه.. فلكل ظروفه
وملابساته.. وبرغم الريش المقصوص والجنح المكسور.. إلا
إننا مازلنا قادرات على التحليق.. فوق أكوام الرماد.. تلك التى
خلفتها حرائق الهزائم والخيبات.. على الطيران.. إلى أرض
جديدة.. محرم على الخوف أن يطأها.. على اليأس أن يسكنها..
فقط الطمأنينة والأمل.

لكل من ضاقت عليها الأرض بما رحبت.. فى السماء متسع لكل
الحالمات.. الطموحات.. المتألمات.. فهذا ما يليق بالنجمات.
لكل من صادف وألتقيتها.. ربما تشبهك أحدهن.

لا أصدق من الكواليس ولا أوضح رؤية من المقاعد الخلفية..
فدائماً ما كان الأقرب للعين.. الأبعد عن خاطر

أصْلان و صورة

مع دقائق التاسعة أخذت الحركة تدب في المكان، الكل يتبادل التحية يتناول قهوته الصباحية.

أجرت ميرا التعديلات المطلوبة على التصميمات، حاولت تفادي ملاحظات عمر، كانت حريصة على إرضائه، فكلمة إطراء منه كفيلة بأن تجعل يومها سعيداً، وما أن انتهت حتى نسختها وأسرعت إليه تدق باب مكتبه، جلست في إنتظار أن ينتهي من مكالمته.

- طمئني عليها عامله إيه دلوقتي؟

-

- لما تصحى مالنوم قوليلها لو بتحبنى تاخذ الدوا وتبطل شقاوة كمان يوم واحد بس.

-

- لو احتاجتوا أى حاجة أتصلوا على تليفون السكرتاريه وهما هيلغوني، أسف هضطر أقفل موبايلي شويه.

-

- سلام

بدأت علامات الإرهاق واضحة على وجهه لذا بادرت به بالسؤال

- هي زينه تعبانه؟
- اه.. رجعت يوم الخميس من المدرسة سخنه، رحنا للدكتور قال لوزها ملتهبة، وهي بتكره الدوا وعلشان تاخده لازم نعمل فيها أراجوزات.
- طيب وحرارتها؟
- نزلت كثير، بس بقالنا ثلاث أيام مقضيانها ورادى شويه أنا وشويه ماما وفضلت تغيب لحد ما نطمئن عليها.
- إن شاء الله تبقى كويسة.. عدلت التصميمات تمام زى ما قولت بس برضه حظيت"التاتش" بتاعى.
- "أوكيه" قدامنا نص ساعة نلحق نبص عليهم قبل ما يبدأ الـ"meeting".

لمحت ميرا نظرة رضا وهو يتصفح الأوراق، فلطالما كانت قادرة على قراءة عينيه، تذكر يوم ألتحقت بالعمل معه منذ خمس سنوات، فبرغم مرحة وبشاشة وجهه كان الحزن يسكن عينيه لا يغادرهما أبداً وكأنما أصبح لا مأوى له إلا فيهما.

أنجذبت إليه ربما لأنه يشبهها إلا إنها كانت تفوقه قدرة على مداراة أحزانها، أختارت قلبها لتودعه إياها، إنه المكان الأكثر أماناً فما من أحد قادر على كشف سر القلوب إلا خالقها.

رحلت والدتها وهى فى الخامسة من عمرها أثر حادث سيارة، أصطحبها والدها لبيت جدتها تركها وذهب، باتت جزءاً من ماضى بالنسبة له إما المستقبل فملكه وحده، كون أسرته الجديدة وأكفى بزيارتها من حين لآخر، يهديها لعبة أو فستان ثم يخفى، تعد على أصابع يدها الواحدة مرات إحتضانه لها.. إحساسها بدفئه، دائماً ما كانت تجلس على مقربة منه، تتمنى لو قفزت إلى حضنه تحتمى به.. ولكنه لم يدعها ومنعها كبريائها أن تتطفل عليه، ألتمست له الأعذار فربما الرجال لا يعوون الفارق بين دار الأب ودار الإيواء، حضنه وحضن كل من سواه، ففى غياب الوالدين يضحى الكل غرباء، حتى وإن توددوا إليك تحسبه نوعاً من التعاطف الإحسان وأضف ما شئت من مسميات.

وألقت عمر، مرضت زوجته بعد أن أهدته زينه، رافقها رحلة معاناتها، ساندتها.. خفف عنها ولكنها رحلت تاركة له سحابة حزن دعت الله أن يرزقها عارضاً يمطرها فتتكشف.

أكتفى بإينته وبات لا يشغله سوى هى وعمله، لم تستطع طرد صورته مع زينه فى حفل زفاف أحد زملائهم بالعمل وهى تقبع فى حجره بأريحية، يداعبها فتضحك، يناولها ما شاءت من حلوى غير أبه لقميصه الناصع البياض، بدا الوضع مألوف لهما أما هى فلا.

أحبت عمر.. أحبت دعمه لزوجته ثم وفاءه لها.. تمسكه بإينته وحنانه الذى يغمرها به، ستنتظره حتى وإن لم يكن يشعر بما تكنه له، ستنتظره حتى وإن جازفت بمستقبلها كله، ستنتظر صورة تمحو بها اصلين طالما آلامها... صورة تجمع ثلاثتهم.

فى المساء هاتفته لتطمئن على زينة أو عليه أو ربما على نفسها، أجابتها والدته بصوت واهن.

- ألو

- ألو.. مساء الخير يا طنط.. أسفه لإزعاجك بس حبيت

أطمئن على زينة

- أزيك يا ميرا.. إزعاج إيه أنا صاحيه وقاعده لوحدى

بس مرهقه من اليومين اللى فاتوا شويه.. والحمد لله

زينة بقت أحسن كتير بس أصرت متتامش غير فى

حضن بياها وأنتى عارفه عمر ميقدرش على زعلها

- ربنا يخليهم لبعض
- ويخليكى حبيبتي.. شكراً على سؤالك.. بس أبقى أسألي
عليها ولا زينه بس اللي شغلاكم كلكم
- لا إزاي.. دأنا من حظى إني سمعت صوتك النهارده،
ولو زينه بقت كويسه وظروف حضرتك تسمح نخرج
سوا اخر الأسبوع فيه فيلم حلو أوى ممكن نشوفه مع
بعض ومناسب كمان لزينه
- ياريت.. وعموما على موبايلات.. لسه معاكى رقمى
ولا راح منك
- وأنا أقدر برضه.. طبعاً معايا

لم تكن تخطط لدعوة والدته للخروج أو حتى تعرف فيلماً جيداً
بدور العرض ليشاهدوه، ولكن هكذا صارت الأمور وعليها أن
تتدبر كل شئ لتجعله يوماً مميزاً، أجرت بحثاً عن السينمات
ومواعيد الحفلات، وأخيراً وبعد محاورات مع زينه وقع
إختيارها على فيلم (Animation 3D) حفلة الخامسة مساءً،
يمكنهم تناول الغداء قبله وسيتاح لها من الوقت بعد نهاية الفيلم
ما يسمح بشراء هدية للصغيرة.

سبق وأن خرجت مع والدته مع بداية تعارفها به، وبما إنها أوضحت مساعدته والتي ألفها بأسرع مما يتصور فقد طلب منها إصطحابها لشراء ملابس سهرة إذ كانوا مدعوين لعرس إحدى أقاربهم، بعدها هاتفتها وأتت على ذوقها الرفيع فى إنتقاء موديل حاز إعجاب الجميع، شكرت مجهودها فى البحث معها طوال النهار حتى تشتري لها ما ينال رضاها دون كلل أو ملل، بادلتها الشكر بشكر على صحبتها التى أسعدتها فهى بمثابة والدتها وداعبتها قائلة "الرك مش عالموديل الرك عالى يلبسه"، تمننت لو كررتها ولكن لم تسنح الظروف، دراسة الصغيرة وكذا ظروفها الصحية الغير مستقرة، ولكن يبدو أن المياه الراكدة حان لها أن تتحرك كاشفة عن حياة جديدة تخفيها تحت سطحها الساكن.

ألتقتها يوم الجمعة، مرت عليهم وأصطحبتهم بسيارتها، بدت بسيطة كعادتها فى خروجاتها الصباحية بدون مساحيق تجميل.. شعر مجموع للخلف.. ملابس فضفاضة فاتحة اللون، مظهر يعكس طبيعتها الطفولية والتي تأبى أن تتخلى عنها.

- ميرا.. احنا هنشوف الفيلم دلوقتى

- لا حبيبتي.. لسه أدامنا ساعتين لحد ما يبدأ.. يعنى ممكن نتغدى الأول.. تحبى تأكلى إيه؟
- أنا بحب البيتزا بس تيته مش أوى يعنى
- لا النهارده أوى خالص.. الخروج بتاعتك المراتى..
- وزى ما اختارتى الفيلم مع ميرا هتختارى برضه الغدا وهأعرض عالبيتزا فى حالة واحدة بس
- إيه هى يا تيته
- إن ميرا تكون مش بتحبتها

باتت زينة تحتضن عروستها الجديدة، تقاسمت معها وحدتها فهونتها، أيقظها عمر بقبلة على جبينها.

- حبيبة بابا مش هتصحى بقى علشان تفطر معا
- بابا ممكن تطلب من تيته تقلى البيض مش تسلقه
- ليه مانتى بتحبيه مسلق وبتعملى بيه مهرجان وأنتى بتدغدغى وتقشرى
- اه بس أصل جنى بتحبه مقلى
- جنى مين؟
- أختى اللى ميرا جابتها لى إمبراح، قعدنا سوا بالليل نحكى وعرفنا عن بعض كل حاجة.. وأتواعدنا نفضل

مع بعض على طول.. أصلها هي كمان كانت ديما
لوحدها

- وهى على كده بقى هتروح المدرسة معاكى؟
- لا طبعاً يا بابا.. هى لسه صغيرة يعنى مش ينفع تروح
المدرسة

ما أن دخل عمر على والدته أثناء إعدادها لطعام الإفطار حتى
لمحت ما طراً من تغيير على قسماته، وبينما كانت تهتم بوضع
غلاية البيض على النار حتى بدأها الحديث

- ماما لا.. سيبى البيض أنا هأقلية
- بس زينه بتحبه مسلوق
- وجنى بتحبه مقلّى
- يعنى مش بس هنمشى على مزاج زينه دحنا كمان
هنشوف مزاج ست جنى
- واضح أنى اخر شخص يتعرف على جنى فى البيت..
ما علينا.. ماما
- نعم
- فى سؤال محيرنى؟
- دا باينه محيرك أوى.. أسأل يمكن أجابوك وأريحك

- مش الطبيعى إن زينة تعتبر جنى بنتها مش أختها؟
- مهو الطبيعى برضه إنها ما كانتش تتحرم من أمها قبل حتى ما توعى لشكلها.. يا ابنى مهما أنا وأنت أهتمينا ودلعنا مش هنقدر نملى الفراغ اللى جواها.. بنتك حاسه بالوحدة.. محتاجه ونس.. أخت تلعب معاها مش بنت تلعب بيها
- ياريت كان بإيدى أى حاجة كنت عملتها
- الحاجة فى إيدك.. بس خوفك الزايد على زينه واللى مالوش أى مبرر هو اللى مخليك مش قادر تعمل.. مش قادر تخلقلها حياة جديدة.. حياة عادية.. طبيعية
- ماما أنتى قصدك....

إلتفتى كما شئنى للخلف..

ولكن نقي أن العقارب لا تغير إتحاء دورانها

أكثر من وعاء

- مدام سحر.. مدام سحر
- اه.. نعم
- دور حضرتك.. أتفضلى

بالكاد كانت تبتلع ريقها وهى فى إنتظار حكم الطبيب، هذا الذى سيحدد مآلها لنعيم مقيم أو لجحيم لا رحمة فيه، صامت هو يحرك هذا الشئ على بطنها جيئة وزهاب، لا تفهم شئ مما يظهر على الشاشة، مرت الدقائق ثقيلة.. أثقل مما تحمله من هموم، هم أن يحرك شفثيه بالكلام فخيّل لها ان قلبها توقف للحظة ولكنه سرعان ما عاد للخفقان.. فى إنتظار المزيد من كؤوس العذابات يرشفها واحداً تلو الآخر.

- الميه كويسه.. حجمه معقول.. بيتتطط ولا البهلوان..
كله تمام الحمد لله.
- هو نوعه إيه يا دكتور؟
- مش باين
- ليه مش المفروض بيان فى الخامس
- مش ديما.. لكن إحتمال تكون بنوته بس ده مش أكيد

- لا الله يرضى عليك.. إحتمال ولا أكيد؟
- يا مدام "السونار" علشان نطمئن على نمو الجنين وصحته
مش نشوفه بنت ولا ولد.. هو احنا هنبدله.. أَرْضِي
بنعمة ربنا

يلومنى الطبيب "أرضى بنعمة ربنا"، ويلومنى زوجى "مش عارفه تجيبيلى حته واد"، ويلومنى الناس "تاخدى راجل ليه ست وعيال"، أصبح اللوم أسلوب حياة، فقط أنت مذنب وتستحق العقاب دون النظر لظروف أو ملايسات.. حدثت نفسها وهى فى الطريق لجارتها.

- معلىش يا إيمان أتاخرت عليكى.. العيادة كانت زحمة شوية
- ولا يهملك حبيبتي ده أنا بتونس بالبنات
- دا تلاقيهم صدعوكى
- ياريت كل الصداع كده.. دا البيت مبتدبش فيه الروح إلا وهما عندى.. غسل ما شاء الله عليهم
- طيب يا ستي أخذ بقى العسل اللى علشانه صابره عالقرص
- ضحى.. تقى.. حزن كبير أوى قبل ما تمشوا

لم تكن الحياة لتدللها فتمنحها إختيارات، فما عرفت لأسرتها
الكبيرة من عائل سوى أخيها الأكبر، يعمل ليل نهار ليوفر أبسط
الإحتياجات لذا كان إتمام تعليمها فى حكم المحال، رغم ذلك
عملت فى إحدى محال الملابس النسائية فلربما يتغير الحال،
طمأنتها بشاشة صاحب العمل ولين معاملته، رأت فيه صورة
الأب الذى تفتقده ولكنه رأى فيها غير ذلك.

- طول عمرك رزقك واسع يا بت
- لا ما هو باين يا أخويا
- لا والله.. دأنتى أمك دعيالك.. الحاج سيد طلب إيدك
- طلبها يعمل بيها إيه؟
- هيعمل كتير.. هيصيغها ويريحها مالشيل والخط
ويرحمها مالفرد واللم
- لا أنا عاوزه أتعبها
- وهى لسه مشبعتش تعب
- نصيبها بقى واللى ميرضاش بنصيه الهم يصيبه
- يا عيني عالحكم... إلا الأنسة كام سنة؟
- تدينى كام؟
- اديكى للى يقيمك
- تانى.. دا متجوز وعنده أربع بنات عرايس

- وماله!.. متجوز واحدة يعنى فاضله تلاته
- نعم!!
- لا مأتى بتلاته وتلاتين.. خلصينا بقى
- دا جواز مينفعش يتأخذ كده قفش.. سيبنى أفكر
- برضه حلو.. التقل صنعه وكل ما ننقل نُجبر أكثر

لم تستطع الذهاب للعمل فى اليوم التالى ، "مرفوض".. تمننت لو قالتها عالية فزلزلت بها المنزل، فلربما أسمعت آذان الجدران رأيها بعد أن أصاب الصمم كل البشر ممن حولها، ساعدها ضغط العمل على التصرف بشكل معتاد، فمع بداية موسم التنزيلات لا وقت لأخذ أو رد، فقط عندما حانت ساعة الغداء لم ينصرف الحاج كعادته ليتناول طعامه مع شلته.

- يا شباب.. الغدا عندى النهارده.. تحبوا تأكلوا إيه؟
- مادام فيها عزومة وعلى مزاجنا كمان تبقى المناسبة جامدة أوى وتستاهل.. خير يا حاج
- جرى إيه يا بت يا زينب.. هى أول مرة أعزمكم يعنى ما ياما.. مش فاكركه لما كنتى جايلا بوصه وفى ظرف سنتين بقيتى بلوظه.. يا زينب دأنا بفكر أفتح فرع مقاسات خاصة بسببك

- ياريتكم سيبتوني بوصة كان زمانى بقيت عروسه إلا كل اللى يعاين يتخض يروح ميرجعش تانى
- أنتى اللى طفسه ما سحر إدامك.. خديها قدوة.. مثل.. نموذج
- إن شاء الله بس بعد عزومة النهارده.. علوزين رز كبسه وضانى
- مفيش فايده فيكى.. والنعمة لا تموتى منفجره.. والأكل النهارده على ذوق سحر
- وأشمعنى سحر بقى
- علشان ساكته مالصبح مسمعتلهاش حس يا ست عزة
- يعنى هو أنا اللى أتكلمت
- لا بس قالبه وشك مالصبح للزباين.. خلك فى مناخيرك.. وأنا نبهتك قبل كده تبتمسى وتفردوها.. مش مصبرنى عليكى إلا أختك أشتغلت معايا سنين مشوفتش فى أمانتها.. نصيحة منى أنتى مكانك محل حانوتى مش فساتين فرح وسهرة
- ها يا سحر قولى هتوكلينا إيه؟
- أى حاجة
- شايفين الأدب.. مش قولتلكم قدوة.. مثل.. نموذج

كان مرحاً بطبيعته، أعتاد البنات على مزاحه.. لذا لم تغضب أحداً من قفساته.. وحده كان غاضباً، قضى يومه يعاملها بجفاء.. يتحاشى النظر إليها.. أنتظرت حتى وانتهت فرصة للحديث معه أثناء مراجعة حسابات اليوم.

- مالك يا عادل.. زعلان منى فى حاجة؟
- مأزعل ولا أتفلق المهم الحاج صاحب المال مبسوط منك راضى عنك
- الكلام ده ميتقاليش.. عيب أنت تعرفنى كويس
- طيب وعينه الللى منزلتش من عليكى من طلعة النهار.. والغدوه الللى على مزاجك يا هانم
- قبل ما مخك يأخذك لبعيد وما لآخر كده.. الحاج طلب إيدى
- وأنا؟
- هو خد خطوة بجد.. وأنت ليك سنه بتمهد.. بين أمارة وساعتها أقدر أقول لا
- نفسى والله.. بس أنا هروح فيه فين
- يبقى كده أنا الللى هروح فى الرجلين

- أيوه طلعينى بقى خليت بيكى ومطلعتش الراجل اللى
يقدر يسندك وأنتى من جواكى بتقولى بركة اللى جات
منه

- لا أنا هطلعك من قلبى اللى ربنا يعلم إنك أول واحد
سكنته

لم تلتقى عادل بعدها أو أياً من زميلاتها فقد أثرت أن تلزم
منزلها حتى يُبِت فى أمرها، بالإجماع أعتبرت أسرتها الزيجة
فرصة وغنيمة، لم يعر أحد إهتمام لمخاوفها أو يلقى بال
لطموحها، لذا فقد حسم أخيها الأمر بإبلاغ موافقتهم للعريس
الميمون.

أهداها شبكة أثقلت معصمها وشغلت معظم أصابعها، وفى أقل
من شهر أثث لها شقة شهقت أمها عند رؤيتها.

- أنا ليا طلب عندك يا حاج
- طلب قصاد طلب.. قولتى إيه؟
- مش أعرف الأول هو إيه الطلب.. مش يمكن مش اده
مقدرشى عليه

- بدمتك ودينك فى واحدة تقول لخطيبها يا حاج
- اه فى دى عندك حق.. بس برضه العين متعلاش

- العین مش شایفه غیرک.. حاج دی مسمعهاش تانی..
اتفقنا

- لما توافق الأول

- على ایه؟

- أنا عاوزه فرح وزفه.. یعنی یرضیک ألبس یاما بنات
الفتان الأبيض ولحد عندی وأقول بلاش.. مفیش داعی
- أحلی فستان یجیک والفرح من عینی بس عالصیق ومن
غیر زفه

- من غیر زفه.. لیه بقی؟.. هو أنا أقل منها؟

- لا.. أنا اللی أكبر منها.. مش قیمتی وکمان بناتی
یزعلوا

- ماشی یا سیدی مالی یزعلهم یزعلنی برضه

- سیبک بقی مالهیصه الفاضیه دی.. وعد منی تشوفی
معایا العز کله طول العمر

لم تكن أكثر من وعاء، دمية جميلة تمنحه ما شاء وقتما شاء،
وما هي إلا أشهر قليلة حتى أصبح الولد المنتظر محور الحياة،
خمسة أشهر من الدلال حتى هل الهلال وتأكد الحاج من قدوم
الفتاة، لا تدري أي جرم ارتكبت حتى يهجرها، فما هاتفها حتى
منذ حادثة "السونار"، وأخيراً ظهر في ساعة الوضع، أستقبل

المولودة بشعور أقل ما يُوصف به الفتور ، "المرّة الجايه أجيبك الولد" قالتها عينيها دون أن تتطّقها شفّتيها.

تكرّر الأمر برّدة فعل أعنف، شحت مشاعره ونقوده أيضاً، فأضطرت لبيع بعض من قطعها الذهبية حتّى خلت أصابعها إلا من دبلة شاهدة على صفقة زواجها، مع ذلك رضيت ولكن هل سيرضى هو بالمزيد من البنات؟؟.. كثيراً ما راودتها كوابيس حرمتها لذة النوم بطمأنينة، فمنذ علمت بحملها لم تمر ليلة دون أن تبلل وسادتها بدموعها، كأنما أضحى طقس يومى لا غنى عنه، ذبلت عينيها وأضحت شاحبة بإستمرار بعد أن ضلت الحمرة طريقها لوجنتيها، فقدت كثيراً من وزنها.. تأثّر مظهرها وهندامها ورغم ذلك غضوا بصرهم كما سبق وأن صموا آذانهم.

قادتها قدماها لمنزل الأسرة، رمقت طفلتيتها بنظرة خائفة من غد مجهول وأب أفقده عقله طول إنتظاره لصبى، كانتا مع جمع الصغار فى مكان أضيق من أن يتسع للهوهم فجلسوا يتبادلون النكات والضحكات بينما يلقيان بالنرد على صفحة السلم والشعبان، حتّى اللعب يتأرجح بين صعود وهبوط.. وحدها هى عاقلة ما بين بين.. كسرت والدتها صمتها بالحديث.

- شكك تعبان يا حبيبتى.. أجمدى كده.. بكره تقومى
بالسلامه وكل التعب هيروح
- بكره لسه التعب هييجى

بإستطاعة الجميع النسيان ولو بعد حين..

أما العاشقين بصدق فأبدًا

أكذب حتى إشعار آخر

"أنا عندي ابن هو كل حياتي... وأنا عندي قلب أنتي كل حياته"
أخفت ندى دمة كادت أن تسقط من عينيها، فلطالما لمسها
حوار البطلين رغم تكرار سماعه.. "نهر الحب"، لم يكن نصيبها
من هذا النهر سوى بضع قطرات، لم تكد ترتوي حتى طالها
الظمأ، هذا الذي سكن روحها مبكراً فتجدت مشاعرها قبل
ملاحها.

لم يكن وحده المشهد الباعث على حزنها فمئذ حديث عمتها وهي
تستमित في مغالبة دموعها.. ولكن من غيره بإمكانه كفكفته..
تجفيف نبع أوجاعها.

- هو مالوش اخر يا مريم.. العمر بيجرى وأنتي مصره
تعيشي في إمبراح
- وهو ينفع اخرتها أبيع واحد ضحي بعمره مش بس
علشاني دا علشاننا كلنا
- متضحكيش على نفسك يا بنتي.. دا يا عيني عليه
وعاللي زيه راحوا بلاش.. وأديكي شايفه الحال سينا
زي سونيا

- لا أنا مش معاكى.. وحتى بفرض إن كلامك صح مين أولى منى يصون ولا يقدر
- العيشه غلا وأنتى وابنك محتاجين اللى يراعيكم ويشوف طلبتكم.. وتبقى عبيطة لو مستتىيه الأوهام اللى فى رأسكم يتحقق حتى عشرينها
- دى مش أوهام.. دى حقوق
- بلا حقوق بلا تجارة.. جايك عريس متفصل على ظروفك.. زى مانتى لازمك أب لإبنك هو لازمه أم لإبنه.. أتسندوا على بعض يا بنتى.. اللى ببساعدوكى النهارده إن كان أبوكى ولا أخوكى مش هيدومولك
- بس إبنى ما كانش عنده أى أب
- على رأسى يا ستى بس أهو أحسن من مفيش خالص.. فكرى بعقلك شويه.. ولا أقولك بلاش عقلك أنتى بالذات.. دحنا ياما شوفنا منه
- أكثر حاجة وجعانى إنكوا كنتوا شايفنى صدام.. علشان بس بعرف أقول لا
- متخلينى ساكتة بقى.. هو قليل علينا لما نلف وراكى فى الأقسام ونحفى لحد ما نوصلك
- يعنى وهو أنا كنت بأتمسك آداب

- مادام بنت وفى القسم يبقى كله محصل بعضه.. دا
أبوكى كان بببقى هيروح فيها ومش عارف يودى وشه
فين مالناس.. وهو رضى بمحمود من قليل.. شافه من
طينتك

- عمتى.. محمود مفيش حد زيه وكفايه تقطيم بقى
يا بنتى مش قصدى.. أنا بس عاوزه أطمئن عليكى
وعلى إبنك وهاشم حد كويس أوى وابن ناس
متضيعهوش من ايدك

- غريبه أوى.. خايفين ليضيع عريس.. إنما حلم عمرنا..
عادى فى داهية

- بلا حلم بلا زفت.. دحنا فى كابوس ميعلمبوش إلا
ربنا.. طب دأنا الست الكبيرة مبقيتش أأمن على نفسى..
خطف وسرقة وقتل عادى جداً.. ما هى زاطت بقى وما
عادشى ليها كبير

- يعنى هو كان ليها!!

- ليها ملهاش أهو اللى جرى جرى وربنا يستر.. المهم
دلوقتى بيقالك أنتى كبير.. يضللك عليكى ويحملكى..
أنتى لسه فى عز شبابك وما شاء الله بدر منور.. ريحى

قلبنا يا بنتى وأكسبى ثواب فى أبوكى اللى نفسه يطمن
عليكى قبل ما يفوت الدنيا

جافاها النوم.. بدا كل شئ ضيقاً رغم إتساعه.. الحجرة..
الفراش.. وصدرها.. مجرد التفكير يعد خيانة.. ولكن إن خانها
الجميع وعلى رأسهم الزمن وانشغل كل برعيته فمن لها
ولابنها.. ربما هى محقة عمتها.. أخيراً داعب النعاس أجفانها
فأستسلمت.

أزاحت الستار عن ذاكرتها وقت أن أزاحته عن نافذة غرفتها،
تأملت النهر... مثلها تماماً يبدو هادئ رغم ما يحمل فى أعماقه
من صراعات.

أرستمت صورته على صفحة الماء، مازالت عينيه تلمع بتلك
النظرة الثائرة، غلبتها دمعته تلك المرة، شعرت بدفئها على
وجنتيها، أمتدت يده لتمسحها، رددت بصوت خافت "محمود".

أحتضن يدها وسارا يقطعان معاً كوبرى قصر النيل، بدا كما
عهده دوماً غير أن الأسدین صارا أكثر... أكثر بكثير... بكثير
جداً، لم تدري كم مر من وقت كان الصمت ثالثهما حتى قطعه
سؤاله.

- ليه الدموع يا ندى؟
- خايفه
- وأنا جنبك
- جنبى دلوقتى.. لكن بكره جايز اه وجايز لا
- جايز اه.. مش أكيد
- مبقاش فيه شئ أكيد
- غريبه.. فى عز الضلمه كان جواكى نور.. كنتى مصدقه اللى كلنا مكديينه.. شايفاه قريب.. ممكن.. واحنا شايفينه بعيد.. مستحيل.. النهارده وبعد ما طلعتى الصبح ايه مخليكى تايهه.. مهزوزة
- يمكن علشان الصبح مطلعش صح
- لا.. أنا بقولك صح.. بس الصبر
- لحد أمتى؟
- لحد اخر نفس
- ما يمكن طلع واحنا مش دريانين ومتهياألنا إننا لسه عايشين
- يخرب بيت اللى عمل فيكى كده.. إسمعيني يا ندى.. أنتى تعرفينى من أمتى؟
- من يوم ما عرفت نفسى

- لا أنا بأتكلم جد
- وأنا كمان، أنا كانت علاقتى سطحية أوى بيا، مش عارفه ما كنتش عاوزه أعرفها ولا خايفه أعرفها ولا إيه بالظبط، أنت جرائتى عليها، مرة واحدة دخلت فيها شمال أتخضت وقرت بالحقيقة على طول، أنا بقى قدرت صراحتها وبدأت أتعامل معاها وأقبلها زى ما هى بعيها قبل ميزتها.
- طيب مانتى أهو لسه حبيتى اللي طول عمرى أعرفها.. امال إيه كل اللخبطة دى.. وبعدين تعالى هنا.. هو أنا أغيب عنك شوية تقلب معاكى بفلسفة
- إيه هو أنت غيببت عنى!!
- نظر إليها فى دهشة ثم ما لبث أن أختفى، تحررت يدها وتسلل إليها هتاف قادم من الميدان "عيش.. حرية.. عدالة إجتماعية"، أسرع نحو الصوت.. أنضمت للجمع... هتفت وهتفت... أرتجفت... فقدت السيطرة... وأخيراً سقطت، أنتبهت لصغير يهزها يصرخ فى وجهها.
- ماما مش هروح المدرسة دى تانى، رجعينى مدرستى
- ليه إيه اللي جرى يا أحمد؟

- قابلت على وأنا جاى وقعد يتريق عليا وعلى مدرستى،
بيقول أنت نقلت حكومة علشان مش بقى عندكم فلوس،
يعنى مش علشان هى أقرب للبيت زى ما قولتى.. أنتى
كذبتى عليا
- طيب متعيطشى.. ومتزعلشى منى أنا هأفهمك على كل
حاجة
- أنا مش بيعيط علشان زعلان منك.. أنا يا ماما خايف
عليكى
- من إيه يا حبيبى؟
- مالنار
- نار إيه!!
- نار ربنا.. أنتى مش كذبتى ببقى هتروحي النار.. وأنا
بحبك مش عاوزك تتعذبي.. ليه مقولتيش الحقيقة
- علشان محدش بيقولها.. وإن حصل وقالها.. تبقى مرة
من وجهة نظره.. ومره فيها مصلحته.. ومرة اضطر
ليها.. إنما بإرادته ولوجه الله نادر أوى أوى
- يعنى أنتى بتكذبي عليا فى حاجات كتير

- لا.. هو موضوع المدرسة بس وده علشان خوفت على زعلك وعارفه إنك هتتفوق وهترفع رأسى زى ما أبوك واللى زيه رفعوا راسنا كلنا
- يعنى الموضوع التانى مش هتكذبى فيه؟
- موضوع إيه؟
- اللي تيته أنعام كانت بتكلمك فيه إمبارح؟
- عرفت إزاي أنت مش كنت نايم؟
- أنا صحيت أشرب فسمعتكم بالصدفه
- اه.. بالصدفه.. ماشى صدك كترت أوى يا أحمد
- طيب ها.. هتعملى إيه؟
- مش عارفه
- بجد مش عارفه ولا..
- أسمع يا لمض، إمبارح راحت منى حياة كانت غالية أوى عليا، بس ربنا عوضنى بحياة أغلى.. ملت عليا دنيتى متهيألى أقدر أستغنى بيها عن أى حاجة وكل حاجة، الحياة دى أنت، كدبت عليك صحيح ومقدرش أوعدك بإنها تكون آخر كدبه بس أقدر أوعدك إن الكذب مش هيطول وقريب هيزول.

هدأ الصغير بينما عادت هى لثورتها.

الحى أبقى للحى.. والحاضر سند للحاضر..
والغائب حجته معه أو ربما عليه.

الجنة الخاوية

قادتني قدمای إلیه.. أو ربما شئ آخر، طرقته عدة مرات رغم علمی بأن لا أحد هناك، ألححت علیه فأبی، أستسلمت وأخرجت من جیبی المفتاح، هذا الذی طاله الصداً کغیره، أدرته.. فُتح الباب، تتدلی الخیوط من کل الأركان، بالكاد أخذت طریقى، مازال کل على حاله.. أو ربما تخيلت ذلك، أستندت لأریكة بدت غریبة عن المكان بعد أن أزحت عنها الغبار، دار شریط سینمائى لیثقلنى بأحداث تتوالى وشخوص کم حاولت أن أتناساها، تمددت أثر دوار أنتابنى.

جالسة هی تهدد طفلها " نام یا حبیبى نام وأدبح لك جوز حمام"، یغفو قلیلاً ثم ما یلبث أن یرفع بصره إلیها بإبتسامة ماکرة، یتلمى فى وجهها، یقاوم وكأنما یهاب النوم، تغازله بنظرة حانیه، یغلبه النعاس، تطبع قبلة على جبینه وتضعه فى الفراش.

تخرج مسرعة لجننتها الصغیره" ما شاء الله لا حول ولا قوة إلا بالله" رددتها عدة مرات لتحصنها حتى من نفسها، أفترب موعد الحصاد وعلا صیاح الدیكة، تلهو وتنبش الأرض، یتبعها صغار

تدهس أقدامهم نباتات لم تشب بعد، نهرتهم... تعجبوا لحالها فما عهدوا منها قبل اليوم إلا الترحاب، مع ذلك ذهبوا دونما عتاب.

لم تكثرث لأمرهم فما بات يشغلها سوى شئ واحد، زائرها المنتظر، طال غيابه وها هو يعود ويعود معه الكثير.. أو هكذا تأملت. بدت أكثر شباباً ونضارة، بهمة أفقدتها منذ زمن أخذت في إعداد ما كان يحبه، للحظة تساءلت "أما زال يحبه؟".

أنقثت الأجمل من بين الطيور، فما أدخرتها إلا من أجله، عزفت الألوانى سيمفونيتها، تزينت الطاولة بأطباق ملونة، تتوسطها زهور أختلط عبيرها برائحة الطعام، عيناها حائرة ما بين الساعة والطاولة، طال صمت طفلها.. تحسست الفراش.. راجعت البصر كرتين فأنقلب إليها خاسئاً وهو حسير، خوت جنتها على عروشها.. لم تدري كم عام أماتها الله؟

فرضت الشمس نورها على زجاج النافذة تحدث كل ما علق به، وتحدث إرادتى فأيقظتنى.. "ذهب الأحبة.. وبقت الجدران تحمل صور تحملنى على الحياة".. حدثت نفسى بينما أعيد للباب قفله الصدا.

- طبعاً جايه من هناك.. نفسى أعرف لحد أمتى هتفضلى
تعذبى روحك يا رقية
- مين قالك بعذبها.. دأنا بأرويهها.. بأحيها بذكريات
إمبارح مادام جبرنا ولا عاد لينا حاجة فى النهارده ولا
مالين إيدنا من بكره
- أحمدى ربنا.. احنا أحسن من غيرنا كتير.. ودى سنة
الحياة ماشيه عالك
- سنة الحياة.. طول ما هما عيال ومحتاجين بيقوا قاعدين
فى حضننا ومتهنين.. ينبت الريش وحبّة حبة يقوى
الجناح كله يطير.. يخلا العش ما يفضل غير
العواجيز.. ويقضوها بيستوا.. ويا ترى مين فيهم
هيجى الأول للقا ولا الوداع
- أنا عارف زيارة بيت أبوكى بتورينا كام يوم
- دا على أساس إن الأيام كلها حلوة.. مش وحدة فى وحدة
- والله يا رقيه أنتى ورثتى أمك.. أخترتى زيهما الإنتظار..
أدمنتيه.. والله يرحمها عاشت تستنى رجوع أخوكى عبد
الحميد وتحوش وتشيل ليه.. وهو يدى مواعيد ويخلف
ويكدب وبرضه تضحك على روحها وتستنى.. وأنتى
عارفه الباقي.. حتى الدفنه ما حضرهاش.. أصل

ظروفه مسمحتش والموضوع جه فجأة.. لا عزرائيل
كان لازم يضربله تليفون الأول

- مش ذنبه.. مراته كانت هتولد.. والألمان غيرنا بقي..

مش هيقدرُوا ولا يفهمُوا عوايدنا وتقاليدينا

- متجيبيش العيب على مراته.. هي اللي لقيتَه بايع أهله

وناسه.. غير جلده وأتجوز لا من ملته ولا من جنسيته..

واتتاشر سنه لا نزل بلده ولا سأل.. دحنا يا دوب نعرف

شكل ولاده مالمصور

- أهو زيه زى ابنك

- ولما أنت واعيَه إن ابنك زيه زى خاله.. بايع.. ما

توقعيه من حساباتك وتشيلي ايدك من على خدك

وتعيشي حياتك

- أعيش حياتي!! طيب ما أدهم هو كل حياتي.. هو أنا

طلعت إلا بيه

- أشفيها يارب.. مش راجع.. مش راجع.. أغنيها لك..

ولعلمك أنا مش دافع أقساط تاني.. مهو مادام كل واحد

بقي يقول يالا نفسي يبقى أعمل حاجة لاخرتي تنفعني

- يعنى إيه هتضيع بيت الولد.. دا كلها سنتين ونسدد ما

عليه

- بيته؟؟.. دا لما يكون هيقعد فيه.. يملاه بعياله.. يونسه بحسه.. يزرع جنينته.. مش بيت مهجور وجنيه بور.. أنتى ناقصه أشباح مأنتى شبعانه ومشبعانى معاكى.. وكفاية عليكى بيت أبوكى لا بتسكنيه ولا بتبعيه
- أنت عاوز أغراب يسكنوا بيتنا وينزلوا صورنا ويمحو آثارنا
- لا دأنتى هتجننينى.. دحنا عدينا الستين.. يعنى تقريباً بنلم عزالنا مالدنيا.. صور إيه وآثار إيه اللى بتفكرى فيها.. ما تفكك من جو المعابد اللى غرقانه فيه لشوشتك.. دا كبيرهم لما نموت زيارة أسبوع يبيعوا وبتاع الخردة يشيل اللى أنتى ماسكه ومتبته فيه
- مستحيل.. أدهم مش ممكن يعمل كده ولا حتى عبدالحميد
- حقاك عليا.. هما ربنا فاتحها عليهم ومش محتاجين.. بس سيبينى بقى أساعد المحتاجين.. اللى فى عرض حيطان وسقف وأويهم
- هتبيع بيت ابنك الوحيد
- كفايه إستفزاز بقى.. مهو بايعنا احنا شخصياً.. مالاخر أنا هعمل دار للأيتام.. حكم فاقد الشئ هو أكثر واحد

حاسس بيه.. دول اللي هيفتكرونى ويدعولى.. وأنتى
أختارى براحتك.. لا صور عالحيط.. لا لحم ودم وناس
فيهم حياة بجد

حسم صالح أمره.. أتخذ قراره، لم يُثنيه عن تنفيذه معارضة
رقية وإتهامها له بالتفريط فى حق ولده، باع المنزل والحديقة
وشرع فى بناء الدار، أصبح يقضى كل وقته فى العمل، يسابق
الزمن وكأنما يخشى أن يباغته الموت دون أن يلحق بموسم
الحصاد. فى الجنة العامرة.. أنتقى لهم أجمل الثياب، علت
الصيحات وعم المرح.. عيناه حائرة ما بين طفل يقفز هناك
واخر يحبو بجانبه، تزينت الطاولات بزهور بالكاد تفتح للحياة
أوراقها.. تراصت أطباق أمثلات بشتى أنواع الحلوى تتوسطها
كعكة الميلاد.. أختلطت الضحكات بأنغام الموسيقى.. كفت
الساعة عن ركضها.. بهمة وهبها الفرح روحه راح يداعبهم..
يراقصهم.. يضحى طفل منهم.

انطفأت الأنوار وتمايلت ألسنة الشموع.. أحتضنت الوجوه.. تلك
التي تصنع دائرة بفضل الأذرع الملتفة حول بعضها.. يعيد
أحدهم الزر لمكانه.. فإذا بها.. رقية تتوسط تل من هدايا طالما
كانت حبيسة الخزانة.. حررتها وتحررت معها.

ننتظر العدل.. بينما الظلم يجرى بعروقنا مجرى الدم.

الحكم قبل المداولة

"وحشتينى يا عمتى، نفسى أبقى أزورك.. تعرفى أنا عمرى ما شوفت بيتك".. قالت مريم ابنة الرابعة عشر فى العرس وهى تجلس بجوار أمينة تكاد تلتصق بها.

يأتى العيد فما يحمل جديد سوى بعض الملابس.. الحلوى.. وأوراق نقدية بلا ماضى، تنتظر أن يدق الباب، يمتلئ البيت بزوار تحسب نفسها بضع منهم، تتقضى الأيام فما تسمع سوى تلك الأصوات التى ألفتها منذ نعومتها.. فقط والديها.

تعود للمدرسة، تسرد الصديقات يوميات الفرح، أجمعنا فى بيت جدى، سهرنا حتى الفجر، أهدتتى عمتى حقيبة ملونة، وعدتتى بأن تصطحبنى معها إلى الأسكندرية حيث شقتها التى تكاد تحتضن البحر، سأقضى الصيف بأكمله أتيارى مع مها"من ستبنى بيت رملى أجمل؟"، منحنى عمى العيدية الأكبر "لتليق بفتاة لا طفلة".. قالها مازحاً، تملو الضحكات فما يسمع بكاء قلبها سواها.

تحصل على نتائج الفصل الدراسى الأول، تنتظر ساهمة لدرجاتها، تلمع الدموع فى عينيها، تحاول كبجها.. تغلبها.. تغمر

وجهها، تسرع إلى دورة المياه، تخرج منديلاً تلو الآخر، كلما أمتصت قطرات أنهرت غيرها، تبعثها هديل.. هالها المشهد، أدهشها حزنها وقد حصلت على أعلى الدرجات فدائماً ما توجت ملكة على رأس قائمة المتفوقين، سألتها فما أجابها سوى الصمت ومزيد من الدموع.

تكررت فى بقعة من السرير تخفى وجهها بين راحتها، مؤصدة هى كل الأبواب.. باب البيت.. باب الغرفة.. وباب سعادتها.. فقط باب واحد مفتوح على مصراعيه.. باب حيرتها.

أنتهت والدتها من صنع طعام الغداء، أنتظرتها لتعد المائدة.. تضع لمستها الراقية على توزيع الصحون والأكواب، طال الغياب.. نادتها.. راجعها صدى صوتها.. طرقت غرفتها.. لم تفتح.. لربما هى نائمة فما من ضوء يتسلل عبر الباب، ولكن ما عهدها تتخلف عن موعد الغداء، دوماً يتقاسماه معاً فى مثل هذا الوقت فوالدها يعود متأخراً من عمله.. أعادت الطرق.. ساورها قلق.. أدارت المقبض فأصطدمت عينيها بالكتلة المتكورة، أضاعت النور.. رفعت مريم رأسها فشبهت والدتها فزعاً.

- فى إيه يا حبيبتى؟

(تحقق فيها وكأنها تراها لأول مرة)

- أنتى جبتى درجات وحشه؟
(تمد يدها إليها بشهادة التقدير)
- طيب فهمينى حد ضايقك.. اتخانقتى.. زعلتى مع حد؟
(تنطق بكلمات مرتجفة فتبدو كمن يعانى خلل فى مخارج الكلام)
- أنا كل الناس زعلانين منى
- ليه عملتى إيه؟
- معرفشى أنا عملت إيه أو أنتوا عملتوا إيه.. بس أكيد حاجة غلط حاجة وحشه.. حاجة خلطنا لوحدنا محدش بيحب يقرب منا
- ليه بتقولى كده؟.. احنا عمرنا ما أذينا حد
- علشان دى الحقيقة اللي عايشنها وبنحاول نضحك على نفسنا وننكرها
- احنا عايشين أحسن عيشة ومش ناقصنا أى حاجة
- ناقصنا أهم حاجة.. الأهل.. العيلة اللي أحس إنها مرحبه بيا مش بفرض نفسى عليها فى كل مناسبة.. سلام إضطرارى وكلام بالقطارة.. ليه ديما بنبان مذبذبين.. مفروض عينا تبقى مكسورة وكلمتنا محشورة متطلعش.. بنطبطب بس ويارىت حد راضى

(تتصنع والدتها القوة فتخاطبها بنبرة حادة)

- أنتى شاغله نفسك ليه بفلان وعلان.. بصى لمستقبلك بكره تبقى أحسن الناس مش محتاجه لحد
- محتاجه لحد يقولى مبروك لما أنجح.. محتاجه لحد يشاركنى فرحتى.. كثير
- معدنيش عليه.. كبرتى وتقدرى تقيمي الأمور وتوزينيها كويس، بباكى متفقدش مع مراته لأولى رغم الأربع ولاد اللي بينهم كان كل واحد فيهم فى وادى، ويا بنتى فى الحالة دى الرجل لما يفكر فى جواز تانى يبقى ياله عليك غضب الله أنت وكل اللي هيجى بعد كده من ريحتك
- يعنى إيه غضبهم مالوش اخر.. مش هيجى يوم وينتهى دا احنا منهم وفى وشهم
- أوعى تفتكرى إنى محاولتش أودهم وأقرب منهم، بس دىما الاتهامات جاهزة "كهن ستات".. "عامله بنت ناس خرابة البيوت".. "بتفهم أوى فى الأصول خطافة الرجالة".. أتحملت برضه وميأستش قولت أقربك من أخواتك.. أنتم الأبقى لبعض

- عارفه يا ماما.. فى فرح ريم كنت حاسه نفسى غريبه
 مش فى فرح أختى، قعدت جنب عمتى أمينه، حسيت
 فى ملامحها حنيه، كان نفسى تسألنى أنتى فى سنه
 كام؟.. شاطره ولا؟.. كان نفسى أقولها إنى على طول
 الأولى، كان نفسى تبصلى تركز فى ملامحى تشوف
 الشبه اللى بينى وبينها، كان نفسى أسمعها بتنادينى باسم
 دلعى، تطلب منى أزورها.. أقضى يوم مع بنتها
 رضوى، احنا تقريباً من سن بعض يعنى ممكن نبقى
 أصحاب، كان نفسى فى حاجات ياما بس ملقيتش غير
 إيتسامه خايفه حد يشوفها فيتلام عليها.. مع ذلك كدبت
 روحى.. اتجرات وقولتيلها اللى شايله جوايا "وحشتينى
 يا عمتى، نفسى أبقي أزورك.. تعرفى أنا عمرى ما
 شوفت بيتك" .. عينيها جاوبتنى.. "ولا عمرك هتشوفيه"
 (أحتضنتها والدتها وقد تخلت عنها قوتها الزائفة)
- اللى زينا يا بنتى بيبقى الحكم عليه قبل المداولة

المظاهر .. الأكثر جاذبية وأحياناً كذباً.

أنف قدر

- لماذا أنفك قدر؟
- كنت أحفر فى الأرض.
- ولما؟
- لأختبئ منك أيها الثعلب المكار.
- وقدّر الفار يفر فى الوقت المناسب مالتعلب المكار...
- عجبتك؟
- أوى يا ماما.
- طيب روحى كملى لعب فى أوضتك حبيبتي.

كانت القصة الأحب إلى سارة منذ أهدتها إليها مدرستها وهى فى العاشرة لتفوقها الدراسى، وها هى تعيد قراءتها لإبنتها لمى، "وهل ثمة شئ أكر من الذكريات؟" هذا ما أعتقته دوماً سارة، فلكم حاولت مراراً ان تحفر مخبأ كهذا الفأر الضئيل، وليحمل أنفها القاذورات عوضاً عن ذاكرتها، مخبأ مقدس.. تخلع فيه كل ما ينقلها.. تستمع لما توحيه إليها روحها.. يتحرر لسانها.. تنفك عقدته... ينطلق.. فتجيب الجدران بأصدائها.. تطبع عليها نقوشها.. ولكنها تجيب بذات الصور.. فينعقد لسانها وتتهدم الجدران وتعتمر ذاكرتها والتي ما تحسب أنها خلعتها.

باغتھا ذاك الزائر الثقيل، صداد طالما أفسد ما تبقى منها، تناولت قرصاً مسكناً رغم علمها بعدم جدواه، بالكاد أستطاعت أن تصنع فنجان من القهوة، تمددت على الأريكة وألنقت جهاز التحكم، تنقلت بين القنوات بطريقة عشوائية حتى أستوقفها حديثه.

- الإشهار شرط أساسى لصحة الزواج، اى حد يقولك غير كده بيبقى مش بس بيتلاعب بيكى لا دا كمان بيتلاعب بشرع ربنا.

- حضرتك ممكن تكون فيه ظروف تمنعه فى الوقت الحالى من الإشهار وتوثيق الجواز بالشكل المعروف.

- بيبقى تستتنا لما يظبط ظروفه، إنما تجاوزف بسمعتها ومستقبلها دا جنون هى بس اللى هنتحمل عواقبه.

ليتها أنتظرت، ولكنه حاصرھا لم يترك لها فرصة لتختلى بنفسها فلربما تمهلت، سمحت لعقلها أن يكبح زمام قلبها، ألا يسمح له بالإنزلاق لهوة لا يعلم مدى عمقها.

كانت جميلة ووحيدة، انفصلا والداها فى صغرها، تزوج كلاهما بينما بقت هى مع جدتها لأبيها، راعتها قدر إستطاعتها إلى أن رحلت، حملها أبيها لبيتها، أضاف قطعة غريبة لأثاثه، شعرت

بذلك منذ الوهلة الأولى، لم تتحسّس زوجته لوجودها ولم ترفضه، حتى أشقائها حاولت أن تندمج في عالمهم فباعت محاولاتها بالفشل إذ لم يكن فيه مكان شاغر حتى تشغله، أنطوت على نفسها فنادرًا ما تطأ قدمها الشارع، إلى أن كان يوم تنذر سماءه بسقوط الأمطار وهاتفها صديقها سها.

- فينك يا بنتى من شهر مسمعتش صوتك، هو البيات الشتوى طال حتى الكلام.
- لا شتوى ولا صيفى، الأيام كلها نسخة من بعضها بتمر من غير ما أفصل بينها، بيلضم اليوم فى اليوم والأسبوع فى الأسبوع والشهر فى الشهر من غير جديد.
- ما أنا جايبالك الجديد، الأسبوع اللي فات حضرت درس لحد مقولكيش، روحت روحى خفيفة لا إكتئاب ولاهم ولا وجع قلب، طايره مع الملايكه.
- طايره معاهم ولا بتأكلى رز بلبن معاهم... حددى الكلام ده كان عالصاحى ولا عالنايم.
- يا ستى مش بهزر، أكسرى الحصار اللي عامله على نفسك وتعالى معايا جربى والدار قريبه أوى من بيتك.
- خليها للصيف.

- هفوت عليكى الساعة 6 تبقى جاهزة ومسمعى اى
إعتراض.. حاضر وبس.
- طيب هستأذن بابا.
- هيوافق أنا واثقة.. يالا سلام.

رحب والدها كما توقعت سها وزدها معاً، رجل فى الأربعينات من عمره تخلص من المظهر المألوف لرجل الدين، يرتدى الجينز والتيشيرت، تلائمت ملابسه مع جسده الرياضى، ملامحه هادئة وحديثه بث الطمأنية فى نفسها، تلك التى أفنقتها منذ غض والداها بصرهما عن وجودها ومضى كلاً منهما فى طريق، تعجبت سها من حماسها للمواظبة على الحضور، من بضع ساعات لم تكن لترغب حتى فى التجربة.

بدا كأخ أكبر لم يبخل بتقديم المشورة والنصح لطالباته والمساعدة أحياناً قدر استطاعته، فبمرور الوقت أصبح عالماً بأغلب ظروفهن، ومرت أشهر لم تتخلف ولو مرة عن محاضراته، حتى أصابتها وعكة فتغيبت، تفاجأت بسؤاله لسها عنها وعما منعها عن الحضور، لم تكن تتوقع إنه قد يلحظ غيابها وسط هذا الكم من الحاضرات، لا تدرى لما حرصت فى

المرّة التّالية ان ترتدى أفضل ما لديها، ربّما شعرت بوجودها كإنسان بأنّها أضحت أكثر من قطعة أثاث.

أعتذرت سها عن المجئ فذهبت وحدها، ألنّفته أمام الدار بشوش الوجه كعادته، وجه تحيته للواقفين ثم بادرها قائلاً "حمد الله عالسلامه"، اجابت بإقتضاب "الله يسلمك"، ثم واصل حديثه:

- ليا زميل صاحب شركة علوز سكرتيره تعرف كمبيوتر ومعاها لغة" لم يعط الفرصة لرد إذ أكمل " سارة ما تعملى "Interview".

- مش عارفه.

- ليه أنتى مش خريجة إداب إنجليزى وأفكر معاكى "ICDL" حاولى مش هتخسرى حاجة.

وما هى إلا أيام حتى إلتحقت بالوظيفة، أصبح لها دخل خاص وأصدقاء تعرفت إليهم من خلال العمل إضافة لمن تعرفت إليهم من خلال محاضراته، إنه ولى نعمتها صاحب الفضل فى خروجها من شرنقتها التى كادت تختنق بداخلها، وحده من يكثرث لها يتابعها يسألها عن أحوالها، تعلقت بصوته الذى يهانفها بصفة شبه يومية، بوجهه الذى يطالعها مرة فى الأسبوع ومرات عديدة كلما أغفلت عينها لتتنام.

حذرتها سها من إندفاع مشاعرها نحو رجل متزوج وله عائلة فلم تستمع لها، فإن كان بينهما من عليه أن يتوخى الحذر فليكن هو، شخصية مشهورة معدود عليه أنفاسه محسوبة عليه خطواته.

تزوجته سراً مراعاة لظروفه، أبداً لم يساورها شك في أن يتلاعب بها حتى حملت، تحول الحمل لهمج، ثار في وجهها وطلب منها أن تجهض نفسها، رفضت فإنها عليها ضرباً ثم تركها لصدمتها وخرج، زارها بعد أيام وقد تخطى عن إبتسامته.. فقط شرر يتطاير من عينيه، هدهدها وتوعدها إن حاولت نسب طفلها إليه أو الزج بإسمه فيما يسئ لسمعته.

أدركت أنها النهاية.. لم تره بعدها، وهاهو بعد خمس سنوات مازال يرتدى نفس القناع ويلوك نفس الكلمات.

خرجت لمى من غرفتها، ألقت نظرة على الرجل الجالس خلف الشاشة ثم أعادت النظر لوالدتها:

- مين ده يا ماما.

- دا التعلب.

تجارة أبدأ لن تبور.. مادامت تُزرع في عقول بور..
تنثر حبات الوهم.. ترويها بالجهل.. فنتبت بضحايا لا حصر
لهم ولا عد.

جلب الحبيب

ترضى بما قسمه الله لها، أبداً لم تتتابها مشاعر الغيرة أو الحسد فدائماً ما أحست بأن ما تملكه هو الأفضل، ولكنها كأتى امرأة.. إذا ما تعلق الأمر بأمومتها.. بأبناءها أصبحت شخص آخر، آخر رغم غربتها عنه إلا إنها تستسلم له.. تدافع عنه بإستماته.. فالأمر يستحق، إنها إبنتها تلك التى تجاوزت الخامسة والثلاثين ولم تتزوج بعد.

يمر بخاطرها صور لكل زميلات إبنتها وهن فى أثواب العرس، ثم وهن يحملن أطفالهن.. وما تلبث أن تتوقف عندها.. ليست أقل منهن، تسيطر عليها أفكار لم تكن تتصور يوماً أن تتسلل لعقلها، وها هى اليوم على شفا الإيمان الكامل بها والانسحاق ورائها، صمتت وصمتت وأخيراً تحدثت.

- ليلى
- نعم يا ماما
- تعالى أشربى معايا الشاى
- حاضر

دارت بينهما أحاديث عدة لم تكن تعي أكثرها، مشتته هي فما تكاد تبدأ في موضوع حتى تقفز لغيره، وكأنها لا تملك الجرأة لمواجهة إبنتها أو حتى مواجهة نفسها بما ستقوله، ولكنها أدركت أنه لا مفر، رفعت صوتها قليلاً مصطنعه الثقة

- إحنا لازم نشوف حل في موضوعك
- موضوع إيه؟
- أنتي متجوزتيش ليه لحد دلوقتي؟
- النصيب
- وأسمعنا نصيبك أنتي بالذات غير نصيب كل البنات؟
- لا ده نصيب كثير منهم.. بس أنتي مش شايفه غيري" كل بيكي على ليلاه يا أم ليلي"
- بس أنتي ألف من يتمناكي ومفكيش أي عيب
- عادى عندنا النهارده في مصر ملايين البنات بيسموهم عوانس وبرضه مفهومش أي عيب
- لا الكلام ده مبقاش ينفع معايا، أنا صبرت كثير وصبري نفذ ولازم أتصرف
- مش فاهمه تتصرفي في إيه وإزاي ده كله بأمر الله
- ونعمه بالله بس أنتي اكيد مسحورة ولا معمولك عمل
- أنتي أكيد بتهزري

- لا طبعاً هو مستقبلك فيه هزار.. أنا خلاص شوفت فى التلفزيون شيخ عشرة على عشرة بيحل كل الأمور دى وبيقول نسبة النجاح 99%
- ده مش نسبة النجاح ده نسبة الإحتيال ، دول شوية دجالين على نصابين
- يعنى أنا هعمل حاجة حرام ولا نيتى أذية حد لا سمح الله، أسمعى الكلام
- لا معلىش أنا مش ممكن أوافق حتى على الفكرة مش أنفذها
- لا مش مهم توافقى كفاية أنا موافقة وأنتى هتتفدى

تركت ليلى أمها لتختلى بنفسها، تشعر وكأنها فى بئر عميق، هى الأستاذة الجامعية التى تهاجم تجارة الفضائيات بأحلام الناس ليعيشوا غيبوبة الوهم بدلاً من مواجهة الحياة، الإعتراف بحقائقها ومستجداتها على حد سواء، كادت أن تفقد عقلها، ثم ما لبثت أن طمأنت نفسها"دى مجرد زوبعة فى فئجان مش أكثر".

لم يعد يمر يوم دون أن يتكرر الحوار بإلحاح أكثر وبغضب أكبر، بحثت عن دعم فعادت صفر اليدين.

وحدها هى متعبة ممة فى فراشها، تدير قنوات التلفاز بطريقة عشوائية، فاجأها... إستسلمت... إل تقطت ورقة لتكتب أرقام ظهرت على الشاشة "هنقرب البعيد وهنجلب الحبيب".

كفكفى دموعك.. لن ينسكب اللبن ثانياً..
فما عاد بإمكانك إيتياع المزيد.

حالة بأكثر مما ينبغي

سددت ضربات متتالية للمنضدة، ليتهأ سددتها لرأسه لتهشمه، فلربما أفرغت شحنة غضبها، أسرعت تغترف الماء البارد فتمسح به وجهها عليها تهذاً، أشعلت عود من البخور الهندي، أدارت موسيقى ناعمة، وسمحت فقط بإضاءة خافته، أعدت فنان من القهوة الدافئة، تمددت وأسترخت فى محاولة يائسة لنسيان تفاصيل تلك المكالمة، كانت الردود صادمة، أستعطفت كفها كى يقاوم رغبتها فى إنهاء الحوار، لن يكلف الأمر سوى ضغطة واحدة، رغم ذلك تحلت بالصبر حتى النهاية فلا مخطئ غيرها، فلطالما كانت حالة أكثر مما ينبغي، تتعامل مع المفروض لا الموجود.

- أنا محدش عملنى... ولو فينا حد أستغل التانى يبقى أنتى
- ليه أنا اللي كنت متخرجه ليا سنتين وقاعده فى بيتنا محدش بيقولى أنتى فين، أنا اللي لف يوماتى عالمكاتب ومش عارفه حتى أشتغل تحت التمرين
- بس يوم ما أشتغلت فى ظرف سنة بقيت أهم محامى فى المكتب.. الدراع اليمين والشمال كمان

- لا الشهادة لله أنت فى الشمال ملكش زى، بس منتساش
بس إنك أشتغلت بتليفون منى، لولا إن دكتور حمدى
كان صديق شخصى لأبويا ما كانش عبرك، ما فيه زيك
آلاف

- ولما فى زىي آلاف كنتى بتجربى ورايا ليه فى كل
مكان، دأنتى كنتى بتطلعلى مالمفات

- ألف وراك فين.. أنا عمرى ما روح حوارى.. أنت
اللى كنت مبرشط علينا فى النادى.. أهو أى حد يسلكك
وتدخل

- أدخل نارك.. صيدتىنى أول ما شوفتىنى.. بايره بقى وما
صدقنى

- ولما أنا بايرة صيدتك بايه بقى غير إذا كان الطعم
فلوسى ونفوذى.. طعم مياكلوش غير إنتهازى ووصولى

- وفلوسك ونفوذك دول يساوا إيه ادام شبابى يا بايرة

- بايرة إيه! إيه الهرتله دى... ده أنا أكبر منك بخمس
سنين مش بخمسين.. ويوم ما ربنا بلانى بيبك كان
عمرى ثلاثين

- اه فاكر.. بالأمانة كان ساعتها كل صحباتك متجوزين واللى معاها عيل واللى معاها اتنين.. وأنتى قاعدة زى الغراب
- مأنت كنت بتبوس التراب اللى بيمشى عليه الغراب اللى عمك طاووس منفوش.. الغراب اللى يقدر يقصصك ريشك الملون ويرجعك لأصلك
- هو أنتى لسه عايشه فى قديمه.. لا ركزى شويه فى الصورة.. شوفى مين أنشال منها ومين بقى قاعد ومربع فيها
- مالاخر يا عماد كل حقوقى ونطلع بالمعروف
- دا لو كنا دخلنا بيه.. إنما أنتوا نصبتوا عليا، كتبتونى مؤخر ميدفعش للأميرة ديانا.. طبعاً أنا كنت عبيط
- أنت كسبت من ورايا اللى ما كنتش تحلم بيه وده حقى
- وأنتى عيشتى معايا عشر سنين تأمرى وابن الخدامين بيطيع.. أظن كده احنا خالصين
- مش هسيب حقى
- نصيحة سيبيه وأنسيه متخلنيش أزعلك.. وأنتى عارفه أنا أقدر أعمل إيه

عرفته شاباً خلوفاً يشع البهجة فيمن حوله، يجتذب أنظار الجميع بحلو حديثه فيغضوا البصر عن تواضع مظهره، تودد إليها.. صدته.. ألح عليها.. مالت في شئ من حذر، فالفوارق المادية والإجتماعية أصعب مما يمكن تخطيه بسهولة، هذا إن أغفلت فارق العمر.. فعام واحد يجعل منها أم له في أعراف مجتمعاتنا.

غازلها.. أيقظ أنوثتها.. أحبته.. ناضلت بما يكفي لتحرير القدس لتبارك عائلتها الزيجة المشينة من وجهة نظرهم، مؤخر الأميرة كان من إقتراحه هو لا والدها، أراد أن يبرهن على حبه، دعمته بكل ما أوتيت من قوة، صنعت منه أمير لا سجين كما يدعى، أنتمنته على إدارة أعمالها.. أستنزفها بالأعيب يجيدها مثله ببراعة، يوماً بعد يوم لمع أسمه بين مشاهير رجال القانون، ويوماً بعد يوم خفت وهج حبه، هالها تعليقه اللفظ لأول مرة على كبر أنفها.. إنتقاده لقصر قامتها، تدرك إنها ليست بالجميلة ولكنها أيضاً ليست بالدميعة لينعتها بالغراب، لم تستطع البوح فلا قبل لها بمواجهة شلالات اللوم، وأخيراً أنتهى دورها وحيدة فى شقة صغيرة هى كل ما تبقى لها.

أنترعتها دقائق الباب من شرودها، هبت واقفة لترى القادم، أدارت المقبض، فتحت لتجد فتى صغير لا يتجاوز الثامنة يحمل

لفافة ملابسها وقد تم كيها، تناولتها ووضعتها جانبا، سحبت الدرج وألتقطت ورقتين نقديتينناولتهما للفتى قائلة" ده الحساب ودى تجيب بيها حاجة حلوة"، تهلل وجهه بالفرح إذ كانت الورقة ذات فئة كبيرة ربما لم يحظى بمثلها منذ أن وطأت قدماه الدنيا، أغلقت الباب وقد أنتقلت إليها عدوى الفرح، داعبت لوحة المفاتيح كما لو كانت بيانو لتكتب" حقاً الصدقة لا تطفئ غضب الرب وحده بل تمتد لتطفئ غضب العبد أيضاً".

القسوة الأمرُ على الإطلاق.. تلك التي يمنحها لنا من نحسبهم
الأحن.

حبر على ورق

لم يكد يمر يوم دون أن أسمعها ترددها "عاوزه تخريبها.. كترى السنتات فيها" فتجيبها عمتى ضاحكة "ليه بس يا ماما.. شايلانا وزاعقه"، فتكمل فلسفتها والتي لا مجال عندها للتشكيك فى صحتها" يا بنتى نص كلامهم نميمة، والنص التانى توقيع وشعلله وتوليع مالبص لبعضهم والغيرة" رحمة الله عليكى جدتى. أصرت والدتى على إصطحابى، حاولت التملص فما أثقل على من تجمعات النساء وخاصة فى العزاء.

- ما بلاش أنا وأهو البركة فيكى
- عيب يا حبيبتي أنتى كبرتى ولازم تراعى الأصول..
- وبعدين هيبقى شكلك إيه إدام رضوى لما تقابلها وأنتى أستكرتتى حتى تروحي تعزيها فى عمها وأنتى عارفه هى كانت بتعتبره مكان أبوها الله يرحمه.. يعنى دى
- تانى مره نتيتم
- الأصول.. أكثر كلمه بتتفصل حسب مزاج الزبون
- وعلشان كده بتجيبلى حساسية.. وعمومًا هأجى معاكى
- وأمرى لله

أكره ملابس الحداد، أحسبها أول الدرج فى سلم النفاق، يليها إستعطاف للدموع وذكر مآثر لا تمت بأية حال للفقيد فى مشهد سينمائى كل أبطاله مصطنعون، ولكنها الأصول!! ما أن وطأت قدمى الردهة الكبيرة حتى هالنى العدد، تعمدت إختيار ركن بعيد رغم ذلك أختزقت أذنى أحاديثهم.. تمتت "رحمة الله عليكى جدتى"، هموا بالإنصراف مجموعة تلو الأخرى، لم يتبقى سوى ووالدتى وأهل البيت.. وهى، ألحوا فى بقائنا فمئذ أنقلنا لسكن آخر لم نلتقى، توقف العرض وتسربت بعض من روح المرح للحديث فسمح بالتهنئة بالزفاف الجديد.

- عامله إيه فى الجواز يا رضوى
- مبسوطه الحمد لله.. بس طاهر هو اللى معكر دمي
- ليه؟ زعلان إنك أنتجوزتى؟
- لا يا ستى ولا فى دماغه.. بس بيقول للهانم يا ماما..
- أكونش مت

وكأنما سرى تيار كهربائى للجالسة بجوارى فراحت تنتفض وتشيح بذراعيها وتصرخ قدر إستطاعتها

- ماما إيه.. دى كبيرها يتقالها يا طنط.. وطنط كتير
- كمان

- والله عندك حق يا أميمة.. هى راحت ولا جت هيا له
مرات أبوه

- مع إحترامى لحضرتك يا طنط أنتى وأبله أميمة.. بس
يا رضوى طاهر مش غلطان.. هو عايش معاها بعد
جوازك واللى أعرفه إنها بتعامله بما يرضى الله فإيه
يمنع من إنه يقدرها ويقولها ماما وبدل الأم تبقوا أمين
- معاملة إيه وأمين إيه.. أنتى لسه صغيره مش فاهمه
حاجة.. أوعى يا رضوى تسيبى إبنك لواحدة غيرك..
كفايه أبوه

- يا أبله ما رضوى كمان مرات أب.. ترضى يعنى
جودى تفضل تعاملها بجفا وكأنها غريبة رغم كل اللى
بتقدمه ليها

بإيماءة من والدتى ألتزمت الصمت فما من كلمات تطفئ نار
امرأة فى مثل وضعها، مشتعلة هى دوماً ما تلبث أن تقترب منها
حتى يلفحك لهيب جحيم تحياه وحدها، مسكينة "أبله أميمة" أندمل
جرح حبها أما كرامتها فلا، لذا راحت تنفث فى رضوى قريح
جرحه. نزل عن دراجته وطلب بعض المشتروات، بدا ابن
التاسعة كقزم هرم.. ربما لم يلحظ وجودى أو ربما تجاهله.

- طاهر.. أزيك عامل إيه؟
- الحمد لله بخير
- أنت مش فاكرنى يا حبيبى
- لا طبعاً.. أبله نورا بنت طنط فوزيه اللى كانت جارة تيته
- جدع يا طاهر.. إيه الإجابة الكاملة دى.. شكك شاطر فى المدرسة
- يعنى.. مش أوى
- مبسوطه إنى شوفتك.. عاوز أى حاجة؟
- لا شكراً يا أبله
- طيب متنساش تسلملى على ماما
- مش هنسى بس موعدكيش يحصل.. وياريت لو شوفتيها حضرتك تبقى تسلملى عليها

قالها وذهب، تراحمت الأفكار فى رأسى حول رضوى، ترى ما الذى منعها رؤية ولدها؟ حتى وإن كان زوجها السابق منعه زيارتها أو الحالى منعها إستضافته فبإمكانها إنتظاره فى طريق عودته من المدرسة.. مؤكد لن يتفرغ أحدهم لمراقبته جيئة وذهاباً. لم يكن جين الفضول النسائى ليسيطر يوماً على.. ولكن نبرة الصبى.. جسده النحيل وروحه الخاوية.. وذاك الفراغ

الممتلئ به عينيه دفعنى للبحث فى التفاصيل بل والزج بأنفى فى أدقها.

- ماما.. هى رضوى أطلقت ليه؟
- مش عادتك يعنى تتدخل فى خصوصيات الناس..
- وبعدين إيه اللي فكرك تسأل بعد سنين
- يمكن علشان جوازها مستمرش أكثر من ست شهور..
- دى حتى مستتنش لما تولد.. فأكيد السبب مش هين
- واللى أنتى بتقوليه دا يعنى كان إكتشاف بالنسبالك..
- مهو أدامك من زمان.. إيه اللي جد قوليلى
- إيه يا ماما شغل المحققين ده.. ما تريحينى ولو عارفه
- السبب قوليلى.. هى يعنى هتكون أكتشفت إنه تاجر
- سلاح ولا يكنش طلع مثلاً قاتل مأجور
- لا الموضوع غير كده خالص.. بس الواحد مش علوز
- يظلم حد خصوصاً وإنى سمعت من طرف واحد
- والله ما حد مظلوم إلا طاهر.. دأنا من ساعة ما قابلته
- الصبح وأنا موجوعة أوى
- اه.. بقى هى الحكاية كده.. وأنا أقول مش دى نورا
- بنتى اللي جايه تقرر فيا وأجيلها من هنا تجيلى من
- هنا.. طول عمرك حنينه يا حبيبتي

- طيب كويس أوى إنى صعبت عليكى.. أحكى بقى
- بصى يا ستى عالى سمعته من مامتها إن طليقها كان
بيحب واحدة وأنقدملها بدل المرة تلاته بس أبوها
رفضه، وعلشان يرتاح من الزن بتاع بنته ويقفل الباب
خالص فى وشهم جوزها لواحد قريبهم جيبه مليون قدر
حلاوة بنته، أصلهم بيقولوا إنها تحل من على حبل
المشقة

- وهى بقى لما عرفت إنه كان هيموت على غيرها
الغيرة أكلتها ومقدرتش تكمل معاه
- إيه الخيال التعبان ده.. يا بنتى دا لو كل واحدة دورت
ورا جوزها هتلاقيه حب قبلها عشرة عالأقل، بس أهو
كلنا بنكبر علشان نعيش.. طيب أنتى عارفه سمر بنت
طنطك كريمة

- مالها هى كمان؟
- باباها سماها على اسم خطيبته الأولى علشان اسمها
يفضل يجرى طول العمر على لسانه.. ومراته عملت
عبيطه وأهى ريحت الزبون والمركب مشيت
- بس دا صعب أوى

- الأصبغ النقار الى اخرته الخراب وعيال زى طاهر
موجوعين وواجعين
- نرجع لموضوعنا.. مش عارفه ليه حاساكى عاوزه
تتوهينى وتخلعى مالإجابة
- اه.. بصراحة خايفه مالحساب والعذاب لا يبقى قذف
محصات وأرواح النار علشان الفضول اللى هبط فجأة
على سيادتك
- هى فيها قذف محصات!! مش هسيبك
- يعنى مبقاش ليكى بس فى الفضول لا دا كمان فى
الذنوب.. يا خسارة تربيتى ليكى
- يا ماما بقى دا تلاقى مصر كلها عندها خبر بس أنا
اللى طول عمرى فى شرنقه لوحدى.. أنجزى ذلتينى
- قالتلى إن حتى بعد ما كل واحد فيهم أتجوز لسه
برضه على علاقة ببعض.. وطبعاً ربنا اللى يعلم دا
صدق ولا افترى علشان يعنى تبرأ بنتها وتطلعها
ضحية
- يعنى علاقة علاقة ولا الأوفرة اللى متعودينها
- بيقولوا علاقة علاقة
- طيب وهى عرفت إزاي؟

- والله بقى دا لا هى قالتھولى ولا أنا سألتها عليه
- طيب أدينى عقلك..
- لا أنا هديكى الطرشه علشان أنتى صدعتينى.. دا ما كاتش مقابله.. مالمتهدلين ياما بس احنا اللى أتعمينا وبقت قلوبنا حجر
- أيوه أنا بقى عاوزه أوصل للقلوب الحجر.. وإيه اللى يحجر قلب أم على ولدها.. مهى كملت حياتها ودا حقها مش عيب ولا حرام.. بس الغريب إنها مستعياها ليه.. محرماها عليه
- العند يا بنتى لما بيدخل بين اتنين بيبقى كل همهم يكيلوا لبعض.. بيتغذوا على عكنة المزاج زيهم زى البتوع دول الفانبير اللى حياتهم فى موت غيرهم
- إيه العمق ده يا ماما.. دا الأمريكانى عمل معاكى شغل على
- لا يا بنتى مش الأمريكانى دا العاهات اللى عكرت أصفى علاقات.. شفتى أميمة والغل اللى كان بينط من كلامها
- بس يا ماما هى معذورة.. بعد ما شقيت مع جوزها عمر بحاله وحطت القرش عالقرش تيجى واحدة من

دور بناتها نقش كل حاجة.. تقعد فى بيتها وتركب عربيتها وتصرف فلوسها.. مهو شئ برضه يطير عقل أجدعها ست ولا حتى إن كان راجل برضه هيجن لو حد نصب عليه فى عمره

- بس ما كانش واجب تتفرغ لشحن العيال على أبوهم..

دول يطيقوا العمى ولا يطيقهوش.. صحيح هو غلط فى حق أمهم بس هما جوا نن عينيه.. وبرضه الله وأعلم

بالببوت وهى مقفوله على إيه

- أنتى جايه معاه أوى كده ليه؟

- مش جايه معاه ولا زفت.. بس مش عاوزه حد يجى

عالى مالهمش ذنب ولا دخل فى حاجة.. ليه تروى

زرعه خضره لسه طالعه بميه مسمومه

- عندك حق يا ماما.. وأدى طاهر بيعبوه على مرأة أبوه

رغم إنها مهتمه بيه كأنه ابنها.. الهلكه اللى هو فيها

مش بسببها، دا من الشده اللى هو عايشها.. كله بيوزه

عالكروه.. والكره يطفى مينورش

- ما علشان كده الولاد بيتخبطوا ما بين إحساسهم البرئ

اللى عنده إستعداد يحب ويشوف الحلو وما بين

نصيحة أقرب ناس اللى تعملهم زووم على مشكلة

تتعدا لو النية صافيه لله، وهوب النملة تبقى فيل
وزلومته تنزل فيهم تلطيش شمال ويمين

- طيب تفتكرى ليه رضوى مش بتشوف طاهر بانتظام؟

- جالها هوسهس.. محوطه على جوزها ليل ونهار..

مراقباه ولا أجدعها ظابط مباحث

- ليه بتحبه لدرجاتى؟

- حب ايه!! مش بقولك خيالك تعبان.. هى بس عاوزه

تسد أى منفذ ممكن يخليها تشيل لقب مطلقة تانى..

وفى وسط المعركة اللى جواها نسيت طاهر وبقي

اسمها فى شهادة ميلاده مش أكثر من حبر على

ورق.. بس طبعاً منسييتش اللى جابه.. فعلى اد ما

تقدر بتفكره إنه وإنه وإنه

- أنا كده فهمت

- فهمتى ايه؟

- فهمت إن شرنقتى جنة وعمرى ما هفكر أخرج منها

لدينيتكم تانى

وعند الشدائد نرتدى عباءة تليق بيها.. والتي غالباً ما تبلى فور
زوالها..

أو على أحسن تقدير حتماً ستخضع للتعديل.

دستور سبع نجوم

تحسبه الأوسم.. الأذكى.. الأخف ظلاً.. ليس فقط بين أقرانه بل من بين البشر أجمعين، ترددها متباهية "هو أنا سميته كامل من قليل.. جيب مليون وشكل ميفوقوش فى جماله إلا النبى يوسف عليه السلام".

تطلق لأحلامها العنان، سيتزوج فتاة أشبه بالأميرات، سنوهوايت الألفية الثانية أو ربما سندريلاتها.. ولكن ما الذى سيجذبه لفقره والثريات من حوله يتبارين فى إستمالته والإستحواذ على قلبه.

صادفتها فى عرس إبنة صديقتها، فى حسن لا يختلف عليه إثنان وفستان أبرز من مفاتنها ما أثار الإستهجان خطفت الأنظار.

- شاكى.. تبقى مين البرنسيس؟
- معقول متعرفيهاش.. عمرك ما شوفتيها.. أنتى متأكدة إنك عايشه معانا على نفس الكوكب.
- ليه دا كله.. منى زكى مثلاً.. مفكرش دى عيون خضرا وشعر دهب.
- ولا منى زكى ولا حتى هند صبرى دى هنا البدرى..
- ليها برنامج كارثة من بتوع التوك شو.. تقليعة اليومين

- دول وبتجيب ضيوف واو.. ولا الفضايح اللي فى كل
- حلقة.. تتر النهاية ينزل من هنا والفيس يشعلل من هنا.
- مانتى عارفه ماليش فى جو الفيس وكده.
- مفهوم مفهوم "Old Fashion" بقى.
- ماشى يا "Last Version" يا مواظبه عال — Update
- بس أنتى مركزة معاها ليه كده؟
- مالكل مركز.. هو أنا بس.
- الصراحة.. معاكى حق
- والبدرى دا بقى يطلع مين؟
- بدرى مين؟
- أبوها
- لا تعاليلي هنا.. تركزى فيها نقول مزه.. تركزى فى
- أبوها يبقى اللي بفكر فيه..
- خلصينى.. تعرفيه ولا
- أعرفه.. أعرفه... ولا نجوم السينما
- أفهم من كده إنه سليم باشا البدرى
- يا قديمة.. خلص جو ليالى الحلمية دا من زمان.. بس
- أقولك هو برضة باشا.. كان لواء ودلوقتى عالمعاش
- حلو.. مال وجمال وجاه.

- فضايح ولبس عريان ووش مكشوف ما تكملی.
- أنا برضة اللي قديمة ولا أنتی.. دی نجمة یا بنتی یعنی لازم تتابع الموضة فی كل حاجة.. فی اللي بتلبسه واللی بتقدمه.. یا رینك یا كامل كنت معايا..
- كامل مش هيعجبه الحال ده أبداً.. مش عارفة إزای ابنك ومش قادرة تفهمیه ولا تتوقعیه.
- ميعجبوش. وهو هيعوز إيه أكثر من كدة
- هو عاوز حاجة غير كدة خالص ولعلمك بقى النجمة بتبان منورة من بعيد.. الوضع عن قرب بتتغير كثير

أنطلقت تجمع ما أمكن من معلومات حول نجمتها التي وجدت فيها ضالتها، فكمال رجل أعمال حقق من النجاح ما يدعو للفخر، خصوصاً إذا ما قُورن بسنه الصغير وتاريخه القصير فى عالم "البيزنس"، فقد ينقصه الشهرة والأضواء وهو ما يحظى به كل من أرتبط أسمه بالشاشة، "هنا البدرى" تلك التي أصبحت الأميرة والساحرة فى آن واحد.

- یعنی یا كامل لیا ثلاث أيام مش عارفة أئلم عليك.. لا برة البيت لا نايم.. انت لازمك ست تتظملك حياتك

- هاتى ما عندك يا ماما... إيه الجديد، باربى المرة دى وقعتى عليها فى بارتى ولا فى ديفيلية.
- ذكى يا حبيبى ولماح.. بس حاجة ميتقالهاش لا، مفيش عين إلا وركزت معاها فى الفرحة.. طب دا العروسة صعبت عليا والله ما خدت بالى هى كانت لابسه إيه.
- تلاقيها بس كانت مخففة حبتين ثلاثة.. والتركيز ماكانش إعجاب دا مش أكثر من تحرش بمباركة الأنثى ذات نفسها وتباهيها كمان
- ما كل البنات كدة
- لا بلاش حكاية كل دى.. لسه فيه اللي بتصون جسمها مش تتاجر بيه
- فين المتاجرة يا ابنى.. دى عروسة من بيت محترم مش بيت دعارة.. إدينى فرصة بس أشرحلك وانت هتبوس إيدى أجرى أخطبها لك النهاردة قبل بكرة
- أنا هبوس ايدك ورجلك كمان بس تشيلينى من دماغك
- أهو دة المستحيل.. أسيبك أنا وتطمع فيك واحدة متسواش، وأنا كنت أموتها قبل ما تموتنى مقهورة

- يا أمى أنا نفسى أسألك سؤال من زمان .. هو أنتى إزاي بتحكمى على البنّت إنها بنت ناس أو متسواش .. وإنك تموتى عليها أو تموتى بيها.
- لما يجتمع فيها الثلاثى الشهير .. المال والجاه والجمال
- مبدئياً أنا الثلاثى الشهير بتاعى التطعيم بتاع العيال ..
- وطبعاً مش قصدى بتاعك مالوش قيمة بس أنا أقدر أديهاها .. تشيل أسمى ودا جاهها .. تعيش بإمكانياتى ودا مالها .. والجمال دا حاجة ترجع لقلبى هيشوفها ويحسها ولا هينفر منها .. الحاجة الوحيدة اللى من عندها طبعها .. مهى مش جهاز هعمله فورمات واستبه من جديد عالكيف والمزاج
- كامل أنت فيه واحدة فى حياتك
- آه
- عينيك بتقول إنها من النوع اللى هموت بيها
- خدى فرصة يا أمى وشوفها
- طيب ما تدي الفرصة دى لنفسك وتشوف هنا البدرى
- أنا شوفت خلاص
- هو أنت فاكّر إنها مستتيك ولا أهلها ما هيصدقوا يا ابنى دى نجمة يعنى حوالها ميات

- أول مرة تشوفى إن ليا منافسين ما طول عمرك حطانى
فوق الكل

- مالننتيجة انك عاوز تحطنى تحت الكل

- أنسى موضوع"هنا" وكل اللى شبهها أنا لقيت اللى هكمل
معاها حياتى

- دا بعدك مش لازم علشان تكمل حياتك تقصف حياتى أنا

- نأجل الكلام لبعدين

- ببعدين قبلين مش هرضى بأقل ماللى عشت أحلمك بيه
واللى يليق ليك

جالساً هو فى مكتبه يلوم نفسه، أعجل بالمواجهة أم كان من
الأفضل لو مهد لها قليلاً؟.. لن يتغير شئ فما ينتويه سينذر
بحرب تسخر لها والدته كل أسلحتها، ستخوض معركة
بقائها حتى النهاية

- مش هتحكيلى الحلقة الجديدة

- حلقة إيه؟

- "مطلوب عروسة" مش فيه وجه جديد برضه

- وعرفتى منين سيادتك؟

- خبطت عالباب ودخلت وقعدت وحضرتك فى دنيا تانية.. باصص للنيل وسرحان فيه
- وانتى الصادقة غرقان فيه
- تبقى عملتها يا مجنون؟
- قولتها خبط لزق كدة.. "آه فى واحدة فى حياتى" مهو كان لازم أحط اخر للموضوع يا لبنى
- سألتك مين؟
- هى الصدمة خلتها تسأل.. كانت مشغولة بالتهديد والوعيد والذى منه.. فى الغالب هتقتلك.. أنا عارف أمى كويس متقولش كلمة وترجع فيها أبدًا
- دافع عنى شوية يا أختى.. هى متخيلة إنك عاوز ترتبط بواحدة مالشارع علشان بس مش مطابقة للمواصفات القياسية بناعتها
- دا عمر يا لبنى خليكى مؤمنة وأرضى بنصيبك وأنا وعد منى مش هنسأكى أبدًا وأول بنوتة هخلفها هتبقى على أسمك
- لا أصيل والله.. ممكن نتكلم جد شوية بقى
- نقنع أمى دا خيال.. أتخلى عنك دا مستحيل.. حليها يا فكيكة.. مش الاستاذة برضة ماجستير تسويق ومسئولة

الدعاية والإعلان وتقدر تبيع التراب بتمن الماس..

وريني شطارتك بقى

- دا على أساس إنى التراب

- متبقيش حساسة أوى كدة.. خليها يا ستى رملة ملونة لا

وأمى تموت فى الالوان.. والله فكرة.. لينسز بقى

أخضر على هاى لايت أحمر فى أصفر ونبقى حلينا

أول عقدة

- دا حل معمارى رائع طيب ما تدينى فرشاة لاكمه أبيض

بالمرة.. وكفاية هزار بقى

- لا مأنا لا أهرز لا أطرقع.. أختارى

- براحتك وعلى راحتك.. هو أنا مستغنية عنك.. ممكن

مبدئياً ترتب مقابلة ما بينا

- أنتى ليه مستعجلة على قضاكى.. فى الغالب مش

هتسمعك وإن حصل كبيرها هترحب بيكى شريكة فى

شغلى لكن حياتى أنسى

- أنا فعلاً هنسى... أنت صحيح واجهتها بس دة مش

معناه إن عندك شجاعة تدافع عن إختيارك وتتمسك بيه

- لبنى..لبنى

لم تجب نداءه، تركته وذهبت تساورها الشكوك حول صدق مشاعره، أحقاً والدته قاسية متسلطة لهذا الحد أم يبالغ في الأمر، خمس سنوات عمر حبهما، لم تعرفه يوماً ضعيفاً منساقاً لأحد، ولكن لربما يحمل نفس قناعاتها.. المنطق الأزلى "الحب حاجة أما الجواز ليه مقاييس تانية خالص" وفقط يحاول أن يتجمل أمام نفسه.

مرت أيام لم يتجاوز حديثهما شئون العمل، تملصت من كل محاولاته للتطرق لأمر زواجهما، أمنت بأن الكرة صارت في ملعبه، وحده من يختار ما بين لاعب أو متفرج.

خانها قلبها حين خانت الظروف، فبعد أحداث يناير تعثر في سداد أقساط القروض وكذا رواتب عماله، هددوا بالإعتصام فكاد أن يتوقف مصنعه، بدا أبناء طبقته كمن في يوم الحشر "نفسى.. نفسى"، لم يجد سواها.. وحدها لبنى ضحت بإرثها، وديعة تمثل كل ثروتها وكل مشوار عمل أبيها، لم تكن بالكثير ولكنها وكما يقال "نواة سندات الزير" منعته من أن يسكب ما أختزنه على مر سنين، حتى والدته لم تجد ملجأً تحتوى به سوى بيتها، هابت الإقامة وحدها في منزل يحسبه الكثير منجم مباح سلبه ونهبه.

- مین کان یصدق اینی قائمه نایمه فی بیتک.. لا وبأكل
کمان کل یوم من عمایل ایدیکی
- مین کان یصدق أصلاً کل اللی جری.. أنا بس خایفه
تکونی مخصوبه عالقده معایا ومش مبسوطه
- میبقاش قلبک أسود کده یا لبنی.. دا البلد کلها خلعت
توبها القديمة.. إسمعنا أنا اللی هتبت فی قديمه.. أكید
هلبس زیها جدید
- والله أنا خایفه بدل ما تلبس جدید تلبس فی حیطة
- لیه بتقولی کده.. دا الكل ایده فی اید بعضه
- یارتتی أطمئن زی حضرتک کده
- أنا عاوزاکی تطمنی علی حاجة واحدة بس.. أوعی
تفتکری إن کامل کان ممکن يتخلی عنک.. دا عمره ما
عارضنی إلا علشانک.. وقصاد کبری وعندی قالهالی
"إن متجوزتش لبنی مش هتجوز غیرها".. أستغربت
هتکونی مین یعنی.. سألت وعرفت ولما شوفتک ومن
غیر زعل أستغربت أكثر.. قولت دی حتی مالحلوة
مش حلوة.. هو إيه اللی عاجبه فیها!.. إيه اللی یخلیه
یتمسک بیها للدرجاتی!
- یاه.. هو أنا وحشه أوی کده

- لا يا حبيبتي.. مش قصدى.. أنا بس كان ليا دستور
سبع نجوم.. حصرى لسيادتى.. وعلشان أقول عالبننت
حلوه لازم تتطابقه ماده ماده.. وبما إن الدستور القديم
خلاص بح فالجديد أول سطر فيه أصلك الطيب
وجدعنتك

- بس برضه كامل كان سلبي شويه.. يعنى كان ممكن
يتصرف بشكل تانى لو كان بيحبنى اد ما بحبه

- بيحبك أكثر ما بتحبيه.. وهو مش سلبي ولا حتى
ضعيف إدامى.. هو بس عارف إنى ماليش غيره..
عمرى كله اديتهوله بعد وفاة أبوه وهو ابن تسع سنين..
بقى كل حاجه بالنسبالى.. كامل منعه بره بيا مش أى
شئ تانى.. نصيحة يا لبنى متفكريش فى إمبراح..
خليكى فى النهارده.. فى بكره.. فى المستقبل اللى
بيستناكم

أستقرت الأوضاع بعض الشئ أو هكذا تخيلوا، وباركت الثورة
زواجهما بعدما صار الخصم حكماً.. معها لا عليها.

تستطيع العملة أن تحيا بوجهين .. أما الإنسان فلا.

دوبلير

منذ متى وهى تنتظر، ولا أحد يتذكر ولا شئ يتغير، حتى أحمد
وعلى نسيانها كأنما ولدا من العدم لا من رحمها، أتمت عامها
التانى والأربعين فما نال الزمن من ملامحها قدر ما نال من
مشاعرها، أختزل الحزن فصول عمرها لفصل واحد، شتاء دائم
لا شئ فيه سوى السكون، لفها الصمت برداء لم تجرؤ يوماً
على خلعها.. على إيداعه مدفأتها.. فلربما سرى الدفء لجسدها
البارد، تفككت كريات دمها المتجمدة لتبثها الحياة فيعلو صوتها
بالصراخ أو ربما بالغناء.. لا تدرى كيف هو البوح بعد طول
كتمان.

شارفت الشمعة والتى تتوسط الكعكة الصغيرة على الإنتهاء
فسارعت لإطفاءها، يكفيها تلة الدموع المتجمدة حولها، ما عادت
ترغب بالمزيد، تجملت وتعطرت، تركت هاتفها المحمول على
المنضدة، فقط كان يفصلها عنها تلك الورقة الصغيرة، تطل
بطرفها من تحته، أطمأنت لوجود ما يكفيها من مال، ألنقطت
مفاتيح سيارتها، أغلقت الباب على ما مضى وخطت بثبات
للشارع، رمتها زوجة الحارس بنظرة أمتزج فيها القلق

بالفضول فما عهدتها تخرج وحدها فى تلك الساعة المتأخرة
فأسرعت إليها.

- خير يا مدام فيه حاجة؟

- لا مفيش

أنطلقت بسيارتها غير مكترثة لما تتمم به شفيتها، أدارت
الأسطوانة فامتألت رنتها برائحة صوت فيروز، كانت
أغنيتها.. لطالما سمعها معاً ولكنه الواجب.. هذا الذى تستسلم
له قلوبنا ترفع رايتها البيضاء، يتبارى الكل فى التصفيق وتلهج
الألسنة بالمباركة، تخشع أذاننا لهيبة الموقف فلا نكاد نسمع دوى
سقوط أرواحنا إلا همساً، توقفت عند محل للزهور، إنقذت باقة
من ورد البنفسج يتوسطها عصفور الجنة، ذلك الذى ترك نعيمه
مجبوراً لا بطلاً ليهاجر لجحيم البشر، بضعة أيام فقط لينتقل من
مزهريته لسلة المهملات دون رثاء، أشرت هدية.. دقت
الجرس فأستيقظت ذكرياتها، ووقفت بالباب تحمل أشياءها فى
إنتظار أن يفتح لها.

- آمال!!

- أزيك يا ماما وحشتينى أوى

- إيه الحاجات دى؟ وإيه اللى أنتى عامله فى نفسك ده؟

- النهارده عيد ميلادى ومحبتش أكون لوحدى فى يوم زى ده.
- النهارده يوم ما ماتت أمانى
- قصدك النهارده يوم ما ماتت وموتونى معاها، سنين عدت فى حداد ما بينتهيش
- توأمتك نسيتهيا؟
- لا نسيت نفسى مبقيتش عارفاه، علاقتى بيها بقت فى الخفاء، إنما فى العلن أنا هى، فرض أبقى صورة طبق الأصل منها
- أنتى إيه اللى جراك أتجننتى؟
- أتجننت يوم ما رضيت بدور الدوبلير عندك وعند حسن اللى أكيد مقضى سهرته عند أمنية
- بتغيرى من بنته، بنت أختك اللى أتيمت وعمرها ثلاث سنين.. زعلانه إنه بيحاول يعوضها عن فقدان أمها
- وأنا مين يواسينى يعزىنى يعوضنى
- وانتى راح منك إيه نعوضك عنه؟
- راح منى فرحتى، يوم ميلادى بقى ذكرى سنوية، يوم زفافى عالساكت مهمة مقدسة هقوم بيها"بنت أختك

محدث غريب هيربيها"، منكرش إني كنت راضيه بس
الشيله كانت ثقيله وأنتم خلّوتوها أثقل

- أنهى زيطة اللي كنتى عاوزاها وأنهى شيله اللي تقلناها؟
- أمانى كانت دنية حسن وأمنيه محورها، قصة مش
بتملوا من تكرارها، إزاي حسن شاف أمانى، وإزاي من
أول نظرة حبها، وإزاي أختار اسم البنوته يشبه اسمها،
وإزاي وإزاي وإزاي.

- إيه القسوة دى، كنتى عاوزاه لما يتجوزك ينسى أختك!
- لا بس كنت عاوزاه يفتكرنى، ياخذ باله إني موجوده،
كنت أم للتلاته إنما هو بس أب لأمنيه، ولا لازم أحمد
وعلى يتيتموا علشان يحطهم ضمن حساباته
- أحمدي ربنا إنك عايشه

- أوقات بحس يا أمى انكم مستكترين عليا الحياة، كنت
راكبه معاها جنبها.. بس ربنا اختارها، كنت أكثر واحدة
بشتاق ليها، جزء من روى راح معاها.. مع ذلك
عاقبتونى

- ياه دحنا طلعنا وحشين أوى

تركته وذهبت، نادتها لم تجب، هاتفت حسن فردت أمنية،
أنزعجت لنبرة جدتها وسؤالها المباشر عن والدها، غادر حسن

على الفور بعدما سردت له ما حدث فبثته قلقها على ابنتها
الثائرة على غير عاداتها، أسرع للمنزل فلم يجدها، حاول
الاتصال بها فرن هاتفها معلناً وصول بريد تأخر عشرون عاماً
"تركتم أمانى كراهية أما أنا فأترككم طواعية، لن أقول إلى
اللقاء فهذا حلم المشتاقين وما عهدتكم تشناقون إلى".

العين المجردة ترى مرة.. والمجربة ألف مرة.

ربما حان الوقت

التقطت القلم لتخط النهاية، بتوقيع حسدت حروفه على تمردها أعلنت اسما قبولها، راحت تقلب فساتين بلون لا علاقة بينه وبين ما تظنه ينتظرها، ولكنها على كل أمسكت بما حسبته أنسبها، أنشغلت بجمع المساحيق فقد حان وقت إرتداء الأقنعة، كم تمرنت على صنعها بإتقان، ولكن يا ترى مهما بلغت مهارتها فكم سيدوم القناع؟ أنهمكت تعيد تشكيل ملامحها، وبقدر نجاحها فى تجميلها بقدر إخفاقها فى تجميل مشاعرها، بدت كأميرة مصنوعة من شمع لا من لحم ودم، تختر فى دلال وترتفع يدها لترد التحيات. ظهر مازن أكثر وسامة فى يوم العرس، عالرغم من ذلك ظلت عينيه تحمل تلك النظرة الباهته، تذكرت يوم تعارفا فى لقاء عائلى ولم يكن يجمعها شئ سوى الحجرة الجالسين فيها، وفيما عدا ذلك فلكل عالمه. قبل عليها مبتسماً، أمسك بيدها وطبع قبلته عليها، أرتعشت خوفاً لا خجلاً، لذا سرعان ما حررتها لتحتفى بباقة الورود، ولكنها ما كادت تفعل حتى اضطرت للتخلى عنها، عاد مازن ليحتضنها ويبدأ الرقص، رغم ذلك خفتت حرارتها مما منح قناعها الشمعى حياة أطول، أنهى العرض وتحررت ثانية إلا من إطار ذهبي رقيق.

شئنا أم أبينا يأتى النهار، مجبرين نحن على إكمال المشوار،
أيقظها ضوء لا دفء فيه، وحدها مع دموعها، فى حذر أمسكت
بمنديل لتزِيل بقايا القناع، وليبدأ عرض جديد لتلك الكذبة
التاريخية فيما يسمونه بشهر العسل، وكما أتقنت صنع الأقنعة
أتقنت الضغط على آلة التصوير، سجلت يوميات رقدت بسلام
بجانب رفيقاتها من صور الزفاف بين طيات ذاك المغلف
المألوف. توالى أيام باهته تتكرر بطريقة أئوماتيكية، إلى أن أتى
يوم لتتحسس بطنها والذي بدا بحجم أكبر مما اعتادته، لأول مرة
تشعر بالدفء منذ زمن، إنه الغد يبشر بقدومه رغم أنف الجميع،
طوال تسعة أشهر داومت على مصافحته، مراقبة حركة ذاك
النابض الوحيد بجسدها. وحانت ساعة المخاض، سقطت الأقنعة
وبدأ العرض الحقيقى... عرض الحياة، علا الصراخ فأمتدت
يدها لترتبت على القادم الجديد، تلامس بشرته الحريرية وتمسح
شعره النابت بالكاد فهذا فى الحال، تشبسا ببعضهما وكأنما
يدعوان الله ألا يكتب عليهم الفراق مهما صارت الأقدار. أراحته
المساحيق ولتذهب للجحيم فقد أشرق وجهها بقدومه، أمسكت
المحمول لتلتقط سيلفى، بضغطة منها للوحة المفاتيح وجهت
للعالم رسالتها "لا أدفأ من الأمومة لتذيب الشمع لتعيدك من لحم

وادم"، النقطت القلم لتخط البداية، بتوقيع استسلمت حروفه حين أعلنت هي تمردها.

- يا بنتى سيبى آدم شوية.. دا صاحى تشيليه.. نايم فى حضنك وجنبه.. أنتى بتعملى شغل بيتك أمتى وإزاي؟
- معنديش شغله أهم منه
- وأنتى الصادقه معنديش شغله غيره.. من يوم ما شرف وأنت إجازة من شغلك وعادى حقك وحقه بس ياريتك بقى مراعيه بيتك وراجلك إلا الواد الواد.. هو محدش غيرك خلف
- إيه يا ماما.. شايله آدم وزاقيه ليه.. أنتى غيرانه منه يا جميلة
- غيره إيه دأنتى خلتيها خل.. والله لتخربى على نفسك بمخك الممشش ده
- أنتى حد وزك عليا
- ولا حد ولا سبت.. دى حاجة واضحة زى الشمس واللى ميشوفش مالغربال يبقى أعمى
- هو إيه اللى شمس واللى قمر ما كله تمام.. أكل وشرب ونضافة بيت ولا شوية الدلع مستكترينهم على ابنى البكرى.. تحبوا أخذوا قلمين علشان تتبسطوا

- أكل وشرب ونضافة دا لما تكونى مديرة بيت بالأجرة
مش زوجة.. وبعدين يا أختى أقسمى الدلع بينه وبين
أبوه أحسن ما يبقى ابنك البكرى واخر العنقود
- دلع.. أنتى بتقولى دلع.. لمين يا ماما وهو لا فى شغله
لا مع نفسه.. طيب أنا بأشك إن عنده توحده.. ادى
اخرة جواز الصالونات.. هوب فى مفيش تلاقى نفسك
قاعدة ادام المأذون
- وهو فيه أحسن منه جواز.. يدخل البيت من بابه
ونعرفله أهل وكلامه وإتفاقه يبقى مع رجاله.. ولا
عاجبك اللى يدوروا مع بعض سنين والاخر يقولها باى
باى"بصراحة مش حاسك ومقدرش أخدعك وأكمل" اسم
الله عالمعية
- اه.. نسيت إنى بكلم الراعى الرسمى لجواز الصالونات
والعائلات والتشريفات
- كفاية فزلكة.. أنتى مش مقدره النعمة اللى أنتى فيها ولا
دريانه باخرة تصرفاتك الخايبه
- هو أنا مطلوب منى إيه بالظبط.. أجيبله ورد ولا أولعله
سمع
- لا تتفضيله وتولعى فى البيت

- اللي يسمعك يفترك بتتكلّمى عن كاظم وحوش الرومانسية.. دا مازن يا ماما مازن.. يعنى ساعات ادم الماتش مينطقش ولو الدنيا أتهدت ميتحركش خلص.. لا ما خلصى.. أدخلى بقى عالبيوتوب وهدف إيه وبتاع إيه وهوى بقى لما تكرهى حياتك.. إجازة بقى تلاقيه نايم..
- دأنا ساعات بنسى إنه موجود فى البيت
- عندك حق.. أنتى نسيتى إنه موجود.. جايز يوم ما أتجوزتيه مكنيتش تعرفيه كفاية.. خلاص متصغريلش.. مكنيتش تعرفيه خالص.. بس مادام بقى قسمتك ونصيبك يبقى كان لازم تحاولى تعرفيه.. تتحشرى فى كل تفاصيله.. مش يمكن لما تكتشفيه تحبيه
- أكتشفه.. أحبه.. ومن أمتى بقى كان فارق معاكى!!
- من يوم ما بقى أبو ابنك.. آدم يستحق تحاولى علشاناه أو بالأحق أنتى تستحقى تحاولى علشانك.. والله إن ما كان بيحبك ما كان صبر عليكى

مر بخاطرها العديد من زيجات صديقتها، تزوجن بتلك الطريقة التى كانت ترغبها، مع ذلك فما منهن من تتمتع بهدوء عائلى، حتى إن بعضهن وصل بهن الأمر للإنفصال، ربما كانت والدتها محقة ووحدها قد تكون المسؤولة عن حالة الجفاء بينهما، لأول

مرة تدرك تودده إليها وتجاهلها له، عامان ومازالت طاهية ترسب فى أغلب الأحيان، تمتلئ سلتها بفائد هائل من محروق وملتوت وكثير من الأوانى والزجاج المكسور، أما الدولاب فنادرًا ما تركت قطعة على حالها، تدخلها آلتها السحرية وتعمل على إزرارها بعشوائية.. فإذا بمخرجات لا علاقة لها بالمدخلات لا ألوان ولا قياسات، رغم ذلك لم يسمعها تأنيب أو عتاب، أختارت طبيب لمتابعة حملها فكما الشائع سيكون أمهر ومع كون شقيقته طبيبة نسائية محل ثقة لم يعترض فقط ليشعرها بالطمأنينة، حتى اسم طفلها طاو عها فى رغبتها رغم العرف السائد لدى عائلتهم بأن يحمل أول حفيد اسم جده، جهزت حجرة المولود بكل ما أشتته، أبتاعت ما شاءت من ملابس وألعاب.. سرير هزاز وملصقات للجدران، أتهمتها والدتها بالإسراف أما هو فلا، تتابعت عليها المواقف الواحد تلو الآخر، "ربما حان الوقت لتكتشفه.. أو ربما لتحبه" حدثتها نفسها.

نفضت الغبار عن عزيمتها، غيابه لعشرة أيام فى مأمورية عمل قد يسمح لها بإنجاز الكثير، بعناية رتبت مكتبه.. أوراقه.. تركت بصمة نسائية على حجرة مكتبه.. مزهرية.. إطار يحمل صورته حين حصوله على درجة الماجستير.. تلك التى كانت حبيسة لدرج طيلة سبعة أشهر.. أستبدلت أريكته القديمة بأخرى

أكثر أناقة وراحة.. أما حجرتهما فقد حظت بالنصيب الأكبر من التغيير والتدليل وأعلى سريرهما أخيراً "بوستر" زفافهما، عكفت على متابعة برامج الطهى وتجربة ما يروقها من وصفات، أما لأكثر دهشة فهو مشاهدتها مباريات كرة القدم، أبداً لم تتحمس يوماً لفريق.. بل حتى لم تكن لتعرف أسماء اللاعبين ولأياً ينتمون، شيئاً فشيئاً راقتها اللعبة.. تساءلت "لأى الفريقين يميل مازن؟" صدمها جملها بما يحب وبما يكره. فى المرأة بدت مختلفة ككل شئ، قصت شعرها الجديدة ولونه النارى منحها إطلالة مشرقة.. تمنّت لو تمتع القادم بمثله. على عكس المؤلف أحست غيابه رغم يوميات آدم ومتاعبه، فتارة يبكى دون سبب واضح لساعات.. وتارة يمرض فجأة ودون مقدمات.. وتارة يرفض الرضاعة أو أياً من وجبات الأطفال. أخيراً أدار مفتاحه فى الباب، نهبتها تلك الأجراس المعلقة خلفه والتي ترتطم ببعضها حال تحركه عند فتحه، لم يستطع إخفاء دهشته من هيئتها بل ومن هيئة كل شئ، تبددت نظرتة الباهته.. لمعت عينيه بالفرح وبنبرة صوت مداعبة

- دا بيتنا يا افندم

- اه

- احنا جايلنا ضيوف

- لا
- عندنا مناسبة
- لا
- طيب آدم كويس
- اه
- وأنتى كويسه
- اه
- طيب أنا سخن
- ليه؟
- كل ده وبتسألينى ليه!!
- مش كنت مسافر ورجعت
- طيب مآنا ياما سافرت ورجعت
- بس المره دى غير
- غير ليه؟
- علشان مش بس أنت اللى رجعت.. أنا كمان

الجشع كما الجريمة تماماً.. كلاهما لا يفيد.

زوجة ترانزيت

كعادتها تجلس فى المدرج وحدها، فهى لم تحظى بصداقة واحدة حقيقية رغم أنها فى السنة النهائية، فقط الكثير من الزميلات.. الزميلات فقط، بسيطة فى مظهرها كما فى أفكارها فما أرتادت الجامعة إلا لتضيف ورقة تعزز بها ملف زواجها، لذا لم تعر إهتمام لإختيار نوع دراستها قدر إهتمامها بنوع خامات مفروشات زفافها.

أنهكها إرتياد الأسواق على مدار أربعة أعوام، أنفقت كل ما وسعها إدخاره لشراء مستلزمات الجهاز، هذا الذى أبتلع كل ما طالته يدها ولم يكن ليترك قرشاً واحداً لشراء كتاب.

تجولت هند بين القنوات حتى جذبها مشهد رومانسى فتابعته الفيلم بشغف، لطالما تمننت أن تحظى بقصة حب تتوج بالزواج، لم يكن لتعتبره أكثر من حلم، فما عايشته حولها من زيجات كان أشبه بإبرام إتفاق تتعهد فيه الفتاة باداء أغلب الواجبات والتغاضى عن معظم الحقوق وإن بدا غير ذلك.. عملاً بمبدأ واحد ارتضاه الجميع.. أقره وراح ضحيته الكثير "بنت الأصول ترضى وتعمر وتعيش".

شاركتها والدتها المشاهدة حتى إذا ما ظهرت البطلة بالفستان الأبيض تراقص حبيبها على أنغام الموسيقى الحالمة علا صوت والدتها بنبرة معاتبه.

- مش لو كنت أتصحتى شويه كنتى أخرجتى ايد فيها الشهادة وايد فيها العريس بدل القعدة اللى مش شايفلها اخر دى.

- قعدة إيه.. دأنا يا دوب متخرجة من شهرين، ثم عريس إيه اللى كنت أجيبه دول شوية عيال بيأخدوا مصروفهم من أهاليهم، يعنى اخرهم الكام فسحة اللى فى أول الفيلم إنما الرقصة والفستان حلنى بقى أكون أتحلت وانا مستنياهم.

- أنا خايفه الجهاز اللى متكوم جوه تحت السرير وفوق الدولاب هو اللى يتحلل وأنتى مستنيه اللى جيبه مليون واد الجواز.

- جيبه مليون.. انا بس عاوزاه يجيلى اربع حيطان متسقفين، ملك بقى ولا إيجار أهو ايدى بايدى ويمشى الحال.

- هو احنا بتوع إيجار ولا عندنا بنت بتشتغل بعد الجواز.

- يعنى لازم ملك ولازم يستتنى ويغددنى.. ببقى مين فينا
اللى مستتية أبو جيب مليون!!

أرخت هند ستائر النافذة فما من شئ يحثها على إنتظار
الصباح، بات يومها مشاهد تتكرر فى ملل ورتابة، القليل
من الأعمال المنزلية والكثير من المسلسلات وكل هذا
يسير على خلفية دعاء والدتها ليل نهار بإن يرزقها بابن
الحلال، وزاد الأمر سوءاً بزيارة نجلاء جارتها والتي
تصغرها بعامين.

- شوفتى أحلوت إزاي.. الجواز عملها واحدة يتقال بيها
ست بجد.

- مهى طول عمرها حلوة!

- لا بس العز برضه.. اللى ما فى صباع من غير خاتم
ولا العقد والدلايه اللى مغطيه صدرها.. واللبس دا
الشنطه لوحدها تحيب كام ميه.

- يا أمى العز ده مدفوع فاتورته الطاق عشرة، راجل فى
سن أبوها وياريته ليها لوحدها إلا بينزل زيارة كل كام
شهر يقعد أسبوعين تلاته بالكثير وهوب يأخذ الطيارة
وعلى بلده وأم عياله.

- وماله المهم مش مخلى فى نفسها حاجة لا هى ولا أهلها.

- ليه هى منفسهاش تبقى أم؟

- ما تبقى حد حايشها!

- اه حاجات كتير.. أن ما كانش جوزها اللي ميلزموش

عيال ووجع دماغ يبقى هى.. إيه يضمنها إنه يستمر

معاها ميحيش فى مرة يسافر ولا يرجعش تانى ولو

حصل تلبس هى فى مشاكل جنسية وإقامة وهم مالوش

أول من اخر.

- خلاص بلاها يعنى هما اللي خلفوا خدا إيه.

- واللى أتصيغوا واتكسوا واتذوقوا هما بقى اللي أخذوا!

- يا أختى بلاش فلسفة فارغة.. بس يارب أشوفك زيها.

- أنا.. مستحيل.

أصبحت نجلاء حديث والدتها وشغلها الشاغل وأخيراً فاجأتهم

بزيارة غريبة وطلب أغرب.

- أبو عبدالله نزل إجازة من يومين ومعه واحد صاحبه

مقولكيش راكب حطة عربيه يا لهوى، وأول ما طلب

منى أشوفله عروسه قولت الخير دا كله ميروحش غير
لحبيبه ومجاش فى بالى غير هنوده حبيبتي.

بقدر ما بدا الذهول على هند بقدر ما بدا الفرح على والدتها.

- طول عمرك جدعة وتحبى الخير للى منك.

- إيه يا عروسة ساكتة ليه؟

جفت الكلمات فى حلقها.. فكيف لها أن تبدى رأيها فى صراحة
فتهين الفتاة إضافة لتوجسها من ردة فعل والدتها بعدما رأت من
علامات الرضا والإستحسان لديها.

- مكسوفة بقى.. عموماً هنفكر ونرد عليكى إن شاء الله.

- بس والنبي متأخريش عليا فى الرد.. أصله مسافر اخر
الشهر.

أستاذنت وأنصرفت وانفردت بها والدتها فبدت كقط يستعد
لإلتهاام وجبته المفضلة لفأر صغير لا حول له ولا قوة.

- إيه الخرس اللى صابك ده.. هو الفرح لجم لسانك؟

- الفرح.. دا الصدمة.

- صدمه.. دا نصفه.. دا بركة دعايا ليكى.

- هى الصفقه بقت نصفه.. بيعه وشروه مش ممكن أقبل بيها ومفيش حاجة كمان تضطرنى ليها.. أنا بس مرضيتش أقول رأيى لنجلاء فى وقتها علشان مجرحهاش.

- ولا هتقوليهولها أبداً.. وسيبك بقى مالكلام المجعلص اللى لا يودى ولا يجيب.. الشهادة بتاعتك دى ارحص منها مفيش وكمان ولا عادت بتجيب وظيفة ولا بتجيب عريس.. فبلاها بقى النفخة الكدابة.. أنتى تشوفيه وبعدين نتكلم.

- لا مش هأشوفه.. مش هبقى ترانزيت.. هأستى اللى زى وابقى عارفه أصله وفصله.

- بس أنا مش هستنى شحات.. كبيره دبلة ومحبس ويمرملك ويمرطنا معاه.

حددت والدتها موعد للتعارف والذى تحول أمام العطايا والهبات إلى إتفاق وتم الزفاف بأسرع مما أستوعبه عقلها.

أنقضى شهر العسل وسافر خاتم سليمان وعادت الفتاة أدراجها، سارت الحياة بشكل يبدو طبيعى إلى ان دق بابهم بشكل أنخلع له قلبها، فتحت فكانت نجلاء باكية العين منهارة.

- جرى إيه؟
- أبو عبدالله طلقني
- ليه؟
- معرفش.. باتصل بيه مبيردش.. قولت أجيلك تكلمى جوزك يفهم منه الحكاية.. يقوله إني حامل.
- هاتف هند زوجها وما من رد.. عاودت الإتصال تانياً وثالثاً..
وعاشراً ليسقط الهاتف من يدها وتنضم للصف.

إنكار الذات على الدوام..

تتنازل ضمنى عن كافة الحقوق.. إلتزام كامل بكل الواجبات..

وعلى المتضرر اللجوء للقصاص.. من نفسه بالطبع

سبقها إليه

تطوى الواحدة تلو الأخرى، تجذب إليها الكرسى.. تعتليه، تتشبث بالحائط المجاور.. تستند إليه بكل جسمها، ترفع ذراعيها.. تدمهم قدر إستطاعتها ثم ما تلبث أن تضعهم متراسين البعض فوق الآخر، تهبط بسلام.. تجلس على الفراش.. تتعلق عينيها بالخزانة، طالما حملتها فوق طاقتها.. مثلها تماماً، غمرها إحساس بالإرتياح، منذ أيام أكملت الخامسة والأربعين وكذا الثمن المطلوب ليصبح حلمها واقع ملموس.

فى الصيف القادم لن ترى فى حجرتها هذا الجبل القائم، تلك الذى يوشك أن يصطدم بالسقف أو ربما يهوى عليهم إذا ما أتعبه الكم، ستنقل لشقتها الجديدة، سيصبح لكلاً من الإبناء غرفته المستقلة، لن يضطر أحدهم لإستخدام خزانتها بعد أن تصبح له خاصته، ربع قرن إذا ما أبتاعت أبسط شئ أضطرت للحسابات ورفع المقاسات، لذا ستطلق العنان لنفسها، ستهتم بيهو الإستقبال، ستقتنى ما تشاء دون النظر لحجمه وما سيشغله من حيز ومكان، فقريباً سيدق الخطاب بابهم يطلبون مصاهرتهم.

- فرصة يا حسين.. يومين إجازة رسمى من عند ربنا..
نستغلهم بقى وننزل نلف عالشق والحمد لله الفلوس اللي
معانا هتجيلنا اللي يعجبنا وزيادة
- يعنى بدل ما إرتاح أقضيها كعب داير، وبعدين الدنيا
كلها إجازة يعنى إحتمال ميكونوش شغالين
- لا أطمئن شغالين.. القطاع الخاص مالوش فى دلج
الحكومة.. وبعدين عاوزين ننجز بقى دأنا بقالى ثلاث
شهور برتب للنزوله دى وأنت كل مرة تفرکش الليلة
- متسرבעه على إيه.. وبعدين أنا مش هأين عليا أسيب
الشقة اللي فيها كل ذكرياتنا من يوم جوازنا.. العشرة يا
إيتسام.. العشرة
- هو احنا هنولع فيها.. هنقفلها ولا نأجرها لحد ما محمد
يحتاجها وأهى تمشى الحال لعرايس إنما لعيلة تجيب
كرشة نفس.. ولو إنى ميهونش عليا أجوزه فى المدفن
ده بس أهو الموجود بقى
- أحمدي ربنا غيرنا بايت على رصيف
- يا سيدى حمداه وشكراه بس ربنا مقالش نضيق على
روحنا وبايدنا الوسع وكله من كرمه ورزقه
- ماشى ماشى.. هشوف

- لا هو أنت لسه مش شايف الكراكيب اللى مالیه كل شبر فى البيت.. حتى تحت السراير وفوق الدولاب.. يا راجل بناتك كبروا وبكره يجيلهم الخطاب مش نقيمهم بقى بيت كبير يساع نسايب وعزايم وأفراح
- حوش حوش الخطاب اللى مكسرين البيبان.. لا أطمنى البنات اليومين دول بيأخدوا وقتهم بزيادة يعنى لسه بدرى
- هننزل يوم الخميس.. علشان خاطرى يا حسين
- ربنا يسهل

ربما الرجال أقل تقديرًا لأمر تعنى بشدة النساء، فدائمًا ما تشغل المظاهر حيزاً أكبر لديهم، لذا فقد كان دافعها الأول فى الانتقال لسكن أوسع هو هاجر وإسراء، حان الوقت ليستقلاً بغرفة تتسع لحريتهم، ليسترحن من صخب محمد وصوت ألعابه الصادر من حاسوبه ليل نهار، اثنا عشر عاماً ومنذ رزقها الله بالولد وهى تدخر لهذا السكن، حرمت نفسها دون أسرتها، حتى مصاغ زواجها ضمته أخيراً للمبلغ لتضمن حصولها على ما يقر عينها، أودعه حسين بالمصرف فمن يأمن أن يحتفظ بكل ما يملك من مال فى منزل تكاد نوافذه أن تلامس سطح رصيف الشارع، أيام وينضم مفتاح جديد لميداليتها، ستغلق الباب القديم

على كل ما تكتمنه ولم تبج به أبداً، ستفتح باباً جديداً تأمل أن
يخفى خلفه سعادة لها ولأسرتها.

- ما تصحى بقى يا حسين.. خلينا نلحق اليوم من أوله
- نلحقه نعمله إيه يعنى؟
- مش اتفقنا هنروح المشروع اللي عايدة أختى خدت فيه
لإبنها.. بتقول ناس موثوق فيهم والتشطيب حلو أوى..
لا والأهم فيه تسليم فورى
- هههه.. فورى دا كروت شحن
- يا رايق ودا وقت هزار.. قوم بقى وأنجز
- مش هقوم يا إيتسام.. وعلشان ده مش وقت الهزار أنا
هأقولك الجد
- فى إيه يا حسين؟؟.. نبرة صوتك متريش
- مالاخر أنا فعلاً أشتريت خلاص الشقة
- وماله.. مهو كده كده مش هنشتري إلا اللي على
مزاجك.. دأنت حتى ريحتنى ماللف وأروح بقى أشوفها
عالجاهز ولا الهانم
- الشقة مش ليكم.. دى ليا أنا ومروءة
- مروءة!!.. مين مروءة؟
- مراتى

أستيقظ الجميع على الصراخ الذى ما لبث أن أختفى، سقطت
إبتسام مغشياً عليها وسط فزع الأبناء وأب لا يجيبهم سوى
بالصمت، حملها للفراش حتى إذا ما أفاقت خرج مسرعاً ليترك
الكل فريسة للتساؤلات، كثيراً ما عاشوا خلافات لوالديهم ولكن
أبداً لم تخرج عن تلك المألوف لأى زوجين.

قضت يومها دون طعام وشراب.. دون حوار، بإشارة من يدها
رفضت إستدعاء الطبيب، أما هو فلم يظهر سوى فى الصباح
التالى.

- أحسن النهارده
- أتجوزت ليه؟
- حرام
- اه حرام
- فى شرع مين
- فى شرع شقايا وتعبى وعمرى وشبابى وصحتى الللى
اديتهم ليك
- كلام الحريم اللاسعه الللى بلاونا بيهم فى التلفزيون..
أنتى بتشوفى بتوع حقى ورأسى برأسك وزى زيك من
ورايا يا إبتسام؟

- لا ما كانش عندى وقت أشوفهم لا هما ولا غيرهم..
- وقتي كله كنت بأشوف طلباتك أنت وبيتك وعيالك
- زيك زى بقية الحريم
- صحيح.. بس أنت اللى مش زيك زى بقية الرجاله
- لا طولة لسان مش هسمح
- دى مش طولة لسان.. دى طولة حرمان
- حرمان إيه إن شاء الله.. إياك مصومك أنا
- معلوم مصومنى.. عن الكلمة الحلوة والهدية الحلوة
- والفسحة الحلوة.. وأنا القرش عالقش والجنيه
- عالجنيه.. دهى وفلوس تسوية معاشى كله كله بدل ما
- توسع بيه علينا وتجهز بناتك وتجوزهم تروح تتجوز
- بيهم أنت
- والله مأنتى فاهمه حاجة.. ناقصين عقل بصحيح
- لا وحياتك عادمين عقل.. لما ندى كل حاجة للى
- ميستاهلش أى حاجة
- أهدى بقى وأسمعيني لا تكونى فاكره إنى رocht جبت
- عيله من دور بناتى وأتجوزتها.. لا دأنتى لو عرفتى
- ظروفها هتدعيلى

- مش عاوزه أعرف ظروف حد.. كفاية عليا عارفه
ظروفي
- إزاي دى هتبقى أختك الصغيرة وعيالها أخوات عيالك..
يعنى هنبقى عيلة واحدة
- يا خيبتك يا إبتسام.. كان ناقصك واحدة بعيالها كمان..
أنتى عاوز تنقطنى
- بعد الشر عنك.. طيب دى بتحبك أوى من كتر ما
كلمتها عنك
- بتحبني.. طيب إزاي!! دأنا نفسى מבبش نفسي..
بأكرها وإلا مكنتش عملت فيها كده
- طيب قومي كده وبصى فى المرايه.. وربنا قمر أحلى
وأصبي من بناتك حتى وأنت تعبانة وزعلانه.. دا مروه
تبان أمك ومتجيش فى الحلاوة ربعك بس يتيمه
ووحداية وليها خمسة وتلاتين سنه ولسه مدخلتش دنيا
- قولت بقى تضرب عصفورين بحجر واحد.. تتجوزها
وأهو منه تدخلها هى الدنيا وتدخلنى أنا التربة
- لازمته إيه الكلام ده.. والله ما فى حاجة هتتغير
- يعنى هيفضل النكد مستمر بس اللي هيجد عليا وجود
الست

- نكد.. هو أنا أقدر أزعلك برضه.. وبعدين فكرى بقلبك الطيب ده.. أفكرى وأنتى أصغر منها بعشر سنين كان ليكى بيت وراجل وعيال وعائشه حياتك.. سيبها تأخذ نصيها هى كمان.. متبقش زى الستات اللى ماليهم الأنانية.. كل واحدة متبته فى راجلها مش عاوزاه إلا ليها وبس وسايه غيرها للوحدة.. حسوا ببعض شوية
- وأنا مين يحس بيا.. وبعدين هو نصيها دا عندى أنا بالذات.. يا لهوى.. أنا عاوزة فلوسى
- قولى كده بقى.. عاوزة فلوسك مش عاوزانى.. دا اللى فارق معاكى
- أنت غدرت بيا وخونتتى يا حسين.. أتجوزت من ورايا ويا عالم لىك اد إيه مستغفلى.. بس على جتتى تقعدها فى شقتى.. دى حقى وحق عيالى
- وأنا منكرتش.. وده دين فى رقبتى وهسده لما ربنا يقدرنى
- نعم دأنت من يوم عشرين فى الشهر بتقول محدش يجيبلى سيرة فلوس.. يبقى هتسد أمتى.. بعد أما أموت
- فلقتنى بقى.. أجيلك كده تجبلى كده.. والله دا اللى عندى واللى تقدرى تعمله أعمله

- هدى عليك يا حسين.. دينك يتسد من صحتك وعافيتك

أتى الشتاء مبكراً فتخلت الخزانة عن حملها.. أما هي فلا، باتت تلازم الفراش أغلب الوقت، فقط تغادره للضرورات، فى غيابه حاول الكل مواساتها، ولكن ذاكرتها المكسدة بتاريخ حافل بالتنازلات أثبت أن تصفح.. أن تغفر وتسمح لها بخيانة نفسها.. وبل وإهانتها أيضاً، ليت بإمكانها أن تعيد الكرة، فلربما عاشت حياتها كما ينبغي، أدرجت نفسها ضمن قائمة الأولويات لا المهملات، كم تشعر بالغباء.. فما أدخرت إلا لخائن وغائبة.

هاتفها رقم مجهول، إجابته دون تردد فما عاد هناك ما تهاب

- مدام إيتسام

- اه.. مين حضرتك؟

- مروه

- إيه؟.. مين؟

- حسين فى المستشفى وياريت تيجيله

- وأجيله ليه مالبركة فيكى

- لا أنا ماشيه.. ومش عاوزه منه حاجة، كل واحد بس

يروح لحاله فى هدوء ويبقى كتر خير.

- تروحوا تيجوا وأنا داخلى إيه

- أنت مراته والأولى بيه.. مش أم عياله وعشرة عمره
- تصدقى إكتشاف
- أرجوكى متأخريش.. الوضع ميتحملش

أعتادت فى السنوات الأخيرة تعرضه لأزمات صحية كثيرة، كانت ممرضته أكثر منها زوجته، تعتنى بغذائه ودواءه، تلازم حجرته طيلة ملازمته للفراش ومن ثم تترك إدارة المنزل لبناتها، أبداً لم تشكو.. وأبداً لم يشكر، فكرت أن تغفل المكالمات، تعتبرها لم تكن فما عاد بقدرتها تقديم المزيد.

مرت دقائق ثقيلة لدغها عقربها فأيقظ لديها رغبة شديدة فى رؤيته، مريض.. طريح الفراش.. شهيد إنسانيته الذكورية المزيفة، تلك التى تمنحه الحق فى مساندة أى فتاة فقط بالزواج منها، تقديم مستقبل أسرته قربان لنيل رضائها، لم يكن مؤهلاً للزواج بأخرى ولكنها العنجه والمكابرة، وها هو يدفع ثمنها.

أرتدت ذاك الطاقم الذى أبتاعته مؤخراً، هذا الذى أعدته لساعة إستقبال حلمها، والذى ما لبث أن أكتمل وحانت ساعة مخاضه حتى وأده هو فى الحال بلا رحمة منه أو شفقة، وها هى الفرصة تواتيها لترد له الصاع، لن تعميها تلك المعانى.. العفو.. الأصل.. فما أبتدعوها إلا لتكون حكراً على النساء، أما الرجال

فلا يضيرهم سوى جيوبهم.. وحتى هذه أقتسمت مؤخراً فيما بينهم.

فى طريقها للمشفى داعبتها شهوة الإنتقام، تلاعبت بخيالاتها، تصورته ملقى ذليلاً وحيداً، غدرت به دميته الجديدة سريعاً، لم تتحمل مرضه أو ربما قبلاً طبعه، لن يرى منها سوى الشماته، ستضحى نظرة التشفى سكين بارد يطعنه مستهزأً بالآمه.

أخيراً وصلت وأستقبلتها مروة بعد أن تعرفا لبعض عن طريق الهاتف، سألتها فى لهفة إصطحابها لغرفته، أجابتها دموعها.. من الأولى أن ينهوا الإجراءات سريعاً إكراماً له فقد سبقها الموت إليه.

قلب المحب يتسع للجميع.. أمّا الحاقـد فقط للجـحيم.

شركاء العرش

شارد أنت منذ الأمس، تهرب منى عيناك، تخاف أن ألمح فيهما
فرح طالما أنتظرته، أشتم رائحة إشتياق تستميت فى اخفائه
ورغم ذلك يزكم أنفى، خانتك موهبتك فى فن المونتاج، لأول
مرة تضيع منك الأحرف، تهرب من شفتيك الكلمات، تنضب
أفكارك، تفشل فى إحكام أقاصيصك، يصدأ مقصك فيكيف عن
الحذف هنا وهناك، وها نحن فى المحطة الأخيرة ورغم ذلك
تصم أذنيك عن سماع صافرة النهاية، لا مفر من المواجهة..
فأنا وأنت أمام الحقيقة أقزام.. لا نملك سوى الإذعان..
الإستسلام.. الإعتراف بملأ إرادتنا.

تظننى غاضبة.. تفترسنى الغيرة.. يأكل الحقد قلبى، فأنا
المحرومة من حق طبيعى يتمتع به أغلب من هن من جنسى،
تدور حوله أحاديثهن.. يسهين.. يلعن.. يسبن.. ويتمنين المزيد،
سحر من نوع خاص يصيبهن مع أول نبضة لنطفة صغيرة
تتحرك فى الأرحام، سحر لا شفاء منه ولا براء، كثيراً ما
رغبت فى الصراخ "أصمتن فيكيفينى ما بى من جراح".. ولكنى
فقط أرغب فقط أهرب، أنصرف متحججة بموعد مع الطبيب..

صداع مفاجئ ألم بى، بل إننى أفتعل أحياناً مكالمه تستدعى
الذهاب على الفور.

فى كهفى البارد أتدثر بألامى، تبدو ملامح الماضى واضحة
رغم غمامة الدموع، تتساقط لتروى أوراق أحتضنها، أوراق
سُطرت فيها معاناة خمسة عشر عاماً من الكعب الداير، لم أترك
باباً إلا وطرقته ولا علاجاً إلا وجربته، يزهر الأمل ثم ما يلبث
أن يذبل قبل الأوان فما قُدر لى حصد الثمار، أنتظر من يرسل
لى دلواً.. أنتظره حتى وإن شرونى بعده بثمن بخس، يرادونى
الإعلان عن نفسى، أعرض.. أتمنع.. ثم ما ألبث أن أهم بجمع
بقايا أحلامى.. جل مدخراتى، وأعيد الكرة لأسقط فى البئر كما
فى كل مرة.

لا دلو بعد الأربعين.. ذهبوا السيارة بعدما جف نبعى.. وذهبت
أنت لتبحث عن غد، ساعتها صرخت.. ثورت.. بكيت.. ولكنك
ذهبت، رضخت.. هدئت.. أستسلمت.

مر عام فما وجدت منك سوى مزيد من الحب.. الحنان..
الإهتمام، رجلى أنت الوحيد، حتى ولو شاركنى فيك نساء
الأرض، فما لأحد من سلطان على قلبك غيرى، وحده هو
سيعتلى عرشه معى.. وحده من يحمل ملامحك.. قسماتك.. لون

بشركك.. وحده من يقولون إنه يشبهك.. وأنا أحبك وأحب من يشبهك.

بيد حانية تدير رأسه نحوها.. تلتقى عيناها

- حسن.. نفسى أشوف مصطفى
- بجد.. حقيقى.. يعنى عاوزة تشوفيه
- أكيد.. إيه الغريب فى كده!
- يعنى.. برضه
- أفهم إيه من ردك.. اللي ما قولت جملة واحدة مفيدة
- وأنا خايف أتكلم تفهمينى غلط وتزعلنى
- لا يا سيدى.. كله النهارده مقبول منك.. ميهونش عليا
- أزعلك فى عز فرحك
- يعنى أمان
- فى إيه بقى.. أكنشى بوتاجاز خايف لا يهيب فيك.. أيوه
- يا سيدى أمان.. هفصل نفسى كده من نفسى لو أوفرة
- طب مالأحسن نشيل الكبريت من وش الغاز بدل ما تولع
- ياريت كان ينفع.. بس اللي جرى جرى وعليك بقى
- بطفاية الحريق.. قايم نايم بيها وخير إن شاء الله
- أهو مش قولتلك هتولع

- لا دا إحتياطى بس.. وبعدين مادام مصطفى منك يبقى واجب يكونلى فيه
- حبيبتي من غير زعل.. مهى مامته ممكن يكونلها رأى تانى
- يعنى إيه.. هتخاف عليه منى.. أمنا الغوله أنا وهأكله مثلاً
- لا بس لازم أمهلها.. ثم أنتى اللى من أول جوازنا ورافضه يكونلك أى صلة بيها رغم إنها حاولت بس الصد كان من عندك
- وحشه أنا.. تقربلى أبعد عنها.. لا والله المفروض تقاسمنى فى جوزى فأخذها بالحضن
- هو لا تأخديها بالحضن لا تأخديها على صدرك.. دأنتى حتى لما كنتى تقابلها صدفة فى مناسبة وتسلم عليكى تستكترى تردى السلام وتتجاهلها
- غلطانه.. فكرنى أبعثها جواب شكر لرقتها وحنيتها الزائدة مش بس على جوزى لا دا عليا أنا كمان
- شوفتى هتزعلى.. خلى بقى كل واحد فى حاله.. أنا مش اد شجار ونقار

- أنت بتتلكك.. لأجل عيون المولود أنا هبدأ صفحة جديدة.. هزورها وأباركلها وكمان هأخذلها هدية عليها القيمة
- طول عمرك كبيرة
- نعم؟؟
- كبيرة بتصرفاتك.. وماشى أتفقنا هقولها وأرد عليكى
- هو أنت هتستأذن علشان تروح بيتك!!
- لا طبعاً.. قومي ألبسى ونطب عليها.. خلىنا نظبطها متلبسة محتاسه لوحدها بالواد شعرها منكوش وبيتها مقلوب.. يعجبك كده!!
- معلش.. فانت عليا دى.. قولها بس إياك محن النسوان ميشتغلش وتقولك تعبانة.. لما أمسك نفسى.. خليها عالسبوع
- لا وعلى إيه هكلمها دلوقتى وأقولها جاين بالليل.. بس أمانة عليكى تراجعى نفسك قبل ما أتدبس
- الله يا حسن.. هو أنا عيله.. أنا عاوزه أشوف مصطفى طيب وبالنسبة لأمه؟
- اسمها ولأء.. ولا أنت هتستحلاها.. أم الواد.. أم الواد
- هكلمها والله الأمر من قبل ومن بعد

- حسن.. حسن
- نعم
- أمانة عليك متكلمهاش وأنت قاعد جنبى
- عوض عليا يارب

عجزت مشيرة عن تفسير مشاعرها المتضاربة، رغبتها الشديدة فى رؤية مصطفى، فى خلق علاقة قوية بينهما، رضاها عن حسن وإلتماسها جل الأعذار له، حنقها على زوجته، قلقها من ان يصبح وليدها بداية إهمال زوجها لها، إنسحابه من حياتها شيئاً فشيئاً.

فى غرفتها تستعد للزيارة، تحاول جاهدة تعطيل كل أجهزتها الدفاعية، تسأل الله أن تمر الليلة بسلام، أن تنزل سكينته على قلبها، تنزعه غيرة النساء، تودعه حب الوليد، حب لا يشوبه شئ مما يعتمل فى قلوب البشر.. شئ يدعونه المصلحة وما شابهها.

شعرت بثقل مخاوفها وهواجسها فأستندت للحائط وهى تصعد الدرج، بضع دقائق وتضحى فى حضرة غريمتها.. فى أرضها وملعبها.. لتبدأ مباراة أختزل مشاهديها فى شخص واحد، قطعاً سيميل قلبه لمن منحته مراده.. وهل كان ليطلب أكثر من مصطفى، أرتجفت حين دس يده فى جيبه فأخرج المفتاح.

- مش واجب ترن الجرس
- مهى عارفه إنا جاين وكلمتها عالموبايل قبل ما ننزل
ماليبيت
- أتفضلوا.. أتفضلوا.. جيتك على رأسى يا مشيرة..
وربنا دى أكثر زيارة فرحت بيها فى حياتى كلها
- حمدالله على سلامتك يا ولاء ومبروك ما جالك.. يتربى
فى عزك وعز أبوه
- وفى عزك وفى حرك وفى حضنك.. دا مصطفى من
حظه إن ليه بدل الأم أمين

نبرة صوتها الحانية.. قسماات وجهها الهادئة..

إنفعالاتها المترنة.. جعلت كلماتها تنفذ إليها.. تجبرها على
تصديقها وربما على محبتها.. بالكاد أستطاعت إبتلاع دموعها.

لم تكمل عامها الثالث والعشرين، سبق وأن تزوجت، فقط ستة
أشهر لتعود وفى أحشائها نبتة لم يقدر لها الله الإكمال، كان
حسن أول من دق الباب، شابة صغيرة وجميلة ومضمون قدرتها
على الإنجاب، رحبت فى الحال فمثلها لا يملك حق الرفض أو
القبول وربما حتى حق التفكير، كانت متواضعة فى مطالبها، لم
تسعى أبداً لجرحها أو إهانتها، بل حاولت التودد إليها مراراً

وتكراراً فلم يزيدها إلا نفوراً وإِعراضاً، ربما حان وقت لتتظر لها بعين الرضا لا عين السخط، لتتصالح مع نفسها وترضى بقدرها.

أستأذنت ولاء لبعض الوقت، هم حسن أن يتبعها فأشارت له بأنها أعدت كل شيء، أرادت أن يلزم زوجته طيلة الوقت عله يبدد من غربتها فيذيب ما بينهما من تلج، لحظات وعادت بضيافة تليق بكبار الزوار.. هكذا علقت مشيرة لتردها مضيفتها "بل تليق بأعز الزوار".

غابت مرة أخرى لتعود به، ناولتها إياه.. مستغرق في نومه يبدو كملاك، أستجاب الله لدعائها.. أنزل سكينته على قلبها.. نزعه غيرة النساء.. أودعه حب الوليد..

أطلقت العنان لروحها.. أحتضنته وبللت دموعها وجهه.

القيود في العقول لا العقود.. لذا فالزواج برئ مما تدعون.

عالية بدون نقطة

"لما أنت كريم يارب" رددت صفة وهى تنهى تلك المكالمات
والتي على الأرجح أصابتها بمس فراحت تنادى إبنتها بهستيرية
"عالية..عالية..عالية"، هرولت عالية على الدرج المؤدى للدور
السفلى حيث المطبخ وحجرة الطعام وبهو الإستقبال لتجد والدتها
واقفة تلمع عينيها بنظرة لطالما أعتادتها، حان الوقت لإنفجار
قنبلة جديدة.. هزة لكيانها وحده الله يعلم وقعها عليها، هذا ما
توقعته الفتاة وهى تحقق فى والدتها آملة أن يخيب حدسها.

- جالك عريس حلو أوى.
- عريس ماشى.. مهو أى حد معدى من حقه يجى يعاين
إنما حلو وأوى عرفتيها إزاي دى!!
- متقلهاش من أولها خلى ربنا يصلح حالك.
- يصلحه.. يعنى هو بايظ.. دا كده مش لازمه عريس دا
لازمه ميكانيكى.
- أيوه نهرج بقى ونطيره وبعدين نقعد ونحط ايدنا على
خدنا.
- لا متقلقيش خالص، احنا هنقف ونحط ايدنا جنبنا.
- خالصنا خالص نفوق بقى ونركز ورانا شغل كتير.

- يا اختااااااااااااى.. هنتسلح تتيضيف وتلميع وبعدين ندخل عاللبس والزواق ونختم بهناكل ايه ونشرب ايه.

انتاب المنزل حالة من الهرج والمرج، عكفوا على العمل طوال النهار فبدا لعالية إنها ليلة عيد ينقصها فقط فرحته، من حين لآخر يُعاد السيناريو ذاته.. ينسى الجميع أما هي فلا، جرح يُضاف لسابقه ينال من روحها.. كرامتها.. كبريائها، بمرور الوقت يضحى ندبة لم تعد مؤلمة ولكنها مستديمة، وبرغم كل شيء مازالت مرحلة كعاداتها تتمتع بحس فكاهي، تهزأ من مشكلاتها فلعلها أختشت فأختارت غيرها من هواة النكد وما تحسبهم بقليل.

راقبت عالية الساعة المثبته لحائط حجرتها والمزينة بفراشات ملونة الأجنحة، تذكرت يوم أهدتها لها مدرستها تقديراً لتفوقها وهمست لها بكلمات مازالت تطن بأذنها" أنتى يا عاليه فراشة.. أنخلقتى علشان تطيرى تشوفى الدنيا بعينيكى ففضل ألوانك زاهية وأجنحتك جامدة، أوعى تسمحى لحد يكسر جناحك يحطك فى إطار وعمرك كله تقضيه على جدار"، والليلة يُرفع الستار عن مشهد ليس فيه ما يثير فضولها سوى بطله الجديد، فيا ترى كيف هو بطل الليلة أمن هواة الطيران أمن هواة الجدران؟

انتبهت عالية لصوت والدتها تدندن وهى تصعد الدرج المؤدى
لحجرة نومها، الجدران... قاربت الساعة على السادسة ومازالت
هى على حالها فأسرعت ترتدى ما أنتقته والدتها من ملابس..
تعطرت وأضافت لوجهها كل ما طالته يدها من مساحيق حتى
ظنت إنها قد تحتاج لآلة تنقيب إذا ما أرادت أن تلمس سطح
بشرتها الطبيعية، بالطبع تم كل شئ تحت إشراف والدتها.. فما
عدتها يوماً قادرة على تحمل مسئولية نفسها ورغم ذلك تدفعها
دفعاً لتحمل مسئولية أسرة بأكملها أي كانت ظروفها وطبائعها،
وأخيراً نظرت إليها صفية بعين الرضا إذ بدت لها ابنتها على
هذه الهيئة أصغر سناً وأكثر جمالاً، وراحت تعبر عن إعجابها
فألقت فى وجه الفتاة بواحدة من قذائف الهاون " يباركك الله
عمل الزواق خلا بنت الاتنين وتلاتين بنت اتنين وعشرين"،
أجلت عالية دموعها لحين وقت معلوم لديها وردت بسخريتها
المعهودة "الاتنين وتلاتين دول بيقوا سنانى يا ماما ولا يكونوش
وقعوا وبقوا اتنين وعشرين بحكم السن".

وبحلول المساء كان الجميع فى إنتظار الزيارة الملكية أو هكذا
ظنت عالية.. فما أغفلت عائلتها شيئاً لم تهتم له حتى خيل لها
أنهم قد يضعون أصص الورود على جانبى الممر المؤدى لبهو

الإستقبال أو ربما يستبدلون السجاجيد بأخرى حمراء لتليق
بإستقبال كبار الزوار.

دق جرس الباب وعلت أصواته فوق دقات قلب عالية، تمت
الفتاة لو أمسكت بمنديل فأزالت هذا القناع عن وجهها وارتدت
ملابس بسيطة وأنيقة، ماذا لو بدت كما هي لا كمهرج أنتهى
لتوه من فقرته؟ أليس من الطبيعى أن يعيشا فى بيت للزوجية لا
بيت للتجميل!!

أستقبل والداها وأخيها أبو الفضل هذا الاسم الذى ما لبثت أن
سمعته أول مرة حتى ضحكت حد البكاء.. لا إستهزاءً منه وإنما
سخرية من تلك الرابط بين اسمه وما سيسديه من معروف لها
ولعائلتها بأكملها، وهل هناك معروف أكبر من إنقاذها من براثن
عنوستها، من منحها صك براءتها فى مجتمع يحاصرها
بتساؤلات لا حصر لها ونظرات تتأرجح ما بين الشفقة والإتهام،
شفقة بحرمانها من أن تضحي ككل البنات زوجة وأم، وإتهام
بأنها لا يعجبها العجب فتدلللت حتى أستنفذت فرصها بكبرها.

خرجت صفية متهلة فالشاب يبدو وسيماً ودوداً ومهذباً، صافحها
بإستحياء ولم يرفع نظره إليها حتى وإن بادلتة الحديث،
أحتضنت عالية وهمست لها بفرح "قدمى العصير.. عندك جاهز

فى المطبخ"، لم تتسى أن تلقى نظرة على هدامها لتغادر مطمئنة.

دخلت عالية حاملة الأكواب الباردة، ربما سرى إليها مشاعرهما، شخص لم تقع عينيها عليه من قبل مفترض أن يصبح شريكها وأقرب لها إن قدر ذلك.

تكره هذه الفكرة ولكن الكل يحبها، سطرت من قديم الأزل بحروف من دم الصبيات "دليلك للجواز المتين اللى يعمر ويعيش" لأم ترتتر وأم جلجل وأم بم بم، "اه بم بم لبان زمان" ليتها تحظى ولو بواحدة منه الآن.. تلوكها فينشغل فمها بها، تخاف أن ينفلت لسانها فتقع الواقعة، ولكن أنقرض البم بم بينما بقت مخطوطة أم ترتتر.

جلست والصمت يلزمها تتأمل هذا المخلوق الذى أخذ يتفحصها من رأسها وحتى قدميها حتى فأجاءها بكلماته "إزيك يا عالية عاملة إيه"، تعجبت من مناداته لها باسمها دون إن يقرنه حتى بلقب أنسة، أليست غريبة عنه وعلى الغرباء أن ينادونها بلقبها الذى أعتادته "دكتورة عالية" ولذلك ردت عليه بإقتضاب "الحمد لله"، وهنا اقترح والدها أن يتركوا لهم فرصة للحوار على إنفراد ليتعارفا أكثر، خرجوا على التو مرددين فى نفس واحد "خير إن

شاء الله"، أبهذه البساطة سلام فرد فإنفراد فخير إن شاء الله..
إن فالله المستعان على ما سيأتى به أبو الفضل.

أعتدل الرجل فى جلسته وأبتسم إبتسامة فبدا لها كالثعلب الماكر
والتي طالما شاهدته فى صغرها مرسوماً فى قصص الأطفال،
حادثها بهدوء وكأنما يهدد طفلة دون العاشرة.

- ما شاء الله أنتى جميلة أوى، جوهرة لازم تتصانى
تتخبى مالعيون اللى زى الرصاص، دا حتى إسمك
يشهد.. يا دوب نقطة وتبقى غالية.

أحست عالية بأن هذه النقطة هى ما سيصيبها ويعجل بأجلها، بأى
حق ينوب عنها رجل عمر معرفته بها لا يتجاوز دقائق فى
الحفاظ عليها من الأعين، ألم تتكفل هى بذلك منذ شبت!.. ولكن
أبو الفضل لم يمهلها وقت لتتمكن منها النقطة حتى إنهال عليها
طعناً بإملاءاته ومخططاته لها إذا ما أصبحت زوجته وهو ما
يتمناه بالطبع.. فهى تبدو مطيعة وهادئة، وكان على رأس قائمته
تخليها عن عملها بمجرد أن تطأ بيته.. ولتتفرغ لرسالتها
المباركة ومسيرتها الميمونة إلى جانبه أو ورائه أو حتى تحت
قدميه.. حسبما يتراءى له فهو أدرى بالصالح والطالح والظاهر
والباطن.

صمت أذنهما عنه ولم يصدر عنها حرف واحد، أكتفت بهز رأسها من حين لآخر فبدت له راضية، لا تعرف كم مر من وقت حتى أنضمت عائلتها لمجلسهم ثانية فأستأذنت وأنصرفت لحجرتها. لم يمر سوى دقائق حتى فاجأتهم بوجودها وتعلقت بها الأنظار مشدوهة، وتخلّى أبو الفضل عن إبتسامته وبدأ كفار مذعور يبحث عن جحر يسرع بالفرار إليه.

أمسكت عالية بمنديل، أزال القناع وألقت بتلك العدسات إلى سلة المهملات فأنكشف وجهها الأسمر وعيناها السوداوين، أرتدت بنطال رمادى اللون وكنزة تتداخل فيها وردات البنفسج مع الرمادى وحذاء أرضى يلائم طولها الفارع وإيشارب رقيق يغطى رأسها تدلى على أحد جانبي كنزتها حيث ثبتته بدبوس كُتب عليه "أنا أنا مش حد تانى".

تحرر صوتها الذى طالما كان حبيساً "بابا.. ماما.. حسام.. دا لبسى اللى بحبه وبروح بيه شغلى واللى ممكن أسيبه بس لو أنا اللى قررت ده مش أى حد تانى.. صاحب المعالى أبو الفضل باشا شرفتنا بالزيارة".

إختفى أبو الفضل وكأنه فص ملح إذابته صراحة الفتاة، ونالت عالية جزاءها على ما أفترفت من ذنب فى حق عائلتها.. خاصة

وقد لازمت والدتها الفراش وأمتعت عن الطعام والشراب
وتجنببت معها الحوار وحملها الجميع وزر مرضها.

مرت أيام وما تحسنت صحة والدتها إلى أن دق جرس التلفون
لتنفجر قنبلة جديدة تعيد لصفية صحتها.. وعلى عالية اللجوء
إلى الله تتضرع إليه ليرحمها من عذابات زواج الصالونات.

ويحدث أن يزهر الشجر فى الخريف.. فما للطبيعة من قانون
ثابت.

غنيمة فرد

بعد رحيله اقتسموا التركة فيما بينهم، أضافت لحسابها البنكى الكثير ولوحدتها أكثر وأكثر، فى المنزل العامر بالحجرات.. الأثاث.. شتى ألوان الطعام والشراب.. الخالى من السكان.. فقط هى.. يؤنسها صوت التلفاز.. صخب الأوانى والملاعق والأكواب.. وأخيراً ضجيج الشارع.

يدر عليها عملها المال الوفير فلا تكاد تشتهى شئ حتى على الفور تقنّتيه، ولكنها ما عادت تشتهى سواها.. العائلة.. أنس حقيقى لا تلك الزائف والذى يستنزف عمرها دون عائد، تتكمش حين تسمع حواراتهم عن تخطين الثلاثين فما بالها وهى الأربعينية المتواضعة الجمال والأحلام أيضاً، تصم أذنها عن مجتمع يعلنها فظة صريحة، ما من رجل ليرغب بمن فى عمرها.. يدعمهم الأطباء بضالة فرصتها فى الإنجاب، هكذا ببساطة يسطرون شهادة وفاتها.. لا زواج.. لا أولاد.. فمن أين لهم بكل هذه القسوة!!

- نفسى أعرف أنتى مدياه ريق حلو ومعشماه على إيه؟
- وإيه بس اللى يعيبه؟

- قولى إيه اللى يميزه.. نعدى الشكل ونخلينا فى المضمون.. دا ثقيل ثقل
- أنتى ليه قارشه ملحته.. ثم الراجل ميعيبوش الهرى ده
- جيبه يعنى.. حتى ده طليقتة وعيالها منفذينه أول بأول.. دا مرتبه بيتقص مالخزنة من قبل ما يتليم عليه فى ايده.. يبقى هتاخديه على إيه!!
- يعنى هو اللى هياخذنى على إيه.. هيفاء وهبى إياك.. دا الحمد لله على كل حال
- لا مش هيفا بس كمان مش عرجا ولا ناقصك ايد ولا رجل
- بس ناقصنى فرع.. عيال تزهر قبل مايدبل جدرى وأفوت الدنيا لا واخده منها ولا سايبه فيها
- يعنى أى راجل والسلام.. المهم تبقى ماما
- يا ستى هو أنا هاخده سوابق لا سمح الله.. دا بس ظروفه ملعبكه وأنا شرحة.. أدعيلى أنتى بس ربنا يتمها على خير وينولنى مرادى
- وهتعلمى إيه لو أستغلك.. لا مؤاخذه يعنى خد اللى وراكى واللى إدامك ومش بحبطك ولا حاجة بس

إحتمال ميكونش ليكى فى الخلفة نصيب، ساعتها مين
هيسندك بعد قرشك ما يروح

- طيب ما قرشى فى جيبى عاملى إيه يعنى.. الوحدة يا
بنتى بتقفل النفس عن كل حاجة فى الدنيا.. لا بيبقى
ليكى غرض لا فى لقمة ولا فى هدمه ولا فى فسحه..
فخلينا نتفاعل بالخير علشان نلاقيه.. دا ربنا كريم
- يارب يا منال يفيض عليكى ربنا من عظيم كرمه

كالعادة أجمعت العائلة مع نهاية الأسبوع، حسمت أمرها فالليلة
ستزف لهم نبأ العريس الموعود، ستواجه عاصفة الرفض ممن
وعدوا أنفسهم بغنيمة ليست بالقليلة.. عاجلاً أم أجلاً ستؤول
لهم، بالطبع لم تكن لتعم تلك النية ولكنها للأسف قرأتها فى
عيون بعضهم حين تهاديهم "شئ تحت الحساب وغداً تأتى
البقية".

- فى حد متقدملى
- متقدمك إزاي؟
- زى الناس
- مناسب

- مناسب إيه يا زكريا.. لو كان فيه الخير ما كان رماه الطير.. دا تلاقيه راسم عالقرشين اللي ورتتهم من أبوها
- مش كل الناس بتفكر فى الورث يا يونس.. وأختك مش معيوبه علشان تتأخذ بس على مالها
- مش قصدى يا منال يا حبيبتي.. والله أنتى تستاهلى أحسن واحد فى الدنيا.. بس أنتى طيبه وملكيش فى لوع الرجاله اللي الواحد منهم يستلقط البنت المقرشه.. يثبتها بكلمتين وكام شهر وأمك فى العش ولا طارت
- مش أختك اللي تتثبت.. دى عقلها يوزن بلد وأصبر بقى خيلنا نفهم منها.. مش يمكن أن الأوان نفرح بيها.. يارب يطمنى عليكى
- متحرمش من حنيتك أبدًا يا زكريا.. هو أصغر منى بتلات سنين
- شوفت أهو أول القصيدة كفر
- وربنا أنت اللي مكفرنا فى عيشتنا.. فى إيه دا النبى عليه الصلاة والسلام كان أصغر مالمسيدة خديجة بخمستاشر سنة مش تلاته
- أديك قولت السيدة مش الأنسة
- وتفرق إيه يا حكيم زمانك؟

- سيدة يعنى داقت الجواز وعندها العيال.. إنما أنسة ولا
مؤاخذة كمان فايتهما القطر تبقى هتموت عليه.. يعنى
تدى متأخذش.. تطيع متأمرش
- يا عم حوش الطوب اللى بتحدفنا بيه.. وبعدين بلا قطر
بلا باص والجواز مش حرب مين يدى ومين يأخذ..
مين يأمر ومين يطيع.. دا سكينه.. مودة.. رحمة..
كملى يا منال وإن قاطعك هأحدفه مالشباك
- بيشتغل معايا.. طيب ومتدين وكان متجوز بس متوقفش
وعنده ولدين عايشين فى حضانة أمهم
- وطبعاً ماشطينه وجيبه فاضى ومحتاج اللى يملاه
- لآخر مرة.. إن قاطعتها هأحدفك مالشباك
- أسفين يا ريس زكريا.. خرس أهو
- طبيعى مش هيتخلى عن مسئوليته ناحية ولاده ودى
حاجة تزيد مش تقله
- عنده شقة يا منال؟
- اه.. بس فى بيت أهله وعلشان كده أفضل نعيش فى
شقتى.. يعنى فيها خصوصية وهبقى على حريتى
- وماله ملكك وأنتى حرة فيه

- حره فيه إزاي يا أخينا.. هو من أولها هيلطج علينا
ويقعد فى شقة أبونا
- كانت شقة أبونا وبقت شقة منال واللى يريحها تعمله
يريحها.. دا هيهدها ويهدنا معاها
- سيبك مالبومة ده وشوفى هيجى يقابلنى أمتى واللى فيه
الخير يقدمه ربنا يا حبيبتي
- الله لا يحرمنى منك أبداً يا زكريا
- هو كله كله لزكريا.. وأنا مفيش حاجه ليا
- الله يهديك يا يونس

فى المساء أختلت بنفسها وبوحدتها، لم يكن يونس بهذه القسوة قبلاً حتى أنضم لثلاثتهم غرباء، فزوجته لم تدخر وسعاً فى معايرتها، وأبداً لم يكن ليصدها فهى الجميلة التى تصغره باثنا عشر عاماً، لذا فهى تتدلل عليه منذ خطت قدماها بيته، أخيراً أثقل النعاس جفניה فاستسلمت للنوم محتضنة أحلامها أمة أن يحمل لها الغد فرح طالما أشتاقت إليه.

- وشك منور النهارده.. هو حصل
- اه.. فتحت الموضوع معاهم إمبراح
- وإيه رد فعلهم؟

- زى ما توقعت.. زكريا معايا وفى ضهرى إنما يونس
الله يسامحه بقى سمنى بكلامه
- ولا تزعلنى نفسك.. بكره يونس لما يشوفك مبسوطه
ومرتاحة معايا هيرضى عالجوازة ويباركها
- دا لو كان إنبساطى وراحتى هما الللى شاغلينه
- آمال إيه؟
- هو ومراته كانوا حطين فى بطنهم بطيخة صيفى من
ناحيتى.. كده كده مسير ورثى يرجلهم لا وعليه كمان
شقى عمرى من شغلى.. وطبعاً حضرتك جيت بوظت
كل خططهم.. حولت حلمهم لكابوس
- يا حبيبتى احنا مش عاوزين منهم حاجة.. اديهم الللى
يرضيهم.. هو أنا مش هقدر أعيشك
- لا يا ممدوح دا حقى.. هو ومراته الللى طماعين.. ما
زكريا أهو لو طال يدينى عينيه ويشوفنى سعيدة والله
ميتأخر.. وعموماً هو مستنيك.. شوف بقى هتبقى جاهز
تقابله امتى
- حالا.. دلوقتى
- يا مجنون

- مجنون.. مجنون.. بس نتجوز.. دأنا بقالى سنه مستتيكى تتجرأى وتفاتحيهم" يا مين يوصلنى لأبوها ولا لأخوها أخطبها.. الحلوة"
- الحلوة.. والنبي أنت كذاب
- أنتى اللى فاهمه الحلاوة غلط.. أنتى طيبة أوى يا منال
- وإن شاء الله هتكون عشرتنا حلوة وجوازتنا كلها بركة
- علشان نيتنا نعيش ونعمر

دعت الله أن يهدى يونس، إلا يحاول إفساد زواجها سواء بالمبالغة فى شروطه أو بتعمد إهانة ممدوح والتلميح بأن ما دفعه للإرتباط بها مالها.. فقط مالها.

- أنت شرفتنا يا أستاذ ممدوح
- الله يخليك يا حاج زكريا.. دأنا اللى أتشرفت بنسبكم
- وليه التسرع ده.. مش تستنى لما نأخذ وندى ونشوف هنتفق ولا وبعدين تقول نسب
- أنا متفاعل خير يا أستاذ يونس.. وبعدين أنا تحت أمركم فى اللى تطلبوه
- اللى نطلبه نطلبه.. يعنى مفيش فصال

- ما تهدي علينا يا يونس وسيني أتكلم مع الراجل بقى..
أقولك أشرب الشاي

- بص يا ابنى.. منال دى أختى الوحيدة وفى غلاوة بناتى
واللى يهمنى بس إنك تصونها.. تشيلها فى نن عينك
وغير كده اللى يناسب إمكانياتك وهى ترضاه احنا
موافقين عليه وربنا يتملكم بخير.. ها نقرا الفاتحه على
كده

- نقراها يا حاج.. إن شاء الله مش هتشوفها فى يوم
زعلانه

أحتضنتها رحمة زوجة زكريا، خفق قلبها بشدة للزغاريد التى
رجت جدران المنزل.. هذا المشتاق للفرح مثلها تماماً.

مرت أيام وهى تعد للزفاف، شاركها ممدوح إنتقاء كل شئ، لم
يدخر وسعاً فى إرضائها، أكتشفته أكثر وأكثر.. مرح.. خفيف
الظل لا كما ادّعت صديقتها، ربما ظروفه العائلية هى ما
فرضت عليه هذا السمт الظاهرى، ولكن ها هى تعود روحه
لطبيعتها بعدما أطلق سراحها من أسر الخيبات.

جالسة هى على الأريكة، تتوتر ملامحها من حين لآخر، تصم
أذنيه بكفيها، تلك الطنين يجعلها على حافة الجنون، لاحظت

رحمة تجمهما، ترددت فى سؤالها عما ألم بها، ولكن حالها اليوم
لا يمكن تجاهله

- فيكى ايه يا منال.. هو ممدوح مزعلك؟
- ممدوح.. دا حنية الدنيا فيه
- طيب مالك.. عينيكى مليانه قلق
- بقالى ست شهور ولسه مفيش حاجة
- حاجة ايه؟
- يعنى هتكون ايه.. حمل طبعاً.. متخليكى معايا عالخط
- ما عادى يا بنتى.. لسه بدرى
- لا.. بدرى دى مش لحالتى.. أنا أصلاً واصله متأخر..
ومتأخر أوى كمان
- يا حبيبتي دا رزق ربنا مالوش ميعاد.. يعنى لا فيه
بدرى ولا متأخر
- خايفه يا رحمه.. مرعوبه.. إمبراح كنت عازمه ولاده..
لو تشوفيهم وهما حواليه واد ايه مشغول بيهم.. طيب أنا
بقى هقدر أشغله بايه؟
- متفكرش بالطريقه دى.. حبى ولاده و كأنهم ولادك
بالظبط.. دا اللى هيخليكى تشغليه وتكسبيه وتكسبيهم
كمان

- والله بحبهم أوى.. بس برضه نفسى فى عيل بتاعى..

ملكى

- هيحصل إن شاء الله بس الصبر

تجدد حلم يونس وزوجته فى الحصول على الغنيمة حين تأخر حملها، أما رحمة فقد نقلت لذكريا مخاوف شقيقته، نصحتها بإصطحابها للطبيب فربما هى بحاجة لبعض من المساعدة.

- بقولك يا منال.. فيه دكتور شاطر أوى زكريا جاب

عنوانه وحجز كمان.. أعملى حسابك هنروحله بكره

- يا حبابيى.. ديما شالين همى

- هم إيه بس.. هو احنا عندنا أغلى منك

- طيب دعواتك بقى ربنا يجبر بخاطرى ويراضينى

- هيجبر وهيراضيكى وهنقولى رحمة قالت

قبل أن يصف لها الدواء.. أصر على إجراء إختبار للحمل تفادياً لأى آثار قد تضر بالجنين إن قُدر ووُجد، طاوعته رغم عدم إقتناعها، أجرته كتحصيل حاصل فلو كانت تحمل بداخلها ولو ذرة شك لما كانت الآن فى حضرته.

تطلع إليها الطبيب مبتسماً وهو يلوح بالإختبار وقد تحول
للإحمرار، هذا الذى أنتقل لوجهها المتهلل حين شرع فى
إدراجها ضمن قائمة متابعى الحمل لا متأخريه.. وليسقط الجميع
وليبقى وحده الأمل.. هذا الذى لم يخل به الله على أحد قط.

العورة جسد امرأة.. فقط في مجتمع أعور

قضية كتف ماجدة

"العثور على جثة بها سبعة عشر طعنة نافذة لشاب فى العشرينات.. يلقى بزوجته من الطابق السادس بسبب الخلاف على مصاريف الدروس الخصوصية.. سقوط شبكة دعارة تديرها شخصية مرموقة.. إحباط عملية تهريب عشرة آلاف قرص مخدر.. ضبط خمسين طن لحوم فاسدة قبل توزيعها على سلسلة مطاعم شهيرة".. طالما أعتادت أن تبدأ صباحها فى العمل بتصفح أخبار الحوادث.

- يا بنتى أرحمينى.. حد يصطبح عالبلوى
- طبعاً يا نوجه.. دى أحسن وصفة تهونى بيها على نفسك مش بيقولوا" اللى يشوف بلاوى الناس تهون عليه بلوته"
- تصدقى يا ماجدة أنتى بقيتى تقفلينى من أم العيشة بالسواد اللى بتكبيه عليا
- وأنا جاييه حاجة من عندى.. وبعدين أنتى محسسانى إن الدنيا بمبى وأنا اللى جايه عليها.. ما احنا قاعدين لينا عشر سنين اللى عملناه إمبراح بنعمله النهارده وهنعمله بكره.. كله بيغير علينا.. اللى أتجوزت واللى سافرت واللى مسكت شغله أحسن.. واحنا وشنا فى وش

بعض.. تقوليش حد مسمرنا مكانا لما صدينا من قلة
الحركة وطولة الركنه.

- مجوده.. أنتى شربتى قهوتك ولا لسه؟

- لسه.. بتسأللى ليه؟

- علشان أعملها لك وبالمرة أحليها بمعلقتين سم فيران

- وعلى إيه تكلفى نفسك.. كفايه تحطى صباك فيها

- لا دا شكلها هربانه منك خالص النهارده.. عليه العوض

فى اليوم.. احنا نأخذ إذن ونطفش عالضهر.. نخرج

للوسع.. نشم الهوا.. وبالمرة نشترى حاجة روشه

للصيف ونتغدى غدوه حلوه.. ويمكن واحنا راجعين يا

ستى وبنعدى الشارع تطسك عربية وربنا يتوب عليا

منك

- دا بعدك.. على قلبك حتى اخر دقيقة.. حتى اخر العمر

يا نوجتى

أنتقت نجوى قميصا بألون ربيعىة مبهجة مع بنطال تلجى اللون

فى حين أصرت ماجدة على قميص أبيض اللون مع تنوره

زهريه.

- يا بنتى الأبيض مينفعش للشغل.. ميعمرش.. هاتى حاجة تتحمل وفرايحى شويه هو أنتى رايحه المدرسه
- أنتى مفيش حاجة أختارها وتعجبك.. دأنا علشان خاطرك هاخذها بيبضاويه كى تعادل السوداويه فأصبح رماديه وأنال الرضا
- لا ده أنتى أصبحتى فصيحة.. هاتيهيا ويارب تتكرمش وتتوسخ وتتبع
- طب ما تلخصى وتأخدى تولعى فيها
- لا أشبعى بيها.. ويالا نروح نأكل بقى أنا مت
- متستعجلش عالموت.. الخير كثير.. دا خمسين طن لحمه فاسده يعنى أكيد منابنا متحاش
- بت أنتى.. سيبينى أكل بنفس.. هو أنا يعنى بخرج كل يوم
- متعيطيش خلاص.. بهزر معاكى يا جميلة
- متهزريش.. بيقولوا الهزار وحش عالرخمين
- لا والأوحش بقى دفع الحساب وعلشان كده الفاتوره عندك المره دى يا خفيفة
- مهى عندى كل مره.. بس يالا كله بثوابه.. خلصينى بقى هناكل ايه؟

- بط بالفراخ.. ورومى بالحمام

- اه.. قلبى

أثارت دهشتها النظرات المتفحصه فما عهدت نفسها محل
إهتمام، يومياً ومنذ سنوات لا تعدو أكثر من طيف يثبت وجوده
بتوقيع فى الصباح ومن ثم يستقر فى مقعده حتى موعد
الإنصراف، لم تذق طعم الثناء على إنجاز عملها بكفاءة فكان
عزاءها التغاضى عن توبيخها إن هى أخطأت من حين لآخر،
وهكذا كانت الحاضرة بإستمرار الغائبة دوماً.

سبقت ماجدة للمكتب وأنشغلت بقراءة صفحتها المفضلة بالجريدة
حتى أستوقفتها ضحكاتها المتبوعة بسؤال.

- يخرب بيت عقلك.. أنتى عامله إيه فى نفسك النهارده؟

- حلو الطقم الجديد.. يجنن عليا.. أهو ده اللى ما كانش

عاجبك

- عاجب إيه وهباب إيه.. اللى ما حد شافنى إلا وميل عليا

وسمعنى كلمتين

- ليه بقى إن شاء الله.. أكونش لابسه بكينى؟

- لا هو سيادتك البكينى فاطط من تحتة باللون البمبى

المجنون

- والله أنتوا اللي مجانيين.. البلوزة كتان ثقيل والمسائل متداريه إلا بقى إن كان البشر ماسكين تورشات وعدسات مكبره
- لا هما بس ماسكين فى سيرتك
- يا أختى الواحد بيشتغل ليه سنين لا عمره اخر ورقه ولا عطل مصلحة اللي ما فى حد بل ريقى بكلمة شكرانيه..
- اللي واكلهم أوى البمبى.. خلا لسانهم بطاريته تتشحن.. هيافة ستات
- يا ريته جات عالستات
- نعم!!
- يا بنتى إن كانت الست بعينين الراجل بعشره.. بس قال مؤدبين فمكسوفين يقولوك فقصدوني.. أتسترى يا ماجدة خلى الموضوع يتلم.. أنا قولت الأبيض مش بتاع شغل
- والله ما فى أبيض من أدمغة يهفها اللي يشف.. دا عالم مبتتكشفش..
- مالاخر البسى بادی تحتها
- الجو حر ومش ناقص خنق
- أتخنقى باللبس بدل ما تتخنقى بكلامهم

- حاضر.. بكره ولا أجرى ألبسه حالا بالا
- لا يا ستى خليكى لبكره.. بس متتحركيش مالمكتب النهارده إلا عالمرواح
- يا بنتى متتقنيش.. أتحرك إيه وأنتيل إيه.. أقول تانى
- ويارب نستوعب بقى.. احنا اتمسمرنا مكانا لما صدينا
- من قلة الحركة وطولة الركنه

أنترعت البادى بغضب من دولاب ملابسها.. ارتدته على مضض وخرجت تضرب الأرض بقدمها.. لم ترغب فى إرتياد سيارة العمل.. فضلت المشى عله يطفئ بعض من النار المشتعله بداخلها.. أنصاعت لأوامرهم وأعلنت السمع والطاعة لإناس بالكاد يعرفون اسمها.. يلقون عليها التحية بحكم المصادفة.. ما عهدت سؤالهم إن تغيبت لمرض وما تحسبهم يلحظون بالأساس غيابها.. فلما إذن الولاء لغرباء لا يعنون لأمرها فى شئ.

- يخرب بيت عقلك.. أنتى عامله إيه فى نفسك النهارده؟
- إيه تانى وأنا مدفيه لوزى ومجبسه جتنى لأجل ما
- ترتاحوا

- كتفك باين يا مصيبه وتحت باطك.. هو البادى بكت ولا ايه؟

- لا بكم وهولع مالحر.. إلهى يولعوا فى نار جهنم اللى حاشرين مناخيرهم فى اللى مالهمش فيه

- اه فهمت.. حضرتك دا لون بيج فاتح فمدى إichاء إنه جسمك.. وعلشان كده الدنيا مقلوبه

- إichاء.. والدنيا أتقلبت.. وربنا احنا مش فى شركة دحنا فى سرايا المجانين.. خلاص بقيت قضيتهم.. كتفى باين

ولا متغطى.. يعنى لو خدت عليا لحاف هيتعدل الحال

- مالاخر غيرى البادى بواحد غامق

- البلوزه بيضا يا فالحه لونها هيغير

- خلاص ألبسيه أبيض

- معنديش

- أشتري واحد.. هى معضلة يعنى

- وأغرم فلوس علشان راحتهم

- لا.. هتغرميها علشان راحتك أنتى

- مفيش راحة فى وسط ناس قضيتهم كتف بنت

ابتاعت واحدًا فى طريق عودتها للمنزل.. فى الصباح ارتادت سيارة العمل وسط تحية الجميع بداية من السائق وحتى من لم

تسمع صوتهم من قبل.. بل إن أحدهن دلتها بمجودة.. نحت
الجريدة جانباً.. لن يهون عليها شئ اليوم.

- أفرحى يا عروسه أهو جه العريس
- إيه اللى صابك يا نوجه؟
- عارفه محمد صالح زميلنا
- لا معرفوش
- ولا أنا
- بتهزرى سيادتك
- لا والله.. دى مدام سمييه قابلتنى الصبح وأتمشت معايا
وهاتك يا شعر فى أخلاقك وطاعتك وسمعانك
النصيحة.. عاقله مش متكبره ولا عامله حساب لحد..
غطت نفسها أول ما لفتنا نظرها من بعيد لبعيد.. اللى
زيها متنساش.. أنا رشحتها لمحمد وهو ما صدق شبط
وقالى كلميها.. خدت إيه أنا بقى مالمون.. دا الأبيض
طلع بيقش يا ناصحه
- صح طلعت ناصحه وطوع ومتواضعه علشان بلوزه
- طيب وهتردى عالست أمتى؟
- حالاً

- لا أتقلى امال.. خدى وقتك وشاورى مامتك لا تقول
هتموت عالجواز

- لا هرد حالا

- أنتى علقتى مالفرة ولا إيه.. لا أركزى كده

جذبت درج مكتبها أخرجت ورقة فى بياض قميصها.. وخطت
بضع كلمات ثم مدت يدها بها لصديقتها

- إيه ده؟

- الرد

- دا طلب نقل لفرع تانى.. يهون عليكى تسيبىنى

- أهو أحسن ما يهون عليا نفسى أسيبها ليكم

البعض يمتلك الذكريات.. والآخر تملكه.

لا يزال فى حوزته

ينتقل من واحدة لأخرى.. كلما جذبها جديد أشتريته.. تعيد تقييم الكل.. تستغنى عن البعض.. ذاك ما عاد يصلح.. أستبدل بابه بقلب آخر.. عدا هو.. مُنح بقاءً أبدياً.. فمهما طراً فلا يزال فى حوزتها

فى خان الخليلى يجلس هادئاً، يحدق فيها بعينيه وكأنما يستعطفها ألا تتخلى عنه، قابلاً هو منذ زمن تتفحصه الأيدي فى إعجاب ثم ما تلبث أن تعيده لمكانه فور معرفة الثمن، ملابسه المزركشة وشعره الكثيف وإتقان الصانع فى نحت ملامحه رغم دقة حجمه حال دون خروجه للحياة فبقى أسير الخان.

تسمرت أمامه.. لعله يشبهه أو ربما تمننت ذلك.. لذا فليكن محطتها الأخيرة.. بخبرته فك رموز نظراتها.

- شغل على أوى.. ميقدروش إلا فنان
- هو مين؟
- الصبى.. حضرتك ليكى بتاع عشر دقايق مركزة نظرك عليه.
- آه.. فعلاً.. فيه حاجة بتشدنى.. منحوت بإحساس

- يبقى من نصيبك وهريحك فى سعره.. ما تسمعيني كلمتك
- مش لما أسمع منك الأول
- ثمانين جنيه بس
- ليه أنت حاسب الإحساس بكام.. بستين جنيه
- دا سعر مخصوص ليكى.. وأتحدى تلاقى حته شبهه عند حد
- هو يجبش أكثر من عشرين جنيه
- جرى إيه يا مايا.. هو عشرة جنيه ودا يفرق يعنى عن غيره فى إيه.
- صاحبتك جايه علينا أوى يا استاذة.. الحال واقف صحيح والرجل خفيفة بس برضة مترضيلناش الخسارة
- معلى أصل ملك بتشتغل فى التسويق.. وفى البيع والشرا حاميه حبتين.. خليك معايا أنا.. قولت إيه
- لا عشرين.. مش ممكن دا يجبش نص تمنه
- يبقى ثلاثين ودة آخر كلام
- ماشى.. علشان نستفتح بس.. حكم الرزق بيشح يوم ما نبدأ بالفصال.. حالاً أحطه فى شنطة
- لا بلاش

- اللي يريحك... مبروك عليكى

سبقها لكفها حين امتد إليه، راح يتلمس دفء طالما أشتاق إليه..
فسرت إلى جسدها رعدة حركت الساكن وأيقظت النائم.

- أنتى متبنة عليه كدة ليه متحطيه فى شنطتك

- خليه فى إيدى أحسن.. شكله عاجبنى

- والله أنتى عيله.. تعجبك لعبة وتشبى فيها وتمشى
شايلها.. أعلى وأكبرى بقى.

- أكبر آه.. أعقل مأظنش

- فى دى عندك حق.. أنا شوفت اللي غاوى إكسوار
واللى غاوى تابلوهات واللى واللى.. إنما غاوى
ميداليات جديدة عليا.. وأنا ليا معاكى بس سنتين غيرتى
فيهم اتناشر واحدة

- انتى تبعدى عليا.

- يعنى هحسدهم.. ألا صحيح القديمة بيبقى مصيرها ايه؟

- وأنتى مالك؟

- لا بجد عاوزة أعرف.. علشان خاطرى أتوسل إليكى

- خلاص وأنا أقدر على زعل است مديحة يسرى،

صندوق صدف فى دولابى

- الله على الجو التركى والشكمزية الصدف بتاع ان نازك والذهب والياقوت والالماظ
- هتسمعى ولا؟
- هخرس خالص
- كل واحدة ليها شهادة ميلاد بكتبها فى بلوك نوت.. يوم ما اشتريتها.. وقصتها وأخيراً يوم ما أستغنيت عن خدمتها والبلوك والميدليات كلهم يرقدوا بسلام داخل الصندوق
- طيب وليه بتعملى فى نفسك كدة يا بنتى؟
- طيب وأنتى ليه بتعملى فى وشك مهرجان ألوان حتى لو نازلة الشارع تشتترى بجنيه لبنان؟
- مزاجى كدة.. باتبسط كدة
- وأنا كمان.. مزاجى كدة.. باتبسط كدة.. وأهو كل واحد وكيفه.. وخلينى بقى فى رجلي خلاص مش قادرة أدوسي عليها.. ماتيجى نشوف قهوة نقعد عليها.. نريح ونأخذ مشروب وبعدين نبقى نكمل اللفة.
- ماشى.. هوديكى قهوة ترجعك خمسين سنة ورا
- طب ما كل حاجة حوالينا مرجعانا خمسين سنة ورا
- طب خدى بالك من الواد زمانه باش فى ايديكى

عالمضدة خرجت القديمة معاشاً مبكراً.. فما دامت معها أكثر
من بضعة أسابيع.. أفلتت المفاتيح.. نحت أحدهم جانباً...
وضعته ضمن بقايا أكياس الشاي.. ثم ما لبثت ان تدلى الباقي
من الحلقة المتصلة برأس الصبي، أثارها المفتاح ذو الأسنان
المتعددة.. اللامع فى سلسلتها دائماً

- مايا.. دا مفتاح خزنة
- يعنى.. بس اشمعنا
- دا بيقفل كام تكة... هى مليانة رزم رزم ولا ايه
- هى مليانة بس مش رزم
- امال لحمة وفراخ
- لا دول تلاقيهم فى فريزر بيتكم
- طب فيها ايه؟
- فيها فيل.
- لا دا تلاقيه فى جنينة الحيوانات
- هى بقت كدة... واحدة بواحدة.. طب مش قايلة
- لا بجد.. عاوزة أعرف.. علشان خاطرى أتوسل إلكى
- أست مديحة يسرى تانى.. يابنتى غيرى
- ماشى أغنيها لك

- أبوس ايدك بلاش .. بس نصيحة اتعالجى .. يعنى بقى مضادات فضول .. مثبطات زن .. متهمليش فى نفسك
- حاضر هأخد سيانيد لو طلبتى بس الحقينى .. سننتين وانتاشر ميدالية اللى يروح واللى يجى وده على حاله بلمعته بتكاته .. يكونش بتاع الهرم
- تصدقى دى أول مرة أخذ بالى انه فعلاً بتاع الهرم
- يا سلام
- آه هو مش الهرم دا مقابر .. ناس حياتهم أنتهت ومستنين يكملوها بشكل معين راسمينه فى خيالهم .. ويا عالم هيطلع حقيقة ولا وهم خلاهم يضيعوا عمرهم يخططوا ويحضروا ليه .. ونسيوا يعيشوا من كتر إنشغالهم بيه
- أكذب لو قولت فاهمة حاجة .. هو الشاى كان فيه إيه
- لا انا اللى فيا .. خايفة أكون زيهم مستتية وهم مسيطر على كل ذرة فى كيانى
- هو الواد ده من ساعة ما تتحتى ادامة الصبح وأنا قولت وراه حكاية
- هو فيه شبه منه
- من مين؟
- على...

- أول مرة اسمع الاسم ده منك
- يمكن علشان مش بقدر الأقبيله صفة يقبلها الناس حواليا
بأتعمد ما أجيش سيرته
- طيب وهو فين.. عمرى حتى ما شوفته
- عرفته أول ما دخلت الكلية أو تقريباً معرفتش غيره فيها
وكأنى اكتفيت بيه عن الولاد وحتى البنات.. أخرجت
أنا وهو اتعين معيد
- حلو.. الدنيا ماشية زى الفل
- وهى لو كانت مشيت كان زمانى الأنسة مايا
- إيه كان بيتسلى وأهو يومين وعدوا
- لا طبعاً..على مش كدة خالص.. دا بالعكس خد مامته
وراح خطبنى وبابا طبعاً أعترض إنى هعيش معاه فى
بيت والدته لأنه فى بداية حياته وميقدرش يجيب شقة
- طفشه يعنى
- لا ضغطت عليه أنا وماما لحد ما وافق.. ولبسنا دبل
واتفقنا الجواز يكون بعد الماجستير.. حتى نكون قدرنا
نظبط الشقة ونغير عفشها... وبالفعل خلصه بأسرع مما
توقعت وعلنا فلوس نقدر نعمل بيها التصيلحات.. بس

- آه... بس ساعتها لافيت عليه واحدة تانية.. مالهمش أمان يا بنتى
- لا طبعاً علي ميملاش عينه مالدنيا بنت غيرى.. بس مامته اتوفيت ودخل فى حالة إكتئاب.. أصله مكانش ليه غيرها.. كان صعب أوى يتخيل حياته من غير وجودها
- وضاع علي
- لا اللى ضاع شادى يا ست فيروز.. لكن على ربنا بعثله منحة فى اليابان وفرصة طبعاً متعوضش.. دكتورة فى تخصص هما معلمينه... يعنى حلم وأتحقق بقدرة قادر...خصوصاً فى سنه كل المنح بتبقى فى بلاد تعبانة
- وسافر ولا إكتأبه منعه
- بالعكس دا جاتله فى وقتها.. هيبعد عن كل حاجة بتفكره بمامته ويأقلم حياته الجديدة على غيابها
- وخلص الدكتورة
- خلصها من اربع سنين
- طيب متجوزتوش ليه؟
- بابا كان رافض تماماً فكرة سفره لوحده ويسيبنى متعلقة سنين.. اتفق معاه أول ما يضبط أموره هناك بيعتلى

وبصراحة كان مرناً جداً في الحجة دي.. كان مستعد
يكتبه عليا غياي وأسافر له وحدي ونصرف حياتنا بقي
بالطريقة اللي تناسبنا

- والله عمي دا راجل مجدع
- آه بس الظروف بقي اللي ما كاتش جدعه خالص، علي
قبل سفره سابلي مفتاح شقتهم.. واللي مفترض طبعا
يبقى بيت الزوجية مستقبلاً، أشقر عليها ولما ربنا يأذن
أتابع تجهيز عشنا
- ودة طبعا مفتاح الهرم اللي ملازم ميداليتك
- تمام... علي بقي ظروفه مسمحتش بيعتلى وبابا ركه
ستين عفريت وبعد سنتين من السفر كان أبويا فاض بيه
الكيل وطفح وأصر على فسخ الخطوبة
- وسى على عمل إيه
- وهيعمل إيه... التذاكر بتاع المنحة رايح في بدايتها
وجاى في نهايتها.. هيجيب منين علشان ينزل بيوس
رأس أبويا يصبر عليه
- لا غلطان أبوكي.. المفروض يصبر عليه ستين سنة دا
على أساس إن عمرك عادى يعنى تقضيه في إنتظار
مش باينله أول من آخر

- كأنك بتتكلمى بلسانه هو وماما...كلكم زى بعض مش حاسين بيا
- لا كلنا عاقلين.. وأنتى اللى مش حاسة بغلطك فى حق نفسك.. أنتى بتقولى خلص الدكتوراة من اربع سنين.. ليه منزلش؟؟.. ولا تذكرة العودة أستبدلها بتذكرة سينما
- يا بنتى علي مش بيفوت يوم من غير ما يصبح ويمسى عليا ويطمنى عليه.. هو بس مضى عقد مع شركة عالمية ومعتمدين عليه بشكل غير عادى.. دا حتى أستغنى عن منصبه فى الجامعة هنا وأستقال لأنه مرجعش بعد نهاية المنحة.. أنتى عارفة ظروف البلد
- تصدقى أنتى اللى مستفزة بشكل غير عادى.. دا واحد قطع صلته بكل شئ فى بلده ومستتية يرجع علشان بيقولك "جود مورنينج على جود باى" أنتى عبيطة يا بنتى
- أنتى عمرك ما حبيتى يا ملك
- لا طبعاً حبيت
- مش باين.. لو حبيتى بجد كنتى قدرتى كلامى
- كلامك ده ميتقدرش غير فى العباسية.. مفيش أى حاجة رسمى ما بينكم.. مفيش أى خطوة إيجابية منه.. يبقى مفيش غير أنك أدمنتى انتظاره.. مفتاح وباب وفين

البنى آدم اللى دريان بكل ده.. أنتى إزاي فى البيت
سايبينك لنفسك

- مش سايبينى.. كل شوية شجار ونقار علشان عريس..
أسطوانة بقى كل اللى من دورك اتجوزوا.. طيب دى
مرة وصلت إن ماما شكت إنى ضربت ورقة عرفى مع
على قبل سفره

- اللى ضربتى فعلاً.. عقلك.. خلتيه فى غيبوبة مش
مدرک إن كل شئ بيتغير.. وسى على الله وأعلم دلوقتى
مع مين

- مش ممكن.. على إن مش معايا مبيقاش مع غيرى
- ماشى يا ستى.. حاول يصلح الأمور مع باباكى..
يكلمه.. يطمنه.. يقوله هينزل أمتى أو حتى هييعتلك
أمتى

- لا
- يبقى أعمليله بلوك ومش بس من شوية شاشات لا دا من
حياتك كلها

- غلطانة إنى حكيتلك
- آه غلطانة.. لأنى فى الغالب بعد كدا هحتاج علاج
اللمرارة

تردد صدی کلمات صديققتها طوال مشوار عودتها... ربما كانت
محقة وربما لم يعرف الحب الحقيقى طريق لقلبها من قبل..
فمعه يهبط مؤشر المنطق لأدنى مستوياته بينما يصعد مؤشر
الجنون لأعلاها.. مع ذلك لم تتكرر تأثرها بحديثها ولو باليسير..
أخيراً وصلت المنزل.. أرتجف هاتفها وبصيحة منه أقرأها
سلامه برسالة مقتضبة.. تبددت شكوكها وتبخرت مخاوفها
بحرارة كلماته فلا زال قلبها فى حوزته كما المفتاح فى حوزتها.

وعندما تذهب فى رحلة الالاعودة فلا داعى لحزم الأمتعة..

فكثير ممن أهملوك سيهتموا بحزمها.

لعبة المطار

حقائب فارغة سرعان ما تمتلئ لترحل ويأتى غيرها، هبوط قلما كان إختيارى.. فطالما كان الإضطرار هو السمة الغالبة، يعاد ترتيب الأولويات حسب سيناريو يتغير على الدوام، تتشابك الأحداث من هنا وهناك، تخفت اسماء وتلمع أخرى، ما من ثابت فلكل أقصوصة بطلها، تمتزج المشاعر فلا تكاد تميز نكهة الحزن من الفرح والوداع من اللقاء.

أبدًا لم تروقها يوماً لعبة المطار، رغم ذلك أعتادتها.. وشيئاً فشيئاً أحترفتها "كله تحت السيطرة"، خدمة لم تكن بالتميزة ولكنها مستديمة مهما طرأ من مستجدات، دون كلل أو ملل.. دون نقد أو إعتراض.

دائماً هى بالصالة باقية وإن رغبت بالرحيل، تكسى وجهها بقناع متهالك أضحى يكشف أكثر مما يستر.. ولكن ما من عيون لتبصر!!

تتجول بين القوائم من حين لآخر، كم يؤرقها أن يأتى يوم لتجد من بينها قائمة لذهاب فقط، ذهاب دون عودة، توشك أن تطمئن لولا تلك القائمة والتي لم يحدد لها بعد تاريخ للإقلاع، طُمست

كل البيانات فقط بالكاد ترى أحرف ترتبط ببعضها، دقت النظر
فإذا به اسمها.

- يعنى إيه.. خلصت خلاص.. طيب أنا لسه
مدوقتهاش.. معرفتش طعمها
- كله فى علم الله.. محدش فى الدنيا يقدر يقول مين
هيعيش ومين هيموت
- بس مفيش حد فى حالتى بيعدى
- مين قال كده.. كتير بيتكتب لهم الشفا
- يمكن.. بس بعد عذاب وأنا سبق وخذت نصيبى منه
كامل ومكمل ولا يكنش نصيبى دوبل
- فين إيمانك.. دى أقدار وربنا مبيظلمش حد
- بس بيسيب عبيده يظلموه
- دا بس لحد ما يقابلوه وكل واحد بيأخذ حقه
- أدينى هسبقهم لعنده

كانت فى السادسة عشر من عمرها، تبدو كزهرة ربيعية فاتته،
جذبتة منذ الوهلة الأولى، عشرون عامًا يمتص رحيقها.. ليس
وحده ولكن كل من يمت له أيضًا بصلة، لطالما أنتظرت تلك
المنحة الربانية، عسل فيه شفاء لما خلفه عطاء بلا حساب.. بلا

مقابل.. بالمجان، هذا الذى أتى على أخضرها فباتت عجوز فى ذروة شبابها.

- مرفت.. مرفت.. أصحى.. إيه اللي منيمك لمتأخر كده؟
- وأنا المفروض أصحى بدرى ليه؟
- أنتى نسيتى.. أميمة معزومه عندنا النهارده
- قصدك عند مامتك
- ولو أهى عزومة .. وبعدين احنا إيه وماما إيه.. واحد.. فى بيتها يعنى
- أولاً عزومه دى لما تكون من وقت للتانى.. إنما دى تكيه.. عرض مستمر، وثانياً مين اللي خلى كله واحد، أنا.. لا.. هما.. إحتمال.. أنت.. أكيد
- فيكى إيه النهارده!!.. روقى كده وقومى خدى دش وأنزلى.. ماما تلاقيها محتاسه
- قولى يا عصام.. هو لو أنا ولا عيالى اللي احتسنا هنلاقى مين جنبنا؟
- الله وأكبر عليكى.. تحتاسى إيه بس دانتي ساندك الكل
- يعنى لو سيبتهم يقعوا
- سيبتهم إزاي؟

- يعنى لو النهارده أعلنت تأميم البيت ده، خليته يعنى زى
بتاع بقية خلق الله.. ليه حيطان وسقف وباب.. باب
يتفتح حسب الأحوال مش حسب كيف فلانه ومزاج
علانه.. وقومت بس بيك وبعيالك ساعتها الكل هيقع

- لا متطليعيش فيها بقى.. محدش هيموت

- صح.. أنا بس اللى هموت وكلكم هتعيشوا

- مالك يا حبيبتي؟.. فيكى إيه!!.. عمرك ما كنتى كده

- عمرى أتسرق وأنقسم اداام عينيا وبغبائى حتى منابى
أتبرعت بيه.. وبعدين متقولش حبيبتي.. قول المدام.. أم
العيال.. إنما حبيبتي.. هتبقى ضعيف وكمان كداب

صدمته كلماتها، بدت كشخص غريب لم يسبق له وأن تعرف
إليه، لذا فقد تركها وذهب دون حركة أو حتى إيماءة، فى موقف
كهذا صفة على وجهها هى ردة الفعل المنطقية، ولكنه لم
يفعل.. فطالما أحترف صفعات من نوع اخر.. وجهها لكرامتها
على مدار عشرتهم المريعة.

- إيه يا عصام.. الضهر ادن من يجى ساعة ومرفت ما
بانتش

- معلش أصلها تعبانه شويه النهارده

- تعبانه!!.. ما كانت زى القردة وليها كام يوم تلبس وتتنزل.. تقول مشوار فى السريع وتروح تغطس بالساعات
 - ما قولناك.. تعبانه وبتعمل شوية فحوصات وتحاليل
 - هو كل من جاله شوية مغص ولا صداع يجرى هنا وهناك وهاتك يا كع.. هى فلوس حرام
 - بس علشان نطمئن
 - لا أطمئن.. ولم ايدك شويه عيالك محتاجين كل قرش.. وبعدين أنت ما روحتش الشغل ليه النهارده
 - ماجز.. بريح
 - يعنى أنت مانتخ فى البيت وهى مرنخه فى السرير.. دا باينه يوم أبيض.. رن عليها.. أستعجلها.. أختك هترجع من شغلها علينا مش معقول ما تلاقيش لقمه تاكلها
 - نسيت موبايلى عالمكتب.. شوية وهتنزل لوحدها
- مرت لحظات وظهرت مرفت مصطحبةً طفليها التوأم، كانت متأنقه على غير عاداتها وتحمل حقيبة يتناسب حجمها والغياب لأيام، واصلت نزول الدرج دون أن تتوقف أمام الباب المفتوح دوماً فى وجه الزائرين أو بالأحرى المقيمين والموصد دوماً فى وجه أحلامها، تبعها بخطى حذر

- على فين؟
- على ماما
- كده من نفسك
- لا كده من نفسى
- طيب قولى.. هو أنا عمرى منعتك
- لا.. عمرك ما منعتنى بس بتسيب غيرك يمعنى
- مش معنى إنى أفوت كلمتين هبل تسوقى فيها.. أنا بس حاسك مش طبيعية.. مش أنتى وعلشان كده عاذرك
- المهم تلاقى اللى يعذرک
- سيبك منى وخلينا فى الهاتف اللى جالك بأمك فجأة كده ومن غير سابق إنذار
- يعنى من ساعة أمينة ما جات مالمسفر وروحت سلمت عليها زى الغرب وضحى وسلمى شبطوا فسيبتهم عندها وجريت أنا ألحق التكيه إلا يكون حد ناقصه حاجة، وخذ بقى عندك عدى أكثر من أسبوع لا سألت أنت على بناتك ولا سألت أنا على أختى، قولت أخذ علاء وعمار ونقضى معاهم كام يوم وأنت كده خفيف خفيف وهتلاقى ألف من يراعيك مادام احنا مش موجودين
- خفيف إيه وتقبل إيه.. وربنا أنتى مخك ضرب

- ضرب.. قسم.. ده اللي عندى.. سلام

جلس على الأريكة.. أستند للحائط وسمح لجفنيه بالإرتخاء، بين
عشية وضحاها تغيرت نبرتها.. نظرتها.. باتت قاسية وباردة
وما عهدا هكذا من قبل، نبهه صوتها الجمهورى

- هو واحدة هتناملى فوق وواحد هيناملى تحت وأنا أتعك

- مرفت مش نايمه

- ومادام صاحبة غرقانه فين.. إياك تكون أفكرت تتزوق

- هى فعلاً أتزوقت وراحت

- راحت فى أنهى داهية

- عند أمها.. خدت العيال وهتقضى كام يوم مع أختها

- وحبكت اليوم ده ولا يكنش حد ناوى يموتها النهارده

- لا موت ولا حيا.. هى بس عاوزة تشبع من أمينة وحقها

برضه دا هى مرة اللي بتجيبها مالمسنة للسنه

- وأنا أعترضت.. بس أنت عارف الحال

- معلىش شوفى حد مالبينات

- البنات!!.. يحرق البنات عالشات عالىلى أخترعه.. دا

معمولهم بيه عمل.. أكلم الواحدة لا ترد ولا تصد كأنها

أطرشت

- خلاص أشمر وأطبخك أنا
- لا والله
- اه والله.. مادام النسوان مش فاضيين أربط أنا رأسى وأقشر بصل
- لا عنك هقشره أنا.. داهية تأخذهم كلهم
- "وتأخذنى قبلهم" ردها همساً

جاء الشوارع ، حرق فى وجوه البشر، لم يرها بهذا البؤس قط، عجائز فى هيئة الشباب، لربما أشعلت مشاعرهم شيئاً قبل رؤسهم، أستوقفته تلك اللافتة الضخمة "معامل الشفاء للأشعة والتحاليل" هذا المكتوب أيضاً على المظروف الملقى على الطاولة منذ ليلة أمس، لعله من قلب السحر على الساحر

- مرفت.. مرفت
- نعم.. فى حاجة نسيته قبل ما أمشى.. كوباية من غير غسيل.. كرسى من غير تلميع.. قميص من غير مكوى
- لا.. أنتى عملتى إيه عند الدكتور؟
- ياه يا جدع.. أسبوع أجر وأشيل وأروح لوحدى بعيلىن.. عينات وإنتظار وقلق وعيون عايطه.. بس هتشوفها إزاي وأنت على طول مرابط جنب الللى

خلفوك.. لب وشای وضحك وكركره.. إيه القرطاس

خلص ولا الشای برد

- لا.. بلاعة وطفحت

- قول ست وطقت.. طرشت.. فرقعت

- خليكى عندكم أهو ترتاحى وترىحى.. أنا محقوق إنى

أستعنيك وسألتك

- لا أستعنى أحسن بولادك.. من هنا ورايح الشيله شيلتك

والمنا ب خيره بشره بتاعك.. دا إن كان لسه فى خير..

أنا بح خلاص.. إستقاله

- استقاله من إيه؟

- مالدنيا

الحياة لا تغلق بابها أبدًا.. دائما ما تتركه موارد..
ولكن فقط لمن يتمسك بفرصته لا من يتنازل عنها أمام أول
كثرة.

مستصغر الشرر

كم تهوى شكله المتناثر حين يتقاذفه الهواء فيتطاير فى أى إتجاه شاء، إنه الشئ الوحيد لديها الذى يحظى بحريته، لذا لم تسعى أبداً لتهديبه.. سواء قصاً أو تمشيظاً.

آثرت درة أن تترك تلك الأدوات لتعمل فيما هو أهم، تمشط ذاكرتها كلما أحست بثقلها، دقيقة هى فى إستعادة التفاصيل، لم تغفل حتى مستصغرها، وكيف لها أن تفعل وقد كانت النار التى ألتهمت حياتها من نتائجها، شرارات هنا وهناك تشتعل من حين لآخر، ربما لتطهرها من آثامها، أو لتبكر بنهاية حكاية قد تكون أشد ألماً إن قُدر لها الإكمال.

أياً كان باتت تمقت تلك النار، لذا فقد حان الوقت لتطلق العنان لمقصها، أستبدلت غصة الألم بعذابات الفراغ، ونار التفاصيل بنار الإغتراب.

بدت ذاكرتها خاوية على عروشها بعد أن جمعت فى سلتها قصاصات ينوء بحملها أولى العصبية، فمن يحملها عنها، قادر أن يحتويها، ربما هو شاطئ الغرام، هذا الذى يشبهها بصخرته

التى طالما أحتوت قصاصات لعشاق لا حصر لهم، وحده قد يتسع لها ولكن هل يتسع لقصاصاتها؟

سواء إتسع أم لا فما أمامها سواء، فلتجرب حظها عليها تستطيع أن تلقى بالنرد مرة أخرى فلربما حظيت بفرصة جديدة للحياة.

على رمل الشاطئ جالسة هي، تلقى بنردها فإذا به يطالعها بوجهه، تعيد الكرة وفى كل مرة يتحداها ساخرًا منها، لقد استنفذت كل فرصها وما من مزيد، هذا ما أيقنته مؤخرًا.

لفظ البحر قصاصاتها، تفرقت بين أسراب البشر، جفت.. تطايرت.. أخذت تلاحقها.. تجمعها، صنعت منها عقد، أثقلها.. تحملت، أشد الألم، تحسست موضعه، أنتظرت تحسنه.. لم يكن، ألهبها الإنتظار، فرت للماء تطمع فى لطفه، أنفرط عقدها.. طفا، تابع بصرها حباته، تردد بأذنيها صدى أنشودة طالما كانت تدندن بها"الضمت أيام الإنتظار فى خيط، غزله اتصنع من طرح مية غيط، لفيته عقد حوالين الجيد، حز بجرح الفراق والبين، من خنقته للبحر فريت، شبك بصخره فرط وأمتد الخيط، لفه بطوله عرضه، وفاض يجى شبرين"

خفت الصوت رويدًا رويدًا ثم ما لبث أن أختفى وأختفت هي معه.

- هو جرى إيه؟.. أنتوا مين؟
- أطمنى ماحناش الملايكة.. الأبيض فى أبيض ده علشان حضرتك مشرفانا فى المستشفى.. بقالك أربع أيام معانا
- أربع أيام!!!.. مش فاكرك حاجة عنهم
- مهو مفيش حاجة علشان تفكرها.. واضح إنك منمتيش ليكى سنين وجيتى تعوضى اللي فاتك عندنا
- ياريت كنت أقدر أعوض اللي فاتتى
- بلاش والنبي النبوة اللي تقلق دى.. مش كل مرة تسلم الجرة.. إلا هو أنتى ملكيش فى العوم ولا شيطانك وزك على نفسك؟
- معرفشى
- أصل الأخ اللي جابك بيقول إنك كنتى مستسلمه أوى ومش بتبدى أى مقاومة.. يعنى المسألة فيها شبهة إنتحار
- أخ.. جانبى.. مش فاكرك

- عموماً هو بيجى يسأل عليكى كل يوم.. شويه وهو يشرحك بنفسه.. ويأريت بقى تركزى وتحاولى تفكرى تليفون لأهلك علشان نكلمهم
- مفيش داعى
- إزاي!!.. هما مسافرين؟
- تقريباً.. هو أنا ادامى كتير وأخرج؟
- أنتى وجدعتك.. تصحصى كده واحنا نروحك على طول

وحدها ما بين الجدران، منذ متى لم تشعر بإهتمام أحدهم.. سؤاله عنها، شغلها منقذها المجهول فباتت تنتظر قدمه أكثر من إنتظارها الشفاء، مرت بضع ساعات لتدق عايذة بابها تعلمها برغبة زائرها اليومى فى الدخول إن لم يكن سيسبب لها حرجاً أو إزعاجاً، رفعت بصرها إليه، تأملت باقة الزهور فى يديه.. نضرة مبتهجة غير أبهة لتلك الذبول الحتمى والذى سوف يودى بها.

- حمدالله عالسلامه ومتعملهاش تانى.. مفيش فى الدنيا حاجة تستاهل تخسرى علشانها حياتك
- ولما تكون خسرتها بالفعل

- يبقى ناوياها تانى.. خدى بالك مش كل مرة هتقابلى واحد مجنون.. عويم نص ليه ومع ذلك نط من غير ما يحسبها
- دا مش تصرف واحد مجنون.. دا تصرف واحد شهم وطبيعى صعب أوى أقابل حد زيه تانى
- بس مش غريبه إنك كنى لوحذك.. يعنى ديما المصيف يحب اللمه وغير كده مش عادى بنت تسافر لحالها كده
- تفكر اللى أنت شوفتها دى كانت جايه تصيف!!
- لا جايه تخلص من حياتها مش تستمتع بيها.. فعلاً سؤال غبى
- مش قصدى أنا أسفه.. بس أصل أمورى معقدة حبتين وعموماً شكراً عالورد وعلى كل اللى عملته معايا
- يعنى أمشى.. أروح خلاص.. لا بعد إنك مش هأسيبك وبعد يومين يجيبونى أتعرف عليكى وكلمتين وأقل المحضر.. أسلمك لأهلك وبعدها براءة أنا
- براءة.. دأنت كده ناوى على تأبيده
- ليه بس.. أوعى المره الجايه تسيبى جواب إن اللى عملها..... بس أنتى متعرفيش اسمى.. كده أطمنت

- مالناحية دى متقلقش.. وبعدين هو أنت يعنى اللى تعرف اسمى
- اه.. درة.. دى الحاجة الوحيدة اللى كانت فى شنطتك.. كارنيه إشتراك مكتبة قديم واسمك وصورتك فيه
- دأنت كنت متابعى بقى من قبل مأنزل الميه وإلا إزاي عرفت تربيزتى وشنطتى؟؟
- لا متفهمينش غلط.. أنا بس كنت الشمسيه اللى جنبك وشلتى معايا وعددنا كبير ولما احتجنا كراسى بزيادة الأخ اللى أجزلنا جاب الفاضى من عندك على أساس إنك لوحذك.. بس كده
- ومالك أتحضيت كده.. بس بجد أنت روحك حلوة وسناك بيضحك ما شاء الله
- لا كله إلا الحسد"قل أعوذ برب الفلق"
- يا سيدى ما قولنا ما شاء الله.. بس بجد جايب منين خلق وصبر تتط وتشيل وتجيب ومش بس كده دأنت مسيبتش الموضوع.. تغطية مستمرة ولا المراسلين
- مأننا مراسل حضرتك والمهنة تحكم
- بجد.. طيب وبتغطى إيه فى مطروح
- بغطى على بلاويها

- بلاوى إيه بس ما كنت اخر فرفشة.. الظاهر إنى
حسدتك بجد

- لا خالص.. بس بلد فيها شوية شواطئ مالهمش زى
والاخر أسعار نار وخدمة مفيش.. وبعدين سيبك منى
وخلينا فيكى أنتى.. رقم أهلك أكلهم.. نفسى فى البراءة
والنبى.. ورايا شغل

- لا مفيش داعى وأنت براءة وأسفة إنى عطلتك وشكراً
تانى

- بعته تانى.. بحسى الصحفى أقدر أقولك إن سيادتك
بتمرى بمشكلة فى الغالب عاطفية وعليه واقعة مع أهلك
- تقريباً.. بس أنا مش واقعة معاهم ودومت دأنا كمان
واقعة من حساباتهم

- أقدر أعرف ليه ولا أبان حشرى

وقبل أن تجيبه عادت عايده تستأذنه بالإنصراف فموعد الزيارة
قد أنتهى قبل قليل، نظر لساعته فشعر بالإحراج

- أسف تعبتك بالكلام وطولت من غير ما أخذ بالى

- بالعكس كلامى معاك ريحنى كتير

- يعنى ممكن أعدى عليكى بكره

- أكيد يا..... إلا صحيح اسمك إيه؟

- معترز.. معترز القاضى

عله يكون قاضيتها المنصف بعد تاريخ عامر بالخذلان.. هكذا تأملت، ساورتها الشكوك حول حضوره حين تأخر الوقت، بدا توترها جلياً حتى إن عايذة لاحظت ذلك عند مرورها عليها وسألتها إن كانت ترغب فى إستدعاء الطبيب، فجأة ظهر أمام باب حجرتها المفتوح، تبدلت تعابير وجهها فألنقتت على أثرها ممرضتها لترى الواقف خلفها، على الفور همت بالإنصراف قائلة بنبرة مُتَدَلِّلة "أظن خلاص مفيش داعى للدكتور".

- أفتكرتك مش جاي

- كانت هتفرق معاكى

- يعنى.. مش كان فيه سؤال منك وأنا لسه ما جالوبتوش..

أقله تعرف بدافع فضولك كصحفى

- أو بدافع فضولى كإنسان ممكن أقدر أساعدك

- من زمان مش لاقيه اللى يسمعنى علشان كده عاوزه

أحكيلك رغم تأكدى إنك مش هتقدر تساعدنى

- وأنا معاكى لحد ما يطردونى زى إمبراح

- ما كانش عندى أى مشاكل فى حياتى بخلاف العادية
 طبعاً زى كل الناس، لحد ما قابلته فى الكلية، مش
 عارفه إزاي قربنا بسرعة كده رغم إن كل واحد منا من
 دنيا، إحتمال حبى لكسر القوالب.. الخروج عالمألوف
 والعادى، كان مكافح بيشتغل ويساعد نفسه وأهله كمان،
 موس مذاكرة مضمون تعيينه بس ظروف وفاة والده
 لخبطت كل خططنا، بابا بمعارفه عيني فوراً فى وظيفة
 محترمه، أما حسان قضاها كعب داير وأضطر يقبل بأى
 حاجة والسلام بس علشان يتجرأ ويجى يخطبنى وفعلاً
 أول ما حصل طار على بيتنا

- وطبعاً ولع بيتكم أول ما حط رجله فيه

- وأى ولعه.. أنا عمرى ما شوفت بابا ببيكلم حد
 بالإستهزاء ده ولا كأنه على ابن الجنائى اللي جاى
 يخطب أنجى بنت الباشا

- أكيد الفارق المادى والإجتماعى اللي خلاه يتصرف
 كده.. وده طبعاً المتوقع فى ظرف زى ده

- يمكن.. بس زى ما تقول الرفض مع اللي فى سنى
 بيحفز هرمون التمرد.. بينشطه بزيادة.. قال يعنى
 كبروا ويقدرُوا يأخذوا قراراتهم بنفسهم ويبقوا ادها

- أوعى تقولى ركبك العند
- ياه.. دأنا ساعتها قلبت الدنيا ومن يومها ولسه
- مأتعدلتش.. سيبت البيت وغضبت عند عمتى وطلبت
- منها تضغط على بابا يوافق وإلا هأنتحر
- لا بقى دأنتى من يومك غاويه إنتحار
- شخص خمس سنين ما لفتش نظره بنت غيرى..
- حسسنى بجد إنى أميرة وماليش زى تفكر هأتخلى عنه
- ببساطة
- وطبعاً أتكلتى على الله وخربيتها
- عرفت إزاي؟
- من رقدتك فى المستشفى لوحذك.. مش عاوزه فكاكة
- يعنى
- مقبولة منك
- يا ستى مش قصدى.. أنا طبعى ما أقولش كلمتين جد
- على بعض
- عموماً أنت قولت الحقيقة.. أنا فعلاً خربتها.. أتجوزته
- وبيعت أهلى بسذاجتى علشان وهم دفعت تمنه من
- عمرى سنين

- ليه هو على.. قصدى حسان قصر معاكى يا سمو
الأميرة
- دا قصر رقبتي ادام الكل وعلى يدك كان هيقصر عمرى
كمان.. شوفت معاه عقد وكلايغ الدنيا.. من أول
معاملتى مع أهله واللى كان بيتهمنى فيها بالإنزحة ولحد
شغلى وخوفه من إنه يقوينى ويخلينى أفكر أسويه ففضل
ورايا لحد ما سييته أو بالأصح هما اللى فسخوا عقدهم
معايا
- ما يمكن حس بإنك ندمانه على جوازك منه وتضحيتك
بأهلك علشانه فعل كده علشان ما يخسر كيش وده لأنه
بيحبك
- مش هنكر إنى بمجرد ما أتجوزنا وأهلى قاطعونى
حسيت بوحدة كرهنتى فى حسان.. هو صحيح مش
حرضنى عليهم بس كمان لا منعنى ولا نصحنى
- مش قادر أتعاطف معاكى.. بالعكس أنتى أساءتى للكل
بما فيهم حسان.. الحكاية كلها كده كانت عند فى عند
من بنت مدلعه وحابه تحس بنفسها وملهاش أى علاقة
بالحب
- متقلّش هو خد حقه تالت ومثلت

- إزاي؟
- حضرتك بعد الثورة كان من أول اللي أستغنوا عن خدماتهم.. وتخيل بقى ضيقة الفلوس لما تضاف لضيقة الخلق.. إهانة تلاقى.. شتيمة تلاقى.. ضرب تلاقى
- معقول.. فينه الحب!!
- مانت قولت الحكاية ملهاش أى علاقة بالحب.. بس برضه هو أتصرف وجاب فلوس
- لقي شغل تانى؟
- لا المره دى الشغل هو اللي لقاه
- مش فاهم؟
- يعنى اللي زيه مشروع بلطجى مضمون نجاحه.. محتاج ومحبط وبعدين هو جته وصحه ويعجبك أوى
- بتهزرى
- ياريت كان ليا نفس.. وبعدين أنا بأتكلم عن تجربة.. طيب دأنا ياما نحيت منه بأعجوبة وعلشان كده قولت أموت نفسى بنفسى وأهو بيقى بيدي لا بيد حسان
- فكر برضه.. طيب حيث إننا فى لحظة فضفضه ممكن أسأل أنتى ليه مجبتيش سيرة ولاد رغم جوازكم لسنين
- حملت مرة.. بس بيبي إيه اللي يتحمل اللي كنت فيه

- كنتى!!.. هو أنتى أتجراتى وطلبتى منه الطلاق
- طبعاً لا.. جات من عند ربنا.. مات أو بالأدق أنقتل
- وده مين اللى عملها؟
- فى شغلته دى متسألش ليه وإزاي و مين لأنها النهاية المنطقية
- وطبعاً رجعتى لأهلك
- اه وجابولى حاجة حلوة.. إيه البساطه دى!!
- مالى كنتوا مختلفين عليه راح
- بس راحت معاه حاجات كتير.. سمعة أهلى وسيرتهم اللى بسببى بقت على كل لسان
- جربتى؟
- أنت بتعلم
- وماله هو فيه أحلى مالأحلام.. أنا بقول تجربى ومش هتخسرى أكثر مالى خسرتيه
- ماليش عين أكلهم
- أكلهم أنا
- أنا بس عاوزاهم يسامحونى وساعتها بس هقدر أبدا من جديد
- فاكراه عنوان بيتكم ولا

- فاكروه.. فاكروه
- طيب هاتى ما عندك وربنا يقدم ما فيه الخير
- سبقها السائق يحمل حقائبها لسيارة والدها، همست درة لقاضيتها.. هذا الذى لازمها طيلة محنتها حتى تخطتها فبات الأقرب إليها.
- أنت شربت بابا إيه؟
- ولا أى حاجة.. بس فهمته إن عندك مرض خطير وأيامك معدودة
- وبعدين هبقى أتصرف إزاي؟
- محلولة.. قضيتها إنتحار يعنى عادتك ولا هتشتريها
- أتكلم جد شويه بقى
- الجد ما كانش هيخلينى أشوف البسمة اللى مالیه وشك دلوقت

ليست الدنيا بالضيقة.. فربما وحدك من يراها خلال ثقب.

نشوة البداية

لا تذكر كم مضى من وقت لم تنتظر فى المرأة، لم تلمح عقارب الساعة وهى تجرى مسرعة تسابق نفسها وتسابق بعضها، منذ متى لم تعد تطالع النتيجة أو تكثرث لنزاع أوراق ما مضى.. فأشباحه تطل عليها من كل ورقة مما بقى، جف القلم فما من جديد ليخطه، واقع أشبه بحلم وحلم أشبه بكابوس.. وكابوس يطاردها يعاد كل ليلة بنفس شخوصه وأحداثه وتفصيله، بقايا أحبة وشظايا فراق ومفترق طرق وعليها الاختيار.. واختارت الفرار.. ليس لأنه طوق النجاة ولكنه ربما يأتى بجديد تحت شمسها، حتى وإن كان فى الجديد هلاكها فلا بأس فقد سَأمت رتابة حياتها.

إنها البدايات ومالها من سحر خاص يسرى فى أجسادنا كمخدر، فلا نشعر سوى بالنشوة فنغض البصر عن كل حقيقة ونصم الأذن عن كل نصيحة، تعلو أصواتنا بالجدل فتنتبث هوة تفصلنا عن حولنا ويتسلل إلينا البرد رغم حرارة الجو، تتغير ملامحنا حتى نصبح بالكاد نعرف أنفسنا.

"عداً بداية جديدة" تلك كان عزمها قبل أن تخذل للنوم فى انتظار صباح تأمل أن يمنحها شهادة ميلاد جديدة.

شارفت أن تكمل الأربعين، لن يتصور رجل وقع هذه الكلمة على امرأة... الأربعين حيث يقام حفل تأبين لأنوثتها، حتى وإن أصرت على الاحتفاظ بشبابها ونضارتها.. نعتوها بالمتصابية لِيُضَافَ هُماً إلى هُماها، ولكن تلك المتمرّدة القابضة بداخلها.. والتي أَسْتَيْقِظَتْ لتوها بعد عقود من السبات.. الطموحة.. المتطلعة دوماً للسماء لا للأرض التى يحيا عليها الناس، قررت أن تهدم أسوار العزلة لتخرج للحياة.. تفعل كل ما قد يسعدها وحرمت منه نفسها دون مبررات، وما العيب فى أن تفعل ما يحلو لها مادامت لا تضر غيرها؟.. غيرها ممن يخطون مسارها.. ستتعلم ركوب الدراجة وتطير بها ليملاً الهواء النقى رثتها، أمنية قد تبدو بسيطة ولكن عندها ذات قيمة.. حال بينها وبين تحقيقها فى صباها كونها فتاة، ستأخذ دروس البيانو أكثر الأصوات ملامسة لقلبها، ستكمل دراستها العليا لتصبح طالبة وزميلة لمن فى عمر ابنها.. ومن ثم ستبدأ عملها الخاص.. ستجازف بكل ما أدخرت فرشفة واحدة من السعادة تستحق المجازفة، فلتسقط كل القوانين وتتكسر كل الحواجز، لا وقت للتراجع فقد تمكن المخدر من كل خلايا جسدها، تطلعت للسماء

وهى محتضنه أحلامها ترشف من السعادة وتدعو فى سرها أن
تدوم نشوة البداية.

جالت ببصرها فى المدرج وأبتسمت فى رضا، ليست وحدها..
كثير هم من يأملون فى بداية جديدة مثلها، ممن لا يعيرون إهتمام
لما تحويه الأوراق من تواريخ ميلاد، خطت نحوها فى رشاقة
فراشة مادة يدها مصافحة.

- مساء الخير.. بثينه.. وحضرتك
- نبيلة
- مخضوضة ليه، شكلك جايه من بعيد أوى" قالتها
مداعبة"
- لا أنا بينى وبين الكلية مفيش نص ساعة
- ههههه.. مش قصدى سكنك.. قصدى بعيدة عن جو
الدراسة والمدرجات وكده
- اه.. يبقى أعتبرينى جايه من أبعد مكان فى الدنيا
- أنا بقى يا بلبله قدمت السنه اللى فاتت ومعديتش وربنا
يسهل بقى المره دى وأعدى

لاحظت دهشتها من لهجتها الحميمية وكأنهم معرفة عمر لا
بضع دقائق فواصلت حديثها

- أول ما دخلتى حسيّتك شبهى، نفس توهتى.. نظرة القلق
والأمل.. حد باين إنه جامد بس من جواه طفل خايف..
كنت ساعتها محتاجه اللي يطمنى.. يأخذ بايدى..
يونسنى

- أنتى تسبيك من دبلومة التخطيط وأدخلى على دبلومة
تنمية بشرية

- مش قولتلك شبهى.. أديكى أندمجتى.. يبقى نعيد
التعارف.. بسبوس.. وأنتى

- بلبله.. لسه خارجه مالفقص.. رغم ريشها القصير
ووزنها الثقيل برضه بتحاول تطير

جلستا متجاورتين وساد الهدوء بمجرد دخول المحاضر.. والذى
ما أن وضع حقيبته وفتحها ليخرج منها بعض الأوراق حتى
تبعه عامل راح يقنن وضع السبورة و"البريجيكتور"، وبمجرد أن
أنتهى وخرج مغلقاً الباب خلفه ألقت إليهم مرحباً.

- أهلاً ببيكم.. الملتحقين بالدراسات العليا زملاء قبل ما
يكونوا طلاب.. ولذلك أى ملاحظة على أسلوب عرض
المادة العلمية مرحب ببيها، المهم المعلومة توصلكم..

بأتمنى للكل النجاح والتوفيق.. على فكرة بشينه ومحمد
دفعتى.. منورين يا شباب

بدأ دكتور راشد فى الشرح بطريقة مبسطة، رغم ذلك أحست
بصداع أفقدها التركيز.. فكرت فى الإنصراف ومنعها الإحراج،
وما أن أنتهت المحاضرة حتى أنفجرت بسبوس فى الضحك.

- أراهن إنك فصلتلى بعد أول ربع ساعة، وتلاقى يا
عينى عندك صداع ودوار.. متقلقش يا بنتى دى
أعراض طبيعية جداً للصحيان بعد طول نوم.. ورايا
أعزمك على فنجان قهوة هيصالح ما أفسده... إلا صحيح
ديما أسال نفسى هو مين اللى أفسده؟

لحظتها شاب لهجتها نبرة حزن فصمتت تم سرعان ما عادت
إليها حماستها

- باب القفص مفتوح يالا نظير يا بلبله

منذ أعوام لم تحظى برفقة، أعادت إليها الجلسة.. الكتب التى
تملاً حقيبتها.. الحوار المرح بعضاً من حيويتها وأيضاً
ذكرياتها.

كانت الحياة شبه مثالية، هو.. هي.. طفلهما.. وكأنا أختزنت
الأحزان لتأتيها مرة واحدة.. مفاجأة.. لم تأخذها بها رافة ولا
رحمة، تعرفت إليه يوم تعرفت لنفسها، أهداها قصصه.. كتبه..
ألوانه.. ألعابه وعلى رأسها دراجته الزرقاء والتي لم يكن ليجرؤ
أحدًا من أخواته حتى لي تجربها، ساندها حتى احترفت قيادتها،
أنطلقا حتى تشبعت رثتيهما بالهواء وقلبيهما بالحب، يكبرها سنًا
بسبع سنوات ميلادية وعقلًا بسبع سنوات ضوئية أو هكذا خُيل
لها، فما سألته عن شيء إلا وأجاب.. بل وأحيانًا ما يجيب قبل
السؤال، يقرأه في عينيها وكأنما كُشف عنه الحجاب، بهاء..
حبيبها.

- بلبله بلبله.. بلبله
- هه
- ياه دأنا وقعت مع بلبله تايهه مش عارفلها عش تحط عليه
- العش كان موجود دفيان بونيس وفرخ صغير بالفرحة ماليه
- وبعدين!!
- وبعدين أنا هموت مالنفس.. عاوزه أناااااااام

- شربتي قهوة وهنتامى.. ماشى بكماله الجدعنة أوصلك..
- عارفه العش ولا هقضى الليلة بلف
- أطمنى.. مفيش حاجة هتلف الليلادى إلا دماغى

فى العش صور حبيسة الأطر، وأرواح تحتلها تجبرها على التعبد فى محرابها، لأول مرة على مر سنوات وليالى لا تحصى عددها تتحرر منها تذهب فى سبات عميق.

أخف هى هذا الصباح، تحممت وقفزت للميزان.. لم تخسر من وزنها شيئاً.. ربما خسرت شيئاً آخر.. الكابوس، تناولت إفطارها، أرتدت بنطالاً فضفاضاً وقميص وردى من القطن وأخيراً أنتعلت حذاء رياضى، فى الغرفة المهجورة أزاحت الغطاء عن الدراجة، أصابتها رجفة أخطفت نفسها منها فى لحظة، فى طريقها للنادى كانت تطبق عليها بكلتا يديها وكأنها حديثة عهد بقيادتها، شابها إحساس القلق فغائب هو من كان يمسك بها دوماً.

لفظت رثتها هواء أفسده حصار هى من فرضته على نفسها قبل غيرها، أستبدلته بآخر بكر يليق ببداية، أخطفه الموت بعد زواج أو بالأحرى بعد جنة سكنتها ست سنوات، هبطت بعدها وابنها للأرض، باؤا بغضب من عائلته وضربت عليهم الذلة والمسكنة،

أنهم البشر لا الله.. هؤلاء من لا يعرفون الغفران مهما تلقوا من كلمات، فما من مجال للتوبة.

ملعونة تلك الوجبة.. أحضرها ليتناولها عند وصوله من العمل عصراً إذ كانت هي بصدد آخر إختبارات البكالوريوس.. لم يقدر الله له النجاة.. بعدها لم تتناول لحماً قط أياً كان مصدره.. ليس خوفاً من الموت ولكن خوفاً على أشرف.. عاملها والداه وكأنها الجانى لا المجنى عليه، دفنت أحلامها معه وأحتضنت فقط ثمرته.. يتيم لم يكمل الخامسة بعد.. ما أن أتم دراسته الثانوية حتى أصرا جده على إستكمال تعليمه الجامعى بالخارج، تحجج بأن المستوى العلمى أفضل بكثير، أفصحت نظراته عن مكنونه، أراد أن يحرّمها ولداها كما حرّمته ولده.. لم يكن ظنه وحده.. فلهذا أطمأنت نفوسهم جميعاً، فهناك من سيصبون عليه جم غضبهم.. يشبعونه مرارة حزنهم، ربنت يد على كتفها أعادتها لنفسها.

- نبيلة فينك من زمان.. وإيه اللوك الجامد ده
- وهروح فيكى فين يا سميرة.. وحشتينى عامله إيه مع الدنيا
- مدوخاها.. كل ما تطق فى رأسى حاجة أجربها فيها

- وبعدين؟
 - لا هى أخرى التجربة.. البداية كلها حماسة.. شمعة فلة منورة.. بس الشمعة مبتعمرش بتسيح وتطفى ويادوب بأطلع بالفلة.. بس برضه كام يوم وأبدأ من جديد.
 - نصيحة غيرى الشمعة، موضتها بطلت.. دورى على حاجة يدوم نورها.. حاجة مش هتلاقيها غير جواكى.. جواكى وبس.. وكفياكى فل بقى
 - طيب ما تيجى نلف مع بعض شويه وندور سوا
- قضت النهار مع سميرة وبعض من أصدقائها القدامى، أستأذنت بعد تناول الغداء على وعد لقاءهم بحفلة موسيقية بالأوبرا فى نهاية الأسبوع، ركبت دراجتها.. أنطلقت بها وقد أفلتت يدها، أسرعت للبيت تستبدل ملابسها تتوق لرؤية بسبوس وسماع دكتور راشد، هاتفها أشرف وهى فى الطريق.
- أزيك يا ماما.. وحشتينى أوى
 - وأنت أكثر يا حبيبى.. عامل إيه فى دراستك
 - أول مرة تسألينى عن دراستى.. هو سؤال واحد ديما.. هترجع أمتى؟
 - زعلت!!

- بالعكس أول مرة صوتك يبقى بيضحك مش خائفه الدموع.. ربنا يفرحك ديماً يا أمى
- ويوفقك ديماً يا حبيبى.. إنما أنت هترجع أمتى؟

أنتهت المكالمة بضحكاتهم..

إذا أردتَ معاقبة امرأة..

فقط اتركها لبنات جنسها ومن ثم سيتكفلن بأمرها وزيادة.

وعد ومنكوث

- يا اختى عشنا وشوفنا واحدة تسيب جوزها وعيالها وتروح تعمل فيها عروسة من أول وجديد.
- قلة أدب، حريم تستاهل قطم رقبتها.

لم يبخلا عليها بأيّ من النعات، أثرت الصمت واستندت لزجاج النافذة، تلاحقت الصور إلى ذاكرتى بسرعة تنافس القطار اللاهث، فاطمة فى زيتها المدرسى، فتاة فى الثامنة عشرة من عمرها، جميلة الملامح، رقيقة المشاعر، هادئة.. لا تغادر الإبتسامة وجهها،

"مستر" مجدى بمظهره الكلاسيكى الأنيق وجديته التى تتخلى عنه فقط فى حضرتها، نصنع دائرة بالطبع هو على رأسها، يختلس النظر إليها أياً كان موقعها منه، يمينه.. يساره أو حتى مباشرة أمامه، يكسو الفرح صوته حين يوجه إليها الحديث، وتلمع عينيه حين تجيبه.

- أشوفكم بعد بكره هنعمل مراجعة محدش يغيب.
- بس دى ليلة الإمتحان يا مستر.

- لازم أظمن عليكم، إن شاء الله كل واحدة فيكم تدخل الكلية اللى بتتمنّاها.

- نفسى أبقي مدرسة إنجليزى شاطرة زيك.

- وتعملى رأسك برأسى يا ست تقى، ماشى أنا راضى

ربنا ينولها لك، وأنتى يا فاطمة منفسكيش تبقى زيى؟

- وهو فيه حد زيك، حضرتك أشطر مستر فى الدنيا.

أنوار وزينات، فاطمة فى ثوب وردى، يحتضن مجدى كفها بقوة وكأنما هناك من يتربص به ليأخذها منه عنوة، نصنع دائرة على رأسها الحبيبين، يلف أصبعها بخاتم رقيق، ينعكس لون فستانها على بشرتها الخالية من المساحيق، يردد الجمع "حلوة يا واد وصغيرة تملى عليك المندرة، حلوة يا واد وبيضا تملى عليك الأوضة".

أصر على أن تكون الخطبة شهرين لا أكثر، ولما الإنتظار وبيته لا ينقصه سوى العروس.

- يا ابنى هى نفسها تدخل الجامعة.

- وأنا عمرى ما هخلى حاجة فى نفسها، هتختار الكلية

اللى تعجبها وأنا معاها لحد ما تاخذ شهادتها.

- بس هي عاوزة الصيدلة، يعنى المشوار طويل ووارد
- طبعاً فى الفترة دى يكون ربنا رزقكم بأطفال.
- تحت أى ظرف أوعدك هتاخذ شهادتها.
- عالبركة ربنا يتم بخير.
- يبقى نكتب يا عمى علشان خروجنا ميقاش عليه حرج.

كان يلزمها كظلمها من مكتب التنسيق للكشف الطبى وحتى إستكمال أوراقها بالكلية وحصولها على الكارنيه، وتم الزفاف بعد إن إطمانت لالتحاقها بما كانت تتمناه، دلها حد بدت كطفلة لا زوجته، أستدارت بطنها وزادها الحمل جمال حتى خيل له أن القادم أنثى، تمنى لو كانت تشبهها، فدائماً ما يشغلنا ظاهرنا.

تغير مجدى بعد أن وضعت، أصبح يلومها على كل شئ، إذا ما هددت على لينام أتهمها بإفساده"دا هيطلع راجل مايص ابن أمه"، تساءلت كيف يُربى الرجال.. أنتهره إذا ما بكى وهو مازال رضيع لم يتجاوز شهره الخامس، تتركه لوالدتها وتذهب لكليتها يتهمها بالإهمال "تسيبيه لأمك وهو فى العمر ده، طب ترضعه إيه.. فته"، أليس برجل، ألا يليق به إن يدبر أمره، يعتمد على نفسه فى الحصول على قوته، فليأكل ويهضم حتى وإن أطعموه الزلط.

حفر الشجار طريقه لبيتهم، نثر ذراته فى كل ركن، تحملت.. حاولت إرضاءه.. ولكنه عزم وحان الوقت ليفصح لها عما أنتوى.

- فاطمة الكلية دى شغلها كثير ومشوارها طويل.
- قصدك إيه؟
- أنتى لازم تحولى لإنتساب.
- إنتساب!! هى صيدلة فيها إنتساب؟
- طبعاً هتحولى لكلية تانية، نقول مثلاً آداب، وأهو حتى أقدر أساعدك مالبيت.
- مقدرشى.
- يعنى إيه؟
- يعنى مقدرشى أكمل غير فى الحاجة اللى اخترتها وتعبت علشان أوصلها، ومأظنش إنى قصرت فى أى من مسئولياتى.
- لبس وخروج كل يوم ومسئولياتك، يا شيخة راعينا شوية.

احتد النقاش بينهما وباتت فاطمة دامعة، فى الصباح أستيقظت لتجده خرج مبكراً عن مواعده، مرت ساعة ودق الباب.. كانت والدتها.

- مجدى جالى قبل ما يروح الشغل، أسمعى كلام جوزك يا بنتى.

- ووعده.

- ياه.. مفيش أشطر مالخطاب فى الوعود وساعة الجد بيبقى يحنن.

- بس دا كان بيحبنى أوى، كل همه يشوفنى مبسوفة.

- ولسه بيحبك يا عبيطة، بس معذور، جميلة وأصغر منه باتناشر سنة وبيأكل فى روحه كل يوم وأنتى فى وسط اللى من دورك.

- غيرة يعنى!

- دا هيموت مالغيرة حتى من إبنه اللى أول ما تيجى من بره تجرى عليه.

استسلمت فاطمة، لم تجد من يساندها حتى والدها وافق أمها الرأى "متخربيش بينك بإيدك"، أستدارت بطنها وزادها الحمل إكتئاباً، لم ترد طفل آخر ولكنه أراد، لم ترغب فى دراسة أخرى

ولكنه رغب، أضحت مؤدياً للدور الذى يوافق هواه، تعيش السيناريو الذى يختاره لها.. تلك هى الحقيقة، رغم ذلك لم تكن لتتكرر تحسن علاقتهما بعدما أعلنت السمع والطاعة.

عادت الأمور لأسوء مما كانت عليه بعد قدوم عمر، أمرها فأجابته، تركت الجامعة وتكفلت بمواساة نفسها" مفيش أشطر مالمخاطاب فى الوعود وساعة الجد بيبقى يحزن".

انشغل مجدى أكثر بعدما أفتتح مركزاً للدروس الخصوصية، لم يعد لديه وقت ليدللها أو حتى ليشاكلها.. فقط يأبى أن تخرج دون رففته فباتت لا ترى الشارع لأسابيع متتالية.

- عشر سنين محدش سقط من تلامذته إلا أنا، سقط فى كل حاجة مع جوزى مع عيالى حتى سقط فى العلام.

قالتها فى زيارتى لها منذ عامين، خاضت فى كثير من التفاصيل المؤلمة، لم تكن سوى شبح لفاطمة، من تكفل بإطفاء لمعة عينيها.. باتعاسها إلى هذا الحد، طوال الوقت كانت تغالب دموعها فتغلبها.. تسقط رغماً عنها.

- غلطانة مجدى بيحبك، اختارك من دون عشرات البنات، وولادك ما شاء الله زى الورد مفيش أحسن

منهم، والشهادة بيخدوها ويبروزوها أو يتبهلوا لحد ما
يلاقوا شغل بيها، يا بنتى دأنا بقعد فى القطر أكثر ما
بقعد فى بيتنا رايح جاى على ملاليم، انتى ناجحة وزى
الفل.

- الناجحين سعدا وأنا تعيسة.

لم أשא أن أخبرها بما سمعت من شقيقتى، وما يتناقله زملاءها
عن علاقة مجدى بتقى تلميذته سابقاً وشريكته فى المركز الجديد
حالياً.. وربما فى أشياء أخرى وما تثيره تلك العلاقة من شكوك
حولهما، لذا لم يفاجأنى خبر طلاقها.. فقط فاجأنى دهشة الجميع
لزواجها بآخر.. لإستعادتها نفسها.. فهل كان عليها أن تستسلم
دائماً وأبداً.

ورحمته وسعت كل شيء.. أما البشر فلا تتسع حتى لأنفسهم.

ولأنه أكرم بكثير

"معلش أتحمليه شوية" قالتها للفتاة الجالسة إلى جواره بنبرة أقرب للبكاء، أرادت الهروب من نظراتها.. خوف كانت.. شفقة أو اشمئزاز فأشاحت بوجهها باتجاه النافذة، سابقت أشباح الأمس أشجار الطريق.. احتلت ذاكرتها.. أحكمت عليها السيطرة بفعل الأعمدة المضاءة فقط على جانبي فصى منها.

- ربنا عوضنا خير، كلها شهر ويحيى يرجع يملى تانى علينا البيت
- يحيى لا.. هنسميه محمد
- ليه؟.. خلى اسمه عايش بينا على طول
- بلاش.. سيب الجرح بيرد، وبعدين بيقولوا دا فال مش حلو
- مين اللي بيقولوا.
- مامتك وأختك، "مادام واحد راح يبقى راح اسمه معاه ولو سميتى أخوه باسمه هياخد نصيبه ويكتبله مصيره"
- يا سلام.. عموماً يا ستى أنا مش ادكم اللي تشوفوه اعملوه
- يبقى محمد وأظنه اسم ميختلفش عليه اتنين

فارقها يحيى فى سن الثلاث سنوات، أصابته حمى، ليلة واحدة وأنقضى الأمر، رضيت بقضائه وطمعت فى جبرانه، عامان دون حمل صابرة على تقلبات زوجها بعد كل زيارة لوالدته.

- ما تشوفى حل يا بنتى.. هو أنتى قولتى مرة وربطى على كده

- دعواتك يا أمى

- بأدعيلك.. هو أنا منفسيش أشيل عيل لابنى.. بس على رأى المثل "أسعى يا عبد وأنا أسعى معاك" وأنتى باركه مكانك

- ده أنا مخلص، دا الإيجار اللى بييجى من ورث بابا اللى يرحمه رايح كله عالدكاتره

- ههههه دكاتره!!.. وبتوع الورقة والقلم دول يجوا من وراهم خير دول عليهم خراب البيت.. أشعة وتحاليل وما أعرف إيه ومدرك إيه.. بلا وكسه

- يعنى أروح لمنجد.. "قالتها مداعبة محاولة تخفيف حدة حديثها"

- لا ما قولتلك مليون مرة.. تروحي للشيخ زينهم، تلاقى حد عاملك عمل يقطع الخلف، حكم أحمد ابنى كان نص بنات العيلة عينها منه

- بس هو بقى كان عينه منى أنا وبس.. وبعدين يا أمى
مأنا خلفت قبل كده بس أمر ربنا بقى

- ماعترضناش ولا حاجة.. بس أهو كان وبع خلاص..
واديكم داخلين عليا فاضين لا شايلين ولا جارين

تتقضى بعدها أيام وهو ساهم يرمقها بنظرات مزيج من اللوم
والغضب.. العتاب والضجر..

تُرى هل يراها مقصرة كوالدته؟..

جاهدة تحاول إرضاءه.. تسريته.. تدليله برغم أنها الأكثر حاجة
لكل ذلك.

وأخيراً من الله عليها دون تدخل زينهم وشاكلته، ويوم جأها
المخاض تبعها للمشفى جمع من الأهل، عم الهرج المكان رغم
إتمام الأمر بسلام، وفجأة تحولت حجرتها لسرادق عزاء، للحظة
ظننت ان وليدها قد مات.. وليته كان.. فلربما كان رحمة له من
رحلة معاناة نهايتها شبه محسومه، فمثله ممن يعانون حالته
تتقضى سنوات طفولتهم بين مراكز التأهيل وعيادات العلاج
الطبيعى إلى أن يحين الأجل مع بداية سنوات المراهقة، هذا ما
نما لعلمها بعدما أصبحت زبونة مستديمة على تلك المقار.

وحدها تتكبد عبء حمله مع كرسية فى المواصلات.. وتتكد
أكثر عبء النظرات، هجرها أحمد، تزوج وأقام فى منزل
عائلته.

- "مهو خبطتين فى الراس يوجعوا يا مديحة، واحد مات
والثانى عيان.. هيعملك إيه قدمك نحس.. سيبه بقى
يشوف حاله وكفايه الهم اللى شافه معاكى"، قالت والدته
وكانها تخاطب حجر لا بشر.

سبع سنوات عجاف أنفقت فيها جل ميراثها على علاج ولدها،
وبرغم ما يزعمه الناس ويؤكداه الأطباء من عدم جدوى تعبها إلا
إنها تنتظر نهاية سعيدة.. تتصفها..

تعوضها، ليس لأنها تستحق.. ولكن لأن الله أكرم بكثير من أن
يتخلى عنها كالجميع.

وكما الولادة المبكرة فهناك أيضًا الوفاة..
الأولى قهرية أما الثانية فقهر.

ونادى المنادى

سترها الله معها.. فعلى مدى عامين لم تتلقى نبأ أحدهم وهى فى العمل.. منذ يومهما الأول أنجذب كلاً منهما للآخر.. صحيح لم تواتى أمجد الشجاعة لمصارحتها بمشاعره إلا بعد مضى عام.. إلا إن نغم أطمأنت لتوانيه فى إعلان حبه.. فهو ما يعنى لها تأكده من صدق مشاعره.. بادلته عاطفته بعاطفة أكبر.. كانت حريصة على معرفة أدق تفاصيله.. ما يسعده وما يزعجه ولو كان حتى إيماءة أو إشارة.. أخيراً توجت العلاقة بشكل رسمى.. حفل عائلى صغير وإطار أحاط قلبها كما أصبغها.. بعدها أمتد إهتمامها لكل من يعنيه أمرهم.. والديه وشقيقته الصغرى.. باتت صديقتها المقربة.. ترافقها إن أرادت التبضع.. وتضطجبعها للتنزه إن هى رغبت ببعض الترفيه وكسر الروتين.. أضحت أيقونة سعادتهم والزوجة المنشودة لإبنهم البكرى.

- الحمد لله يا حسين.. أنا لو كنت لفيت الدنيا بدل المرة عشرة مكنتش هلاقى زى نغم.. بنت ليا وأخت لجيهان.. طب دأنا بحس إنها أتولدت فى وسطنا.. عارفه طبعنا ومراضيه الكل.. ولا شوفتها مرة معكرة ولا مرة مكشرة.. بسمتها مش بتفارقها.. دى بركة دعايا لإبنى.

- صحيح البنت منتعيش لاهى ولا أهلها.. ناس يفهموا فى الأصول بحق.. احنا كمان عاوزين نشد حيلنا ونتمم جوازهم بسرعة.. والفرح وشهر العسل هدية منى بعون الله.. يختاروا على كيفهم.. اللى يعجبهم ما كلوا ليهم فى الأول وفى الآخر.

- إيه رأيك نعزمهم على فطار أول يوم رمضان.. وفرصة نغم تبص عالشقة ولو ليها تعديل أهو نلحق نعمله قبل الدهانات الأخيرة.

- دا أقل واجب يا حاجة.. وبعدين هو رمضان يحلا غير بلمة الحبايب.. ربنا يعيده للجميع بخير.

ارتفع الأذان وألقت الجميع حول المائدة العامرة بألوان الطعام.. لم تدخر زينب وسعاً فى إكرام ضيفتها وقريباً فرداً من أسرتها.. علت إبتسامة الرضا شفتى أمجد.. طمأنته علاقتهم الجيدة.. وعدته إن ينعم بحياة زوجية هادئة فكل على ما يرام.. دق هاتف والدته فأهملت نداءه إذ كانت منشغلة بضيوفها.. ألح الطالب بتكرار المحاولة فأضطرت لإجابته.

- أزيك يا فريال.. كل سنة وأنتى طيبه.. يعيده علينا بخير يا حبيبتي

- يارب يا زينب
- مالك صوتك مغير ليه؟
- أصل فى خبر كده عكننى من قبل المغرب بس قولت
أستنى لما تفطرى وأقولك
- خير قلقيتتى.. جرى إيه؟
- ألفت بنت سميرة
- مالها؟
- تعيشى أنتى
- يا لهوى.. دى عيله
- عمرها كده.. احنا لينا فى نفسنا حاجة.. وعمومًا
الخارجة فى العشا بعد صلاة التراويح.. هتيجى؟
- عندى نسايب أمجد ومقدرش أسبيهم.. وبصراحة كمان
مقدرشى أتحمل موقف زى ده.. أنتى عارفه جنازة
شابه راحت فجأة هتبقى نار.. هروح بكره إن كان لينا
عمر
- ماشى.. اللى تشوفيه.. ربنا يصبر أمها وما يورينا
حاجة وحشه فى ولادنا أبدًا
- أمين يارب.. مع السلامه يا حبيبتي

عادت للغرفة وقد بللت الدموع وجنتيها.. فهرع إليها الجميع
فزعين.

- خير يا حاجة.. بتبكي ليه؟.. حصل إيه؟
- ألفت.. ألفت اللي حضرت خطوبتك يا نغم وملت الدنيا
رقص وضحك وتطيط مانت.. مش قادره أستوعب ولا
أصدق والله

شخصت الأبصار لما أصاب نغم، بدت كنوبة قلبية.. أرتعاش
لجسدها وعرق متصبب بغزارة، هرع أمجد إليها.. وأسرع
والده فى إحضار السيارة لحملها للمشفى، فى حين تسمر والديها
فلم يبديا أى ردة فعل.. وكأن المشهد مألوف وليس هناك ما
يدعو للقلق!!.. مع ذلك لم يعترضوا على الذهاب للطبيب،
وانتهى الأمر بسلام.. لم يستغرق أكثر من عشرون دقيقة وما
لبثت ان عادت الفتاة لطبيعتها وكأن شيئاً لم يحدث.

اعتقدت أسرة خطيبها من أن ما يحدث لها لم يكن سوى فرط
إحساسها ورقة مشاعرها، أنزعجوا قليلاً ولكنهم لم يحملوا
الموقف أكثر مما ينبغى، حادثة عابرة وأنقضت.

أدت الحاجة زينب واجب العزاء فى اليوم التالى وأنتقت فريال
وصديقتها عظيمة

- زعلت إمبراح إنى نكدت عليكى وأنتى عازمة عروسة
ابنك

- النكد الحقيقى كان بعد ما بلغتينى

- ليه كفى الله الشر.. جرى إيه؟

- نغم.. راحت منا واتخضينا عليها.. وهوب بقينا نجرى
ورا بعضنا.. البنت مأتحمלתش الخبر.. أصلها طيب
والحنية مالية قلبها على القريب والبعيد

- هو أنتى عروسة ابنك تبقى نغم بنت الحاج سيد
المصرى

- وأنتى تعرفيها منين؟

- إلا أعرفها.. هو كان فى حد من الجيران ميعرفهاش

- قلقتينى.. هو فى إن فى الموضوع ولا إيه؟

- ولا إن ولا كان.. أنا بس كنت ساكنة جنبهم من قيمة
خمس سنين، والبنت يا عين امها كل ما تسمع حد مات
عاللى يصيبها، تفتكريها هتموت خلاص، وكانت أمها
الله يعينها ترقع بالصوت.. بس مع الوقت أتعودت.

- يعنى ايه مش فاهمة.. هى ملبوسة ولا ممسوسة ولا ايه بالظبط.

- لا أبداً.. احنا كنا فاكرين زيك كدة فى الأول بس الدكاترة قالوا دى حاجة نفسية

- نفسية.. يا مصيبتى.. مجنونة ولا ايه؟

- لا يا حاجة زينب، حد جاب سيرة الجنون.. هو بس شوية تعب، كلنا معرضين.. طيب والله أنا كنت فكرها طابت، الشابة مفيش زيها ربنا يشفيها.

عادت للمنزل بالكاد تحملها قدماها، مفاجأة أو بالأحرى فاجعة لم تكن لتخطر لها على بال، حمداً لله إن أنكشف الأمر قبل الزفاف

- ألحقنى يا عبد المجيد

- مالك يا حاجة.. متعمليش فى نفسك كده.. متعظمش عالى خالقها.. ربنا يجعلها من أهل الجنة.

- يا أخويا جنة ربنا فسح تساعها.. إنما نار البنى آدمين اللي أتكتبت علينا.. هودى وشى من الناس فين.. وهسد ودانى فى الرايحة والجاية من ايه ولا من ايه.

- نارايه وودان ايه... بعد الشر عنك يا حاجة أنتى تعبانة؟

- أوى أوى.. أوى.. العدلة اللي تبان ست العاقلين

- مين؟
- ست نغم
- مالها عملت إيه؟
- طلعت ترللى... عندها شعرة.. آه بقى لو حاجة لزتها يا داهية دقى
- والله ما فاهم حاجة.
- نعمة إنك مش فاهم... بس هفهمك ما أنا مش هسكت ويجرى ليا حاجة... عارف امبارح التعب اللى جه للهانم.
- آه.. والبنت أطمنا عليها وبقت زى الفل
- بلا فل وبلا ياسمين... دى طلعت حالة بتجليها كل ما تسمع خبر موت حد كات تعرفه ولو من بعيد لبعيد.
- يا سلام.. وعرفتى منين السر الخطير ده؟
- أنت بتتريق.. من عظيمة
- مين عظيمة دى كمان؟
- صاحبة فريال.. قابلتتى فى العزا.. وهى الله يباركلها اللى نورتنى وأنقذتنى أنا وابنى
- وأنتى اى حد يقولك حاجة تصدقيها
- وهى تكذب ليه؟

- أنا مقولتش بتكذب بس برضة مش أكيد صادقة... لازم نتأكد الأول
- وأنا لسة هسأل وأبحث
- إيه بتعلمي إيه؟
- هتشوف دلوقتي.
- ألو؟
- أيوة أزيك يا طنط.. عاملة إيه؟
- زى الزفت.
- هو فيه حاجة؟ حاساكي زعلانة منى
- بصي يا بنتي أنا لا ليا في الف ولا الدوران اللي أنتي طبعاً رضاعهم
- أنا مش فاهمة.. وضحي لو سمحتي
- أنتي ليه مقولتيش لأمجد عالحالة اللي عندك.. خبيتي ليه؟.. وأتاريكي لبسة توب الملاك ما طبعاً عاوزة تدبسيه.
- ألو ألو.. مبترديش ليه.. خرستي ليه.. ألو ألو
- إيه اللي هيبتيه دا يا زينب.. طول عمرك متسرعة وصوتك من دماغك.. مفكرتيش رد فعل أمجد هيكون إيه من تصرفك.

- وهو يقدر ينطق. دا أنا بنجيه.. حقه يشكرنى
- مكنتش فاكرك بالقسوة دى.. دأنتى حتى مستنتيش تتأكدى
- كان لازم أفاجأها فتقر.. مش تأخذ فرصة تفكر وتبلغنا زى ما بتعمل من يوم ما عرفتنا
- أمجد بيحبها وهيخرب الدنيا لما يعرف باللى حصل
- أخيراً وصل أمجد، أنطلقت نحوه تطلعه على سر حبيبته، تملى عليه ما يتجوب عليه فعله مع تلك المخادعة.
- أمجد يا ابنى.. هى خبت عليك.. بس أنا متأكد إنه مش علشان تغشك.. دا علشان بتحبك
- أوعى تسمعه.. ساعة ما تجيلها الحالة وأنت فى وسط الناس.. فضيحتك مش هيلمها كلام الرويات دا بتاع أبوك.. وحتى يا حبيبى لو سييتك مالناس.. أنت مش هيبقى معاك عيال منها.. ترضى بقى يشوفوا أمهم كل ما ينادى المنادى يقول فلان مات تفرفر وترهقهم.. دا غير مصاريف العلاج.. دا إذا كان ينفع اصلاً.
- فيه علاج يا زينب فيه.. أرحمى اللى فى الأرض يرحمك اللى فى السماء

- أرحمنى أنت ومتجلبش جلطة.. عاوزنى اسألك امجد
فين.. تقولى فى الخانكة عندهم جلسة
- أهدى يا أمى.. أهدى
- يعنى هتعمل إيه؟
- كل خير بس أهدى

هاتفها أمجد، بكت وهى تروى له تفاصيل مرضها، تماماً كما قال والده أخفته عنه حباً لا غشاً، فمن يتفهم أن النفس قد تمرض كالجسد، مجرد نوع من الفوبيا قد تحرمها من أن تعيش بشكل طبيعى، أنهى المكالمة دون قرار، بات ليلته فى صراع بين مشاعره وقناعته بصحة رأى والدته، تردد فى الذهاب للعمل.. ولكنه ذهب.

بدت له مختلفة هذا الصباح، ربما نظرة الإنكسار والخوف المشوب بقليل من الأمل، أقترب من مكتبها، تركها وذهب.. ألنقطتها فى هدوء وما لبثت أن عاودت عملها، فربما كان تلقى نبأ وفاتها أهون بكثير من تلقى نبأ احدهم.

الفهرس

- 9 • أصلان وصورة ..
- 21 • أكثر من وعاء..
- 33 • أكذب حتى إشعار آخر..
- 43 • الجنة الخاوية..
- 51 • الحكم قبل المداولة..
- 59 • أنف قدر..
- 67 • جلب الحبيب..
- 73 • حاملة بأكثر مما ينبغي..
- 81 • حبر على ورق..
- 93 • دستور سبع نجوم..
- 107 • دوبلير..
- 115 • ربما حان الوقت..
- 125 • زوجة ترانزيت..
- 135 • سبقها إليه..
- 149 • شركاء العرش..
- 159 • عالية بدون نقطة..

- غنيمۃ فرد.. 169
- قضية كتف ماجدة.. 183
- لا يزال فى حوزته.. 195
- لعبة المطار.. 209
- مستصغر الشرر.. 221
- نشوة البداية.. 237
- وعد ومنكوث.. 249
- ولأنه أكرم بكثير.. 259
- ونادى المنادى.. 265